

Ruk

Aboedi Hoafi Ruk ai sürü papimarandi

Ruk ai Sisas tüküme fiyu ranahambo Tiofirusimbo sürü papimarandi

1 ¹Tiofirus, karihasi se adükari nindou-anafi. Nindou afindi ai nine-moatükuni God ai yihoefi mbusümo ramareandi ranahambo diboadofe sürü papimbo mehomu. ²Sapo nindou didemo weangurühi hondü Sisasindi ratüpuri ahamundi himboarinambo hoeiru mburumbo aboedi hoafi watorimborümuni marundi ranahamboemo ai sürü papiru marundi. ³Ro wandihoari munguambo moatükuni ndorihoeimbi weangurühi tüküme feyo ra tüfoarihe fifirimariheandi. Ranimboane asu, Tiofirus, sihambo rani-moatükuni tüküfe-tüküfe marandi ranahambo diboadofe sürü papimbo ro hohoanimoyahani mayoa aboed-ane masahi. ⁴Ro randiheandani animbo asu se munguambo moatükuni sihambo yamundimarihunini ra tüfoarowandühi fifirimbirowanda sahehea.

**Son tüküfemboayu ranahambo sünambeahindi
nendi ai Sekaraiambo hoafimayundo**

⁵Herot ai Sudia-yafe bogorimbofi nünguambe nindou mami ahandi ndüri Sekaraia ai Godimbo sesi siheferambo nindoumbofi manüngu, aiana Godimbo sesi sihoemo-rundeimbi Abaisa-yomondi sirambeahindiyo. Ahandi nimorehindi ndüri ra Erisabetiyo ai-amboani Aronindi sirambeahindiyo. ⁶Yimbu ai Godindi himboahü mbumundi hamindi nimbafembo Adükarindi hoafi himboriyafeihi süngurine marinandi. ⁷Erisabet ai purüsiyo hayamboyo raniambo ai Sekaraia-dibo nimori kefekoate nimbafembo boagirimayafe. ⁸Mami simboani Sekaraiandi sirihündi ratüpurimbo si tüküfeyoambe sesi sihefe ra Godindi himboahü ramareandi. ⁹Sapo Godimbo sesi siheferambo dibonimbo rani hohoanimu süngumbo ahambo dibonimemondowa

Godimbo sihefembo fondiwami fisiŋarümbi moatükuni mandifembo Adükarindi wori ranambe kefuai mahüfu. ¹⁰Raniyo fisiŋarümbi moatükuni-mayo ranai hai tikirandühi horoambe nimorehi nindowenihi afindi ranai weindani nimboeimbo Godimbo didibafiyeyi burimayei.

¹¹Raniyo asu refeyoambe Adükarindi sünambeahindi nendi ranai ahambo-so tüküfi fisiŋarümbi moatükuni mandife fondi warihondani manüŋgu. ¹²Raniyu Sekaraia ai hoeiriri haya hepünifi yihimbo sisirimefiyu. ¹³Ŋga asu sünambeahindi nendi-mayu ranai hoafiyundowohü yahuya, “Sekaraia, se yihimbondamboayafi! God ai sihafi didibafife hoafi himboriyumboani. Asu sihafi nimorehi Erisabet ai sihafi nimori nderimindimboe. Rananimbo se ahambo ndüri Son kaboadiwori. ¹⁴Nimori ranai tükündifiyuani se afindi hamindi hihifi-hihifindamboayafi asu nindou amuri ranai-amboani afindi hihifi-hihifindeimboyei. ¹⁵Nindou ranai ana Adükarindi himboahü ndüreimbi hondündümbui. Aiana yowani wain asu ŋginindi hamindi bia ra ndümündümbui. Ahambo hondi ai wakemindimbo yaŋgiriyoambe Yifiafi Aboedi ranai ahandi fiambe yadidündifemboe. ¹⁶Rananimbo ai Israerihündi nindou afindi ranaheimbo God ahei Adükari-mayu ranahambo sowana hihindeiri ndemündündüri ŋgumbui. ¹⁷Aiana Godindi hoafi hoafiyu-randeimbi, ahandi ndüri Eraisa ramefiyu nou, yahurai ŋginindi ndemündü haya Adükarimbohünda ai boatei horombondüfi ŋgumbui. Aiana afindi mam-anemo asu nimor-anemo asükai mamühindeapura aboedi-aboedindafu, nindou Godindi hoafi himborikoate-yei-rihündeimbi aheimbo hihirindeirani mbumundi hohoanimo süngundihi, asu anihondümbo-rihindeimbi Adükari ai kosimbo-mayu ranimbo didiboadondearümbui,” mehu.

¹⁸Sekaraia ai sünambeahindi nendi-mayumbo simbori hoafiyundühi yahuya, “Asu ro nüŋgundihe fifirimandihe rani-moatükuni ra anihondayo amboani? Roana ndeara boagiriyoamboanahi asu wandi nimorehi amboani boagiriyoamboane,” mehindowamboyu. ¹⁹Sünambeahindi nendi ai simbori hoafiyundühi yahuya, “Ro Gebrier-anahi nda. Roana Godindi ŋgusümboarani-anahi nimboa arihandi. Aiyu wambo koamarihendira sihambo aboedi hoafi hoafimbo makosahi. ²⁰Se moai wandi hoafi ra anihondümbo-rowandi ranimbo-hünda yafadühami tapi nimbafi ŋgafimbo rani-moatükuni ra tükündifemboe. Nini-simboaniyo God ai dibonimayu rani-moatükuni ra anihondümbo tükündifemboe,” mehundo.

²¹Rani-moatükuni ranai refeyoambe nindou bidifiri ai Sekaraiambo weindani nimboeimbo himboyahündowohü hohoanimoyeihiya, “Ai nimboe Godindi worambe gedühi anüŋgu?” masei. ²²Ai weindani tüküfi huhü aheimbo moai hoafi karearü, ŋga wani. Raniyei asu ai rarihi hohoanimoyeihiya awi Sekaraia ai nine awambo moatükuni ahandi himboahümbo Godindi wori ranambe hoeire hayamboyu rawefiyu masei.

Ai aheimbo nini hoafi akidou hoafiyokoate-yundürühiyu asu ai moani ahandi warinambo yanggiri sisamira wakimareandi.

²³ Godindi worambe Sekaraia ai sapo nine-moatükuni refe ratüpurimbo-mayu ratüपुरi ra moendire hayamboyu asu ai ng'oafina mahu. ²⁴ Rani-moatükuni ranai refe hayamboyo-ane ranambe ahandi nimorehi Erisabet ranai warandühumbiyo haya asu ai moai hondahüfeimbi amoamo ranambe wori hiningire ho, nga wani. ²⁵ Ai yare hoafiyowohü yahoya, "Haponda ndeara bidifirani hondü Adükari ai wambo hipoamboreandirihü ai wandi amoaningi nindou himboahü menjgoro ra raguamboareandi," meho.

**Sünambeahindi nendi ranai Mariamboya
Sisas ndowarindimboyafi mehundo**

²⁶ Erisabet ai 6 amoamombo ningoambe God ai sünambeahindi nendi ahandi ndüri Gebrier ranahambo Gariri hifambe ngoafi ahandi ndüri Nasaret raninambo koamarisherü. ²⁷ Ai mahu ra nimorehi sapo nindowenihi ahandi ndüri Sosepimbo momo kumarihindi ranahambo hoafi semündü hayamboyu. Sosep ranai ana adükari bogori Defitindi amoao-yomondi sirambeahindiyu. Nga asu nimorehi-mayo ranahandi ndüri ana Mariayo. ²⁸ Sünambeahindi nendi-mayu ranai nimorehi ranahambo-so tüküfi hoafiyundühi yahuya, "Karihasi. Adükari ai se-dibo nüngumbo sihambo aboedi-aboedimareanini," mehundo.

²⁹ Raniyo asu Maria ai sünambeahindi nendandi-mayo hoafi ra himboriyo haya asu ai afindi hohoanimoyowohü nine-moatükuni hoafi yahurai ra yahohaya hoafimayo. ³⁰ Sünambeahindi nendi-mayu ranai ahambo hoafiyundowohü yahuya, "Maria, se ranimbo yihimbondamboyafi, nga God ai sihambo ngusüfoambe aboedi fufurifoareaninimboani. ³¹ Nga rananimbo se warandühumbündafi hawa nindowenihi nimori ndowarindifi mbunda asu se ahandi ndüri Sisas kaboadiwori. ³² Aiana adükari hondünduani ahambo moani Nimoamo Hamindi Hondüdi nimorani mbiseimboyei. Rananimbo asu Adükari God ranai ahambo bogorimbondirimbui sapo ahandi amoao Defit ramefiyu süngu. ³³ Rananimbo ai koadürümbo-koadürümbo Sekopindi ahuri mamiyei bogorimbondifi nünguhü, ahandi nginindi hifandarandi ranai ngiri moendindo," mehundo.

³⁴ Maria ai sünambeahindi nendi-mayu ranahambo hoafiyondowohü yahoya, "I, rani-moatükuni ra nüngunde yahurai tükümandifea? Asu roana nindowenihikoate-anahisi!" mehondowamboyu. ³⁵ Asu simbori ai ahambo hoafiyundühi yahuya, "Yifiafi Aboedi ranai sihafi fiambe tükündifeninihü animbo asu Godindi nginindi ranai sihambo gabudiboadeaninimboe. Ranimbo-hündambo animbo asu sürühoeimbi nimori ranahambo Godindi Nimor-ani mbiseimboyei. ³⁶ Awi se

himboryafi, sihafi mbu Erisabet amboani nggiri nimori wakindamindo masei boagirimayoa, nga haponda warandühumbüyo haya 6 amoamo homboane. ³⁷Nggiri God ai nini-moatükuni refekoate-ndu,” mehu. ³⁸Asu Maria ai simbori hoafiyowohü yahoya, “Ro Adükarindi ratüpuriya-rihandeimb-anahi, nga se hoafimayafi süngu ai moani rambireandamboane,” mehondowamboyu asu sünambeahindi nendi ranai ndamefiyu.

Maria ai Erisabetimbo ndüfosimbo maho

³⁹Rani-simboani Maria ai botife naporamindi haya nimai ngoafi mami Sudia hifi wafuambe anango raninambo mahafo. ⁴⁰Raniyo asu ai Sekaraiandi worambe ho haya farife hafo Erisabetimbo hihifimarandi. ⁴¹⁻⁴²Erisabet ai Maria hihifimarandi ra himboryo-ambe asu mare ranambe nimori ai ahandi furambe sangurimbo botifi piyu marandi. Raniyo asu Erisabetindi fiambe Yifafi Aboedi ranai tüküfeyowohüyo, ai puküna hoafi karihoehü hoafiyowohü yahoya, “God ai sihambo aboedi-aboedimareanini munguambo nimorehimbo refendürikoate-mayu nou. God ai nimori ranahambo amboani aboedi-aboediririmboani! ⁴³Awi adükari moatükuni wambo tüküme Feyondiri. Nga wandi Adükarindi hondü ai wambo hoeifendirimbo tüküme Feyo. ⁴⁴Awi se himboryafi, asu ro sihafi-mayo hihifi hoafi ra kefoendühi himborihamindihühüyahü asu nimori wandi furambe asanguru ranai hihifi-hihifiyuhü hohoripi-hohoripimayu. ⁴⁵Adükarindi hoafi ra se anihondümbo-ndowandühi ana, asu se hihifi-hihifindafi sapo rani-moatükuni ranai anihondü sihambo tükündifeninimboe,” mehondo.

Maria ai Godimbo herüna kakisaomariri

⁴⁶Maria ai yahoya,

“Ro wandi ngusüfoambe ra Adükarimbo adükar-ani sa hohoanimoyahi.

⁴⁷Asu wandi hohoanimoyahi ranai Godimboya

wandi Aboedambo-reandiri-randeimbani yaho hihifi-hihifayo.

⁴⁸⁻⁴⁹Ro ahandi ratüpuriya-rihandeimbiya hehea moanindi nimorehiyahi, nga asu ai wambo hohoanimoyuhü ndondomareandiri.

Hapondanambe peyo haya süngunambo gogu aho ranambe amboani nindou ai wambo hihifi-hihifümb-anafi mbiseimboyei, nimboe sapo Adükari Hamindi God ai wambo adükari moatükuni ramareandi ranimbo-hünda.

Ahandi ndüri ra moani sürühoeimbane.

⁵⁰Nga asu ahandi hipoambofe hohoanimoyahi ranana nindou didiyei ahambo ahinarihori ranaheimbo-so boagiri tühünimbo rande yagodimboe.

- 51 Ai ahandi wari nginindi ranambo adukari ratupuri ratupurimayu.
Ai nindou afindi-afindiyeimbi ranaheimbo ahei hohoanimo nine
moaruwai amaronduri
rani kameihi bukurumafoareanduri.
- 52 Ai bogori nindou-memo ahamundi nimarifondi waminindi hifini
hemoafoareapuri.
Raniyo asu nindou ndurikoate-memo ranahamumbo nimoamo
sepurimundu botimareapuri.
- 53 God ai nindou wembomboyeimbi ranaheimbo aboedi moatukuni
yimbureanduri
asu nindou napombu-mayei ranaheimbo nini akidou-amboani
warambefendurikoate koamarihenduri.
- 54 Ai ahandi ratupuriyei-rihundeimbi Israer ranaheimbo mafarihenduri
ra
sapo horombo hoafiyu masihendi rani sungumboyu
hipoambomareanduri.
- 55 Ai Abraham asu ahandi ahuri mami ranaheimbo hoafiyondurimbo
koadurumbo-koadurumbo ra hohoanimoyu masihendi rani
sungumboyu ramareandi,”

meho.

56 Maria ai ngimi amoamo Erisabeti-dibo ningo himboyo asu ai
ngoafina asukaiyo hihirife maho.

Erisabet Sonimbo maserimindo

57 Erisabet ai ahandi nimori semindimbo si tukumefeyondowamboyo
asu rani-simboani ai nindowenihini nimori maserimindo. 58 Nindou
bidifiri ai-babidimbo wori yimburihindeimbi raniyei asu ahandi
wahori mamiyomo munguambo Adukari ai nine aboedi rani-poanimbo
moatukuni ahambo ramareandi ra himboriyeihehi ai Erisabetimbo
ngusufoambe hihifi-hihifimehundo.

59 Nimori ranai mami wikiyu hayamboyuwane, asu ai ahandi
fihoeari kefetirihefe mburimbo afindandi nduri sungu Sekaraiambofi
kafoefimboani sei hehi mahei. 60 Nga asu ahandi hondi ai hoafiyowohu
yahoya, “Yowani! Ahandi nduri ana Son animbombiyu-wamboane,”
mehonduri. 61 Raniyei asu ai ahambo hoafiyehi seiya, “Asu seana sihafi
srambe moai yahurai nduri ana yangoro,” masahundo. 62 Raniyei asu
ai ahandi afindambo warinambo yangiri hoafiyehi nduri nini nimori
ranahambo kamaboadihori masahundo. 63 Sekaraia ai suru papimbo
moatukunifihini nduri pareanduhi yahuya, “Ahandi nduri ana Son-ani,”
mehuamboyei. Asu moani nimboe yahurai munguambo ai hepunimehindi.
64 Refeyowohiyo asu moani ranambe hamindi Sekaraia ai asukaiyu hoafi
ra waporimbo-randuhiya Godimbo aboed-ani yahu hoafimayu. 65 Raniyo

asu nindou ŋgoafi akimi amarei ranai yihimbo sisireandürühiyo, asu rani-moatükuni ramefeyo rani hoafi ranai Sudia hifi wafuambe ŋgoafi anango rani-amboani ho-ho marandi. ⁶⁶Muŋguambo nindou ai rani hoafi ranahambo himboriyei hehi hohoanimo kikiriündühi düduyahindühi seiya, “Nimori ra nini moatükuni nahurai nimori tükümandifia?” masei. Ai rarihi fifirihindi Adükarindi ŋginindi ranai ai-dibo aningho ho.

Sekaraia ai Godindi hoafi hoafimayu

⁶⁷Sonindi afindi Sekaraiandi fiambe Yifiafi Aboedi ranai farifehiyo asu ai Godindi hoafi ra yare hoafiyuhi yahuya,

⁶⁸“Awi sihiri Israeri-yafe God Adükari ranahambo aboed-ani mbisefomboane.

Ai ahandi nimorehi nindowenihi ranaheimbo farihefendürühi aheimbo aboedambofe-ndürimbohünda makusu-ani.

⁶⁹Ahandi ratüpuriyu-randeimbi amoa Defitindi srambeahindiyu ai sapo nindou ŋginindi sihefimbo aboedambofe-munimbo-mayu ranahambo dibonimayundo.

⁷⁰Ai ahandi sürühoeimbi hoafi hoafiyomo-rundeimbi-yomondi süngu horombo hoafiyu masihendi hoafi ra süngumareandi.

⁷¹Rani hoafi ra yahurai yare hoafiyuhi yahuya ai nindou sihefimbo hürütümb-anei.

Asu yiboarukoarihmun-anei ranahei ŋginindi warambeahindi aboeda hündihemunümbui yahu hoafiyu masihendi.

⁷²Ai sihefi amoa mamimbo hipoambondeandürümbui.

Asu ahandi hoafi hoafiyu firamündü masihendi ranahambo hohoanimondümbui.

⁷³Sihefi amoa Abrahamimbo ai dabarifihi hoafiyu masihendi.

⁷⁴ Ai sihefi hürütümbiyei warambeahindi aboedambo hürühefemunühi,

asu ai sihefimbo ahandi ratüpuri yihimbo sisirifekoate ratüpuriimbo ra süngurihi yahombo hoafiyu masihendi.

⁷⁵Asu rananimbo sihiri yangiri nimboefambe amboani, sihiri moani sürühehundeimbindefi mbundihu,

aboedi mbumundi hamindi ahandi himboahü muŋguambo si aho ra nimboefomboane.

⁷⁶⁻⁷⁷Haponda, wandi nimori, sihambo ana

Nimoamo Hamindi Hondüdi hoafi hoafiyafi-randeimbi-anafi mbiseimboyei.

Seana Adükariimbohünda horombondafo ŋgafühi ahamböhünda nafi didiboadondowandühi

ahandi nendi ranaheimbo ahei moaruwai hohoanimo ra ambowi yahohü

moaruwai hohoanimo-ambeahindi aboedambofe-ndürimboani yahombohünda.

78 God ahandi hipoambofe hohoanimonambo simbori si nahurai koaboadeanda kodimboe.

79 Rananimbo nindou yifimbo yihimboyeihini nimbi nimarooni animboei aheimbo si boakiboadeandürimboe.

Asu rananimbo sihefimbo aboedi nimarimbo nafi nafuindamuna ngemboeyefi,”

Sekaraia ra mehu.

80 Süngunambo Son ai adükariyuhumbo asu Yifiafi Aboedi ranai-amboani ahandi fiambe nginindi tükümefeyo. Ai hu nimi wohi furikoate-reandühi nungu humbo Israer so boatei weindahi tükümefiyu.

Maria Sisasimbo maserimindo

(Matyu 1:18-25)

2 1 Rani-simboani Romi-yafe adükari bogori Sisar Ogastas ai muṅguambo nindou ranihündambo ai ndüri semindimbo hoafi ra hoafiyu masihendi. 2 Kwirinius ai Siria-yafe bogorimbofi nunguambeyo muṅguambo nindou ranaheimbo ndüri semindimbo ra boatei tükümefeyo. 3 Raniyei asu muṅguambo nindou ranai mamami ahandihoari ahandi ndüri semindimbohünda ahandi ngoafi hondü raninambo hei marihündi.

4 Raniyu asu Sosep ai-amboani Gariri hifambe Nasaret ngoafihündi botifi haya adükari bogori Defitimbo sahorimindeimbi ngoafi Betrethem Sudia hifambe anaṅgo raninambo mahu. Sapo ai Defitindi srambeahindani. 5 Raniyo asu Maria ranahambo Sosepimbo semündumbo momo kümarihindi rani-dibo ndüri semindimbo mahu. Raniyo asu Maria ranai warandühumbiyo. 6 Raniyo asu ai Betrethem ngoafihü nimbafeambe Maria ai ahandi nimori wakemindimbo si ranai ndeara bidifirani tükümefeyo. 7 Ai ahandi amonṅo nimori ra wakirimindi haya nimori-yafe hoearinambo himonderi mbura burmakauyei sesi hipirambe mafoareri. Sapo nindou aporambo wori ranai nindou fondi muṅgu simonṅorimayeiambo wambo.

Sünambeahindi nendi ai sipsip hifandiru-rundeimbimbo

Sisas tükümefiyu hoafi sowandümo mahomo

8 Rani hifihü sipsip hifandiru-rundeimbi ai ahamundi sipsip fufurundümo homo moanambühi hifandirundürühi mamini nimbi-memo. 9 Adükariindi sünambeahindi nendi ranai ahamumbo-so tüküfihüyu asu Adükariindi himboamupui-randeimbi si ranai ahamumbo boakimafoareapuri. Raniyomo asu ai rani-moatükuni ranahambo

yihimbo sisirimefundi. ¹⁰Ŋga asu sūnambeahindi nendi ranai ahamumbo hoafiyupurūhi yahuya, “Se ranahambo yihimbondimboemo. Ro ndanimboahi nda sihamumbo aboedi hoafi sahamindimboanahi. Rani-moatūkuni hoafi rananimbo adūkari hihifi-hihifi ndemindi muṅguambo nindou ranaheimbo tūkündifemboe. ¹¹Ndani-simboani Defitindi ṅgoafi Betrehem ranihū nindou sapo siheimbo aboedambofe-ndürimbo-mayu ranahambo hondi ai wakimarimindo. Ai nindou God dibonimeindo Krai Adūkari ranani. ¹²Ŋga asu rananimbo se ahambo anihondumbo randu yahurai fifirindūwuri. Se hoeindūwurani nimori ranai hoearinambo himondihefimbĩ burmakau-yei sesi hipirambe foerūmbui,” mehupuri.

¹³Raniyo asu hoafi niṅgoambe sūnambeahindi ami-yomondi nendi ranai tüküyafu sapo sūnambeahindi nendi ṅgorū-mayu rani-babidimbo niṅgomombo Godimbo aboed-ani yahomo hoafiyomondūhi yahomoya,

¹⁴“God nimoamo hamindi hondū anūṅgu ranahambo aboed-ani mbiseiamboane.

Nimorehi nindowenihi hifi ndanihū animboei ranaheimbo ṅgusūfo afurifimbĩ hohoanimo segodürimboane.

God ai aheimbo ṅgusūfo pareandürūhi siyaofindürūhani,”

mehomo.

Sipsip hifandiru-rundeimbi nindou ranai homo Sisasimbo hoeimarūwuri

¹⁵Sūnambeahindi nendi ranai ahamumbo sowahindi botiyafu sūnambe hafomondane, sipsip hifandiru-rundeimbi nindou-memo ranai ahamundihoari bogo hoafi firündümondūhi yahomoya, “Awi sihiri Betrehem ṅgoafinambo ṅgefi sapo rani-moatūkuni tükümeṅfeyo ra hoeindihi Adūkari ai hoafimemuni sūṅgu,” mehomo. ¹⁶Raniyomo asu ai nimai raninambo homo Maria Sosepimbo-so tüküyafu mburu nimori burmakauyei sesi hipirambe mafoeru ra hoeimarūwuri. ¹⁷Sipsip hifandiru-rundeimbi nindou-memo ranai ahafembo hoeirupiri mburu asu ai nine-hoafi nimori ranahambo sūnambeahindi nendi ai hoafimemo hoafi ra hoafimemopiri. ¹⁸Muṅguambo nindou ai rani hoafi ra himboriyei hehi hepūnahi aṅfidi hohoanimomaye. ¹⁹Ŋga asu Maria ai rani hoafi muṅgu ra ṅgusūfoambe hohoanimoyo marandi. ²⁰Raniyomo asu sipsip hifandiru-rundeimbi nindou ranai hihiriyafu homondūhi Godimbo adūkari-ani asu ndürimb-ani yahomo houmbo mahomo. Ai sapo ahamumbo sūnambeahindi nendi hoafimemopuri rani sūṅgumbo rani-moatūkuni ranahambo himboriyomo hoeiru houmbo wambo.

Sisasimbo ndürĩ kamafoarihori

²¹7 Si ranai hoane rani wagabe nimori ranahambo hoeari ketetirihifihi ndürĩ Sisas kafeofimbo si ranai tükümeṅfeyo. Sisas ra horombo hondandi

furambe sanjorikoate-yuambe rani-simboani sünambeahindi nendi ai kamafoarir-ane.

Simion Ana ai Sisasimbo Godindi worambe hoeimarineri

²² Mosesindi ahinümbi hohoanimo meŋgoro ranai hoafimayo süngu Maria Sosep ai aboedi tüküfe nimarimbomefe rani si ai tükümeŋyopiri. Rani-yafe asu ai nimori ra sowarindife hena Adükarindi himboahü hiniŋgimbo Serusarem ŋgoafina mahafe. ²³ Sapo rani-moatükuni refembo-mayo ra Adükarindi ahinümbi hohoanimoambe yahurai sürü pare yaŋgorowohü yahoya, ‘Muŋguambo nindowenihi nimori furi simborihündi ranana Godindifihi yaŋgiri paiarimboane,’ meho. ²⁴ Asu ai hafe yimbu wupufombefeyo asu dibi weimbefeyo ranamboani Godimbohünda hifokoarine masiheneandi sapo Adükarindi ahinümbi ra-meho süngumbo.

²⁵ Rani-simboani nindou mami ahandi ndüri Simion ranai Serusarem ŋgoafi ranihü manüŋgu. Nindou ranai ana ai aboedi hamindiŋu haya Godimbo yaŋgiri hohoanimo parireimbi nindouyuhü Israer nindou ranai aboedambo-mbeahindi yahu haya himboyumbüyu manüŋgu. Yifiafi Aboedi ranai ahandi fiambe nimaroweimbiyu. ²⁶ Raniyo asu Yifiafi Aboedi ai Simionimbo hoafi weindahireandowohü yahoya, “Ŋgiri se nimai yifindafi, ŋga se nimbafi-nimbafimbo Adükari ai Nindou koamariheiri ra hoeindiŋwori hawambo animbo ndamboyafi,” meho süngu. ²⁷ Yifiafi Aboedi ai Simionimbo hohoanimo botimareramboyu asu ai Godindi worina mahüfu. Sapo ahinümbi hohoanimo meŋgoro rani-süngumbo ahambo refimboyafe hondafindi ai nimori Sisas ranahambo sowarindife Godindi wori ranambe mahüfe. ²⁸ Raniyo asu Simion ai nimori ranahambo ahandi warambe wakirümündi Godimbo hihifirürühi hoafiyuhi yahundoya,

²⁹ “Adükari sapo horombo wambo se hoafimayafi ra-süngumbo
sihafi ratüpurüya rihandeimbi nindou nda moani rando
hiniŋgindowandira

ro ŋgusüfo afurindihe kündihe hehea yifindamboane.

³⁰ Ro wandi himboarinambo se yihoefombo aboedambofe-
munimboayafi ra hoeiriheamboanahi.

³¹ Rani-moatükuni ra se sihafi nimorehi nindowenihi ranahei
himboahü didiboadorandifi masihoefane.

³² Rani-moatükuni ranana weindahifembo si-ane,
ŋga sihafi hohoanimo süngu rani-moatükuni ranai animbo
Suda-yafe ndifo mayei ranaheimbo si dagadürimboe.

Asu nimorehi nindowenihi sihafi Israerihündi-mayei
ranaheimbo ndüri adükarümbi niŋgo hohoanimo ra
tükündifendürimboe,” mehu.

³³Rani-yafe asu nimorindi hondafindi ranai nine-moatükuni hoafi Simion ai wataporimbo-marandi ranimbo himboriyafe hena hepünimefineandi. ³⁴⁻³⁵Raniyu asu Simion ai aheimbo aboedi-aboedireandürühi Maria nimorindi hondi-mayo ranahambo hoafiyundowohü yahuya, “Nimori ndanana God ai ahandihoari dibonimayuanu Israerihündi bidifiri ahambo anihondümbofekoate-ayei ranai moaruwaimbo-ndahimboyei asu anihondümbo-arihori ai aboedambondahimboyei. Ai Godindi yifiri nafuindümbui asu nimorehi nindowenihi afindi ranai ahandi hoafi himborikoate-ndeihi, asu ahei nine hohoanimo dibo ahei ngusüfoambe mamarondüri ra weindahindihimboyei. Rananimbo asu sihambo-amboa afindi hohoanimo ranai pisao nahurai sihambo ngusüfo ra nandeamboe,” mehu.

³⁶⁻³⁷Ranihü nimorehi kai mami ahandi ndüri Ana Godindi hoafi hoafiyo-randeimbiyo maningö. Ai Fanuerindi nimoriyo haya asu Asandi srambeahindi-mayo. Nimorehi ranai 7 himbaniyo nindoweniühimefeyo nga asu haponda 84 himbanimbo boagiriyomboane. Ai moai Godindi wori ranahambo hiniñgire tifoendi, nga ai moani nimbi nimbisi aho ra Godimbo hohoanimoyowohi wembopo didibafife marandane. ³⁸Moani rani-simboani hamindi ranambe nimorehi ranai akimi tüküfe niñgo Godimbo hifihimariri. Asu ai nindou didiyei sapo Serusarem ngoafi God ai aboedambo-fembo-mayu ranahambo himbomaye ranaheimbo nimori-mayu ranahambo wataporimbo-randürühi hoafimendüri.

Sosep ai ahandi ambori babidimbo Nasaretinambo hihiriyahi mahei

³⁹Sosep Maria ai sapo nine-moatükuni ratüpuri Adükarindi ahinümbi hohoanimo süngumbo refembo ratüpurimayo ra rarine mburina, asu ai ahafe ngoafi Nasaret Gariri hifambe anañgo raninambo hihiriyafine mahafe. ⁴⁰Nimori ranai adükariyuhü nginimarichoayu. Raniyu asu ai ndore fifire haya God ai ahambo ngusüfoambe aboedi-aboedimariri.

Sisas hoarifi ranai yamundu-rundeimbi nindou babidi Godindi worambe mamaru

⁴¹Munguambo himbani ra Sisasindi hondafindi ai Serusareminambo adükari si ahandi ndüri Pasofa tüküfe arandi rani hoeifembo hafe marinandi. ⁴²Asu Sisas ai 12 himbanimbo nünгу hayamboyuane, sapo rani moatükuni si koadürü refemarandi süngumbo ai hoeifembo mahafe. ⁴³Adükari si ranai hümaramindo-wamboyafe asu ai ngoafina hihiriyafine hafe, nga Sisas hoarifi-mayu ranai Serusarem ngoafihü namaru. Nga asu ahandi hondafindi ai nimarimbo-mayu ra moai fifirineandi. ⁴⁴Ai ndanananiya nindou amuri bidifiri rani-babidimbo mbahumbai safe hena asu ai rani si peyo haya maho ra nafi süngu hafehü ngunindambüri asu mamisiri-maye ranahei mbusimo kokomarini hafe. ⁴⁵Ai

ahambo hoeifikoate-yafehü asu ai hihiriyafine hena Serusareminambo hüfihi kokomariniri hüfe. ⁴⁶Yimbu si ranai howane, ŋgimi sinambo hondafindi ai Godindi worambe Suda-yomondi ahinümbi hohoanimo yamundu-rundeimbi babidimbo mamaruwa hoeimarineri. Ai ranihü nimarümbo ahamundi hoafi hihimboriyu asu düdufe hoafi düdufipuri randühi mamaru. ⁴⁷Rani nindou muŋguambo didemo ai ahandi hoafi himborimemo ranai ahandi fifirifeyo asu simbori hoafimayu ranahambo hepünümefundi. ⁴⁸Ahandi hondafindi ai ahambo hoeirinerühi hepünüyafine mburina hondi ai hoafiyondowohü yahoya, “Nimori nda se nimboe yihoehimbo ra-süŋgumarowanda? Sihafi ape-dibo ro sihambo afindi hohoanimoyehühi kokomarihoanini,” meho. ⁴⁹Nimori ranai simbori hoafiyuhi yahuya, “Nimboe se wambo kokomarinandira? Ro wandi Apendi worambeahi nimboamboanahi ra se moai fifirineandiyo?” mehu. ⁵⁰Ŋga yimbu ai moai nimorindi hoafi nimindi ra ndorine fifirineandi.

⁵¹Raniyo asu Sisas ai ahandi hondafindi babidimbo Nasaret ŋgoafinambo hihiriyahi mahei. Asu ai ahafe hoafi himboriyu marandi. Ahandi hondi Maria ai muŋgu moatükuni ra ŋgusüfoambe hohoanimoyo kikihimareandi. ⁵²Sisas ai ahandi fi ra adükariyuhü asu ahandi fifirife hohoanimo ranai adükari tüküfihi God-aiyu asu nindou-ayeï ahambo hoeirihora mayoa aboed-ani masahündo.

Son hundürira-randeimbi ai hoafi bokarimarihendi

(Matyu 3:1-12; Mak 1:2-8; Son 1:19-28)

3 ¹⁻²Sisar Taiberius ai 15 himbani hifandirandambe Pondius Pairat ai Sudia-yafe hifi hifandimarandi. Herot ai Gariri hifi hifandirandane, ahandi akidi Firip ai Ituria hifi asu Trakonitis hifi hifandimarandi. Risianas ai Abirene hifi hifandirandambeyo asu Anas weimbo Kaiafas ai Godimbo sesi sihene-rinandeimbi bogori adükarimayafani. Rani simboaniyo Son Sekaraiandi nimori ahambo-so nimi wohi furikoate-reandühi Godindi hoafi ranai tüküme Feyo. ³Raniyo Son ai Sodan hoekimi ra hoahoangu wakireandühi hoafi bokarihendühi yahuya, “God ai sihei moaruwai hohoanimo ra gogorihefembohünda muŋguambo nindou sihei moaruwai hohoanimo ra hiniŋgindihi hehi hundüründei,” mehu. ⁴Rani-moatükuni ra Godindi hoafi hoafiyu-randeimbi, ahandi ndüri Aisaia, ahandi bukambe hoafimayo süŋguyo tüküme Feyo. Ai yare hoafiyowohüya,

“Nimi wohi furikoate-reandühi nindou mami ahandi yasimondi
 ranai miŋgiyo hoafiyowohü yahoya,
 ‘Adükarindi nafi wudipoapondihindi,
 ahambohünda nafi didiboadondihindi.’

⁵ Muŋguambo hoafendi peyo-peyo arandi ra hifi hirindei
 koaboadihindühi

botire niŋgoweimbi ra didiboadombirihindamboane.

Nafi ho pusire ho pusire-randeimbi ra

didiboadorihinda mbumundimbeyo-wamboane,

asu nafi moaruwaiayo ra wudipoapo-mbirihindamboane.

⁶ Rananimbo muŋguambo nimorehi nindowenihi ranai God sihefimbo aboedambofe-munimbohünda ratüpurimayu ra hoeimbirihindamboane,”

Aisaia 40:3-5

meho.

⁷Nindou afindi ranai Sonimboya hundürümbiramuni sei hehi Sotan himona maheiamboyu ai aheimbo hoafiyundürühi yahuya, “Se ana amoasiri moaruwai ranahandi nimor-anei. Siheimbo didi ai hoafimayu-amboyei God ai moaruwaimbo-fendürimboayu ranambeahindi aboedambo-fembo hohoanimoayeia? ⁸Sihei hohoanimo ra hisi nahurai-ane. Se sihei moaruwai hohoanimo hiniŋgimarihindi ra nafuimbohünda hisi aboedi nahurai hohoanimombeyei-amboane. Asu se ŋgiri siheihoari simbori hoafürindeihiya, ‘Abraham ana yihoefi amao-ani ranimboane God ai ŋgiri yihoefimbo ŋginindindamuni,’ mbisei. Ŋga Abrahamindi ahuri ra moanane. Haponda ro siheimbo hoafayahandüri, God ai yifirayu ana, ai nimoei nda Abrahamindi ahurimbondede nafindandüri hiniŋgi-ndeandürümbui. ⁹Nimi ranai aboedi hisikoate-ayo ana, nimi afimambe time yanŋorimboane, hitifoefe haiambe pifembohünda,” mehu.

¹⁰Nimorehi nindowenihi ranai Son hoafimayu ra himbori-yei hehi düdürühorühi seiya, “Asu ro nünüŋgu-mandihunda?” masei ¹¹Asu raniyo Son ai simbori hoafiyundürühi yahuya, “Nindou ŋgorü ai siot yimbundapirani asu ŋgorü ai moaninduani ahandi-mayo fihindi ŋgorü mbisagadowamboane. Asu nindou ŋgorü ai sesi afindi asihendi amboani moani mami mare rani süngumbireand-amboane,” mehu. ¹²Takis kaki sowandümo-rundeimbi nindou bidifiri amboani hundürümböhünda mahomo. Asu ai düduyafundühi yahomoya, “Nindou yamundo-randeimbi, asu ro nünüŋgu-mandihunda?” mehomo. ¹³Asu simbori Son ai hoafiyupurühi yahuya, “Se takis kaki ra gafman hoafimemo simogodühi yanŋiri ndowandümo, ŋga se ahei-mayo afindi hamindi semindüpoani,” mehu. ¹⁴Asükai ami bidifiri ranai düduyafundowohü yahomoya, “Asu ro nünüŋgu-mandihunda?” mehomondamboyu. Asu simbori hoafiyupurühi yahuya, “Se yowani nindou bidifirambo moaruwaimbo-ndüwurühi ahei kaki hühbühüni-yopoani. Asu se yowani ahei-mayo kaki hühbühünimbohünda tikefehefe papi-hoafiyopoani. Sapo sihamundi ratüपुरi ranimbo-hünda kaki asowandümo ra ndear-ane,” mehu.

¹⁵Nimorehi nindowenihi ranai rani-moatükuni ra hoeirihi hehi hepühnehindühi afindi hohoanimoyeihi seiya, “Awi Son ranana Godindi nindou ranaheimbo semindi-ndürimbo kafoariri hiniŋgimariri sapo Kraisi rani-mbai,” masei. ¹⁶Raniyo asu Son ai aheimbo muŋguambo

hoafiyundürühi yahuya, “Roana siheimbo hoenambo yanggir-ane hundürarihändüri, nga nindou ngorü sünguni asunu ranai ana ahandi nginindi ra wandi nginindi ngasündeamboane. Asu roana aboedi hamindiyahipoani ahandi su wofi himondi-maramüdu ra fufurihefembohünda. Ai animbo hai asu Yifiafi Aboedinambo hundüründandürimbui. ¹⁷Aiana nindou sifet semündümbo nahurai animbo tükündifimbui. Rananimbo wit hipiri ra fifirindihembui. Asu wit safi wit sihefe worambe digendühi hipiri ra hai koadürümbo koadürümbo horoweimbi ranambe mandeambui,” mehu.

¹⁸Nimorehi nindowenihi afindi ranaheimbo Son ai ahei ngusüfoambe ngorü süngurearü botirearü randühi aboedi hoafi ra bokamarihendüri. Asu bidifiri amuri hoafi ranamboani ranifihi türe wataporimbo-marandi.

Herot ai Sonimbo karabusimariri

¹⁹Ŋga Son ai ahamundi nindou adükari bogori ahandi ndüri Herot ranahambo nginindi hoafimayundo. Ai ramariri ra sapo Herot ai ahandi akidandi nimorehi ahandi ndüri Herodias semündü asu bidifiri amuri moaruwai hohoanimo ranamboa yare marandamboyo ramariri. ²⁰Raniyu Herot ai moaruwai hohoanimo ngorü hohoanimoyuhüyu asu ai Sonimbo karabusimariri.

Son Sisasimbo hundürümarüri

(Matyu 3:13-17; Mak 1:9-11)

²¹Muŋguambo nimorehi nindowenihi ai huhundürüyei hehimboyei, asu Sisas ai-amboani hundürümayu. Ai refi mbura nimoamo himboyuhü didibafiyuhü nüŋguane, asu sünambe bumareandi. ²²Raniyo asu Yifiafi Aboedi ranai wupufu hoearambefe haya kosi ahandiwami pühimayo. Raniyo asu sünambeahindi hoafi ranai tüküfihi yare hoafiyowohü yahoya, “Seana moani wandi nimori hondü-anafi. Ro sihambo ngusüfoambe siao yaheamboanahi,” yaho hoafimayo.

Sisasindi amoa ahamundi ndüri

(Matyu 1:1-17)

²³Sisas ai 30 himbanimboyuhüyu ahandi ratüpuri ra piyu haya ratüpurimayu hu. Raniyei asu nindou ai awi Sosepindi nimor-ani sei hoafimayei. Ranühi peyo haya boagiri maho ra ndahurai-ane: Sosep ai Erindi nimoriyuane asu Eri ai Matatindi nimori-mayu. ²⁴Matat ai Rifaindi nimoriyuane asu Rifai ai Merkindi nimori-mayu. Merki ai Sanaindi nimoriyuane asu Sanai ai Sosepindi nimori-mayu. ²⁵Sosep ai Matatiasindi nimoriyuane asu Matatias ai Amosindi nimori-mayu. Amos ai Nahumindi nimoriyuane asu Nahum ai Esrindi nimori-mayu. Esri ai Nagaindi nimoriyuane asu Nagai ai Matindi nimori-mayu. ²⁶Mat ai

Matatiasindi nimoriyuane asu Matatias ai Semenindi nimori-mayu. Semen ai Sosekindi nimoriyuane asu Sosek ai Sodandi nimori-mayu. ²⁷⁻²⁸Soda ai Soananindi nimoriyuane asu Soanan ai Resandi nimori-mayu. Resa ai Serubaberindi nimoriyuane asu Serubaber ai Siartierindi nimori-mayu. Siartier ai Nerindi nimoriyuane, Neri ai Merkindi nimori-mayu asu Merki ai Adindi nimoriyuane asu Adi ai Kosamindi nimori-mayu. Kosam ai Ermadamindi nimoriyuane asu Ermadam ai Erindi nimori-mayu. ²⁹Er ai Sosuandi nimoriyuane asu Sosua ai Erieserindi nimori-mayu. Erieser ai Sorimindi nimoriyuane asu Sorim ai Matatindi nimori-mayu. ³⁰Matat ai Rifaindi nimoriyuane asu Rifai ai Simionindi nimori-mayu. Simion ai Sudandi nimoriyuane asu Suda ai Sosepindi nimori-mayu. Sosep ai Sonamindi nimoriyuane asu Sonam ai Eriakimindi nimori-mayu. ³¹Eriakim ai Mereandi nimoriyuane asu Merea ai Menandi nimori-mayu. Mena ai Matatandi nimoriyuane asu Matata ai Natanindi nimori-mayu. ³²Natan ai Defitindi nimoriyuane asu Defit ai Sesindi nimori-mayu. Sesi ai Obetindi nimoriyuane asu Obet ai Boasindi nimori-mayu. Boas ai Sarmonindi nimoriyuane asu Sarmon ai Nasonindi nimori-mayu. ³³Nason ai Aminadapindi nimoriyuane asu Aminadap ai Ramindi nimori-mayu. Ram ai Hesronindi nimoriyuane asu Hesron ai Peresindi nimori-mayu. Peres ai Sudandi nimoriyuane asu ³⁴Suda ai Sekopindi nimoriyu-mayu. Sekop ai Aisakindi nimoriyuane asu Aisak ai Abrahamindi nimori-mayu. Abraham ai Terandi nimoriyuane Tera ai Nahorindi nimori-mayu. ³⁵Nahor ai Serukindi nimoriyuane asu Seruk ai Reundi nimori-mayu. Reu ai Perekindi nimoriyu-ane asu Perek ai Eberindi nimori-mayu. Eber ai Sarandi nimoriyuane asu Sara ai Kainanindi nimori-mayu. ³⁶Kainan ai Arpaksatindi nimoriyuane asu Arpaksat ai Siemindi nimori-mayu. Siem ai Noandi nimoriyuane asu Noa ai Ramekindi nimori-mayu. ³⁷⁻³⁸Ramek ai Metuserandi nimoriyuane asu Metusera ai Enokindi nimori-mayu. Enok ai Saretindi nimoriyuane asu Saret ai Mahararerindi nimori-mayu. Mahararer ai Kenanindi nimoriyuane asu Kenan ai Inosindi nimori-mayu. Inos ai Setindi nimoriyuane asu Set ai Adamindi nimoriyuane asu Adam raniyu Godindi nimori-mayu.

**Satan ai Sisasimbo moaruwai hohoanimombiyuwa
yahuhaya rari hoeimariri
(Matyu 4:1-11; Mak 1:12-13)**

4 ¹⁻²Sisas ai Sodan Hoe himonindi tüküfi haya Yifiafi Aboedi ahandi fiambe farifehüyo kife hürimindi nindoukoate-reandi nafi maho. Raniyo asu ranihü Satan ai ahambo moaruwai hohoanimombiyuwa yahuhaya 40 sihi rari hoeimariri.

40 si maho ranai munguyoambe Sisas ai nini sesi akidou-amboani sesikoate-wambo wembombomayu. ³Raniyu asu Satan ai Sisasimbo

hoafiyundühi yahuya, “Se Godindi nimor-ayafi ana, nimoei kurayo ndanahambo hoafindafani Bretimbondife tükümbifeyo-wamboane,” mehundo. ⁴Sisas ai simbori hoafiyundühi yahuya, “Godindi Bukambe yare hoafiyowohü yahoya, ‘Nindou ai ngiri bret ranihi gedühi yangiri nüngu, nga wani,’ meho,” mehundo.

⁵Raniyu asukai Satan ai Sisasimbo hifi wafuambe nimoamo serümündü hafu muṅguambo moatükuni nginindi hifandarandi eṅgoro hifi rani hoarehi ranahambo nafuimefoendo. ⁶Raniyu yare hoafiyundühi yahuya, “Ro sihambo muṅgu moatükuni nginind-ane asu ndüri adükarümbi moatükuni hifi ranihü eṅgoro ra ndahaninimboyahi. Muṅguambo moatükuni ranana wandi yangir-ane, nga ranimbo wambo ro nindou daboe saimboayahi ra moani wandi hohoanimonambo yangiri ndeheamboayahi. ⁷Se wambo yangiri ngusüfo parowandirühi hohoanimoayafindiri ana, ro sihambo muṅgu moatükuni ra ndahaninimboyahi,” mehundowambo. ⁸Asu Sisas ai simbori ahambo hoafiyundühi yahuya, “Godindi Bukambe yare hoafiyowohü yahoya, ‘Sihafi Adükari God ranahambo yangiri animbo ngusüfo pefihumbo ahambo hohoanimoyondowohü ahandi ratüpuri yangiri refemboane!’ meho,” mehundo.

⁹Raniyu asukaiyu Satan ai Sisasimbo serümündü haya Serusarem ngoafina hafu tüküfi Godindi wori-mayo rani bogimondi wami nimoamo hamindi ngahi hiningimariri. Raniyu asu ai ahambo hoafiyundühi yahuya, “Se Godindi Nimor-ayafi ana, ndaniwaminindi sihafihori ragu horopindafo pindafo. ¹⁰Buk Baiborambe yare hoafiyowohü yahoya, ‘God ai ahandi sünambeahindi nendambo hoafindüpurani asu ai sihambo aboedindondünini hifandindüninimboemo.

¹¹Ai sihambo ahamundi wari ra nandundani kodafi raniwami pindafühi ngiri sihafi tiṅari ra nimoeinambo kaboadeyanini!’ meho,”

Buk Song 91:11-12

mehundo. ¹²Ḷga asu Sisas ai simbori ahambo hoafiyundühi yahuya, “Buk Baiborambe yare hoafiyowohü yahoya, ‘Se ngiri Adükari sihafi God ranahambo rando hoeindiwori’ meho,” mehundo. ¹³Satan ai ahandi refe hoeife hohoanimo hoafi ranambo Sisasimbo ngorü-süṅguriri hoeiriri ngorü-süṅguriri hoeiriri ra mbura awi süṅgunamboane yahuhaya ranihü ahambo rariri hiningiriri haya ndamefiyu.

Sisas ai ahandi ratüpuri Gariri hifambe boatei piyu ratüpurimayu
(*Matyu 4:12-17; Mak 1:14-15*)

¹⁴Raniyu asu Sisas ai Gariri hifambe hihirifi hu tüküfiyuwane Yifafi Aboedindi nginindi ranai ahandi fiambe mamarindo. Raniyu asu ai ranihü tüküfimboani hoafi ahambo ra muṅguambo hifi ranihü

himborimayei. ¹⁵Raniyu ai muṅguambo si aho ra Suda-yafe rotu wori ranambe aboedi hoafi yamundi-mareandūra asu nindou ranai ahambo aiana nindou aboed-ani masei.

Nasaretiḥündi ai Sisasindi hoafi himborimbo moei masei

(Matyu 13:53-58; Mak 6:1-6)

¹⁶Raniyu asu Sisas ai Nasaret ṅgoafina ai nūngu adūkarimayu raniḥū mahu. Raniyu asu moani nimarimbo si tūkūfeyoambe sapo koadürü refe arandi süngumbo ai Suda-yafe rotu wori-mayo ranambe mahüfu. Ai hüfu wori ranambe nūngumbo Godindi hoafi bukambe hoeireandühi wataporimbo-marandi. ¹⁷Raniyomo Godindi hoafi hoafiyu-randeimbi Aisaia ahandi-mayo buk ra masabudo. Raniyu ai buk momondifimbimayo ra fufurihai hoeireandane hoafi ranambe mapeniṅgo ranai yare hoafiyowohü yahoya,

¹⁸ ‘Yifiafi Adūkarindi-mayo wandi fiambe amarondiri.

Aboedi hoafi nindou moaruwai ranaheimbo bokarihefendürimbo hündambo

ai wandi mbirowami weri kafaoreandühi dibonimayundiri.

Ai wambo koamarihendiri ra ro aheimbo hoafi ra refe

bokarihefehüya,

Nindou karabusambe nimboeimbi ana, karabusi ra hiniṅgindihi hehi ṅgeimboyei.

Nindou didiyei ai himboari tiharindeihi ana, asu ai asūkai himboari birindihehi himboari-ndeimboyei.

Nindou moaruwai hamindi tiṅirifoaye

ai kikife fufuri-hefeyoani aboedambo-ndahimboyei.

¹⁹ Asu sapo Adūkari ai ahandi nendi ranaheimbo aboedi

hohoanimoyundiri ana,

rani himbani si ra ndeara tūkūfeihane yaho wataporimboyo

wakifembohünda koamarihendir-anahi nda,’ *Aisaia 61:1-2*

meho.

²⁰Raniyu asu ai nindou wori ra hifandandeimbi bogori ranahambo buki-mayo ra momonde mbura hihire sagado haya piyu mamaru. Raniyei asu muṅguambo nindou Suda-yafe rotu wori ranambe mamarei ranai moani ahambo sowanambo yaṅgiri himboari maminambo-marihori. ²¹ Ai hoafiyundürühi yahundürüya, “Bukambe ndani bidifiri hoafi ra haponda moani anihondü hondü tūkūmefeyo ra sapo se ranahambo wataporimbo-mayowa himboriyeimboanei,” mehundüri. ²² Muṅguambo nindou ai ahambo nindou aboed-ani sei hoafiyeihi ahandi yahamo hoafi aboedi tūkūmefeyo ranahambo ṅgusüfo afindi hohoanimomayei. Raniyei asu ai rarihi hoafiyeihi seiya, “Awi nindou ndanana Sosepindi nimor-ani, ṅga nimboe ai ndahurai hoafayu?” sei hoafimayei.

²³ Sisas ai aheimbo hoafiyundürühi yahuya, “Ro anihondümboanahi hoafayahi, ndani hoafi nda se wambo randihi hoafindeihi animboya, ‘Dokta se sihafihoari anğüni ra aboedindowandi,’ mbisei. Ranimbo se wambo hohoanimondeihi animboya, ‘Se sapo ro himboriyefani Kaperneam ngoafihü ramarowandi nou asu haponda sihafi hifi hondühi amboani yarosi,’ mbiseimboyei,” mehu. ²⁴ Sisas ai asükaiyu ranifihü türe haya hoafiyuhi yahuya, “Ro anihondümboanahi hoafehandüri, Godindi hoafi hoafiyu-randeimbi ai ahandi ngoafi hondühündi ranaheimbo hoafayu ana, ngiri ai ahandi hoafi ra himborindei. ²⁵ Ro nda anihondümboanahi hoafehandüri, Horombo Eraisa nunguambe, Israer hifambe nimorehi bidifiri kai ra burimaye. Rani-simboani ana ngimi himbaniyo hayambo asu 6 amoamoyo hoekoate-mayo. Raniyo asu hifi ranihü munguambo wembo afindi tüküme feyo. ²⁶ Ramefeyoa God ai moai Erasambo Israer ngoafihü nimorehi kai mamimbo-so amboani koariheiri, nga wani. Nga ai ahambo nimorehi kai mami Saidon hifambe Sarefat ngoafihü maningo ranahambo sowanamboyu koamariherü. ²⁷ Rani-simboani Godindi hoafi hoafiyu-randeimbi Eraisa ai Israer ngoafihü nunguambe ana nindou afindi ranai munguambo masimeimbiyei hehi afindi tinjirifo masahümündi. Nga Siriahündi nindou ahandi ndüri Neman ai yangiriyo aboedimayo, nga Israer nindou-yopoani,” mehuamboyei. ²⁸ Asu nindou Suda-yafe rotu wori ranambe mamarei ranai rani hoafi ra himboriyei hehi nginindi hohoanimbo ranai ahei ngusüfoambe tüküme feyondüri. ²⁹ Raniyei ai botiyahindühi nimboeimbo ngoafambehindi Sisasimbo kiahö hürihorimindei wafuani nimoamo ahei ngoafi nanğoani mahahüsi. Ai ramarihori ra ahambo ndirifani semündü safoefimbo sei hehimboyei. ³⁰ Nga asu Sisas ai nindou afindi-maye ranahi mbusümo hu haya ahandi nafi-sungu ndamefiyu.

Sisas ai nindou mamindi fiambehindi moaruwai nendi hemafoareandi
(Mak 1:21-28)

³¹ Raniyu Sisas ai Gariri hifambe Kaperneam ngoafi anango raninambo mahu. Ai hu ranihü nimorehi nindowenihi ranaheimbo moani nimarimbo si rani-simboani aboedi hoafi yamundimarearü. ³² Munguambo nindou ranai ahandi yamundife hoafi ra ai sapo nginindeimbi nindou nahurai waporimbo-maranda himboriyeihehi ranahambo mahepühindi.

³³⁻³⁴ Suda-yafe rotu wori-mayo ranambe nindou mami moaruwai nendi ahandi fiambe nimarindoweimbiyu haya mamaru. Raniyu ai puküna hei karihoei hoafiyuhi yahuya, “E! Sisas Nasaretihöndi, se yihoefombo nungufemunimbo safomboyafi nda masihüfa? Se ndanihü tüküme foandi nda yihoefombo moaruwaimbo-femunimbo safomboyafi? Ro sihambo nda fifiriheananimboanahi. Seana Godindi sürühoeimbi hoafi hoafiyafi randeimbi nindou-anafi!” mehoamboyu. ³⁵ Asu Sisas ai nginindi

hoafiyundowohü yahuya, “Se hoafi kikirandifi hawa nindou ranahandi fiambeahindi kosifoao!” mehundowamboyo. Raniyo asu nindou-mayu ranahambo nindouyei wagabe wakifoareri siheri haya nindou ranahambo moaruwaimbofi-koate fiambeahindi hifoai peyo haya ndamefeyo.

³⁶Nindou ranai ranahambo hepünahi simbori hoafiyahindühi seiya, “Nine-moatükuni hoafi moani yahurai rana? Moani rani-poanimbo nginindi hamindi hoafinamboyo nindou ndanai moaruwai nendi ranahambo hoafi masagadowa asu ai nindou fiambeahindi akosifoendi!” masei. ³⁷Raniyo asu Sisas ai rani-moatükuni ramareandi hoafi ranai rani hifi munjo ranambe tükümefeyoa himbori-marihümündi.

Sisas ai Pitandi yamongoamindambo aboedimareandi

(Matyu 8:14-15; Mak 1:29-31)

³⁸Sisas ai ranihü Suda-yafe rotu wori ra hiniñire haya Saimonindi worina mahu. Raniyo asu Saimonindi yamongoa-mindi ranai angünimboyowohü hüfü afindi hamindi pare haya mamarowamboyo, asu nindou ranai Sisasimbo nimorehi ranahambohünda wataporimbo-marihori. ³⁹Raniyo asu Sisas ai hu ahandi fikimi botifi nungumbo hüfü afindi ranahambo nimorehi ra hiniñgiro hawa kosifoao yahuhaya hoafimayu. Raniyo hüfü afindi ranai ahambo hiniñire haya makosifoenda, asu nimorehi ranai moani mamihari botife aheimbo sesi kanimareandüri.

Sisas ai nindou afindi aboedimareandüri

(Matyu 8:16-17; Mak 1:32-34)

⁴⁰Hüfihamindi hürimindoani nimbambe nindou bidifiri ranai ahei ngunindi angüni moaruwai hamindeimbi ranaheimbo sahümündihündüri Sisas sowana mafandihindi. Sisas ai nindou angünimboyeimbi munjoambo mamami ranaheimbo aheiwami wari nandeandürühi munjoambo didiboado-mareandüri. ⁴¹Moaruwai nendi ranai nindou afindi ranahei fiambeahindi kosifoehindühi hasiheiyehi seiya, “Seana Godindi Nimor-anafi!” masei. Sisas ai moaruwai nendi ranaheimbo hoafikoate yafadühami tapimbiyeia yahuhaya hoafimayundüri sapo ai Krais-ani sei fifirimariorambo.

Sisas ai ngorü ngoafini hoahoangu wakimareandi.

(Mak 1:35-39)

⁴²Siambe hondü Sisas ai ngoafi ra hiniñire haya nindoukoate reandühi mahu. Raniyei asu nindou ranai ahambo kokomarihori. Ai kokorihori hoeirihorühiyei ahambo ngumbui sei hehi kikihisafi-mariorimindei. ⁴³Ngga asu ai aheimbo hoafiyundürühi yahuya “God ai nginindi hifandarandi ranahambo aboedi hoafi ra bidifiri ngoafi ranihü

amboani bokarihefembo samboanahi. Sapo ro rani-moatükuni refembo ranimboyu God ai wambo koamarihendiri nda,” mehündüri. ⁴⁴Raniyu asu ai muṅguambo Suda-yafe rotu wori rani hifambe afeburo ranambe huhurandühi rani hoafi ra bokamarihendi.

**Sisas ai ahambo süngrurü-rundeimbi ṅgimi weṅgurühi
masepurümündu**

(Matyu 4:18-22; Mak 1:16-20)

5 ¹Mamimbo Sisas ai Genesaret kurihoe-mayo rani gudikimi nūṅguane, asu nindou afindi ranai ahandi fikimi Godindi hoafi hoafiyowani himborimbo simbori ninendüriyeihi burimayei. ²Raniyu ai hoeireanda bot yimbu ra hürüpündimo gudiani masihoupiri. Nindou kini batüru-rundeimbi ranai bot ra raru sihoupiri houmbo andüri popoairundühi manṅgomo. ³Raniyu asu Sisas ai bot yimbu mengorafe ra ṅgorü Saimonindi-mayo ranambe kefuai haya ahambo gudianipoedi akidou hoe safana ninendifembohünda hoafimayundo. Sisas ai bot ranambe nimarümbo Godindi hoafi yamundimarearü.

⁴Wataporimbo ra kikamündühi nūṅgumbo Saimonimbo hoafiyundühi yahuya, “Bot ra asükai akidou hohoeanambo safi ninendo hafühi animbo asu se sihafi ṅgorü afindi yimbu rani-babidimbo sihamundi andüri ra kini wakemindimbohünda foandu gadimo,” mehundo. ⁵Saimon ai Sisasimbo simbori hoafiyundühi yahuya, “Adükari ro nimbi gebuai maho ra hüti-hütiyefimboyefane moai akidou-amboani wakirihumindexi. Ṽga asu se rawasafi ana, ro andüri nda himoni foandihe gadimboyahi,” mehundo. ⁶Ai andüri ra foarine hanifanimbo kini afindi safi andürambe piyeihi andüri ranai biremindi pimbo yaṅgirimayo. ⁷Raniyomo asu ai ahamundi bidifiri wandafi mami ṅgorü botambe mamarimo ranahamumbo warikakimemo yihoefombo sinimo farihaumuni yahomombo. Raniyomo asu ai sifomo bot yimbu ra wambürühirupiri hafomombo bot ranai tükürini pirineandühi himoni tiporikofembo yaṅgirimayo.

⁸Saimon Pita ai rani-moatükuni ramefeyo ra hoeire haya Sisasindi haṅgifoani yirü yimbu pusire nimarümbo hoafiyuhi yahuya, “Adükari, se andai ragu ṅgafi, ṅga wandi fikimi ṅṅgopoani. Ṽga roana moaruwai hohoanimoyaheimbi nindou-anahi!” mehundo. ⁹Saimon aiyu asu nindou bidifiri ai-babidimbo manṅgomo ranaiyomo muṅguambo kini afindi yahurai wakimaründümo ranimbo hoeirunda mayoa mahepünafundi. ¹⁰Saimonindi ṅgorü afindi yimbu Sems Son Sebedindi nimori ai-amboani marine mahepünafineandi. Raniyu Sisas ai Saimonimbo hoafiyundühi yahuya, “Se yihimbo-ndamboyafi, hapondahünda ana sapo se kini afindi andürambeahi pirifimarandi yahurai animbo nindou-amboani se ndowandifi wambo sowana didimboyafi,” mehu. ¹¹Raniyomo ai bot ra

gudiani kiafu hürüpündimo sihaupiri houmbo muṅguambo moatükuni ra ranihü raru kokosifoaru sihoemo houmbo Sisasindi süngumefundi.

Sisas ai nindou mami mimaniho masimeimbi aboedimariri
(*Matyu 8:1-4; Mak 1:40-45*)

¹²Asu Sisas ai adükari ṅgoafihü nimarwane, rani ṅgoafihü nindou mami mimaniho masimeimbi tiṅirifomboyuhü mamaru. Ai Sisasimbo hoeiriri haya ahandi fikimi yimindoho yimbu pusire hifini mbiro türe nimarumbo hüti hoafirürühi yahuya, “Adükari, se refembo hohoanimondafühi ana, se wambo didiboado-ndowandira aboedindamboane!” mehundo. ¹³Raniyu asu Sisas ai warifi sündirühi yahuya, “Ro refembo samboanahi, ṅga se aboedi tüküyafo,” mehundo. Raniyo asu nindou ranahambo masimeirani mamihari hoafi niṅgoambe hiniṅgimareri. ¹⁴Raniyu asu Sisas ai nindou-mayu ranahambo hoafiyundühi yahuya, “Nindou amurambo hoafindamboyafi, ṅga se moani ṅgafi Godimbo sesi sihai-randeimbi-mayu ranahambo animbo sihafi fi ra nafuindafi. Rananimbo Mosesindi hoafi hoafimayo süngu Godimbo sesi sihai-randeimbi ai sihambohünda sesi mbisihendamboane. Rananimbo asu masimeirani aboedayo ra nindou amuri ranai fifirimbirihi-ndamboane,” mehundo. ¹⁵Ṽga asu Sisas ai rani-moatükuni yare arandi hoafi ranai afindi hamindi yaṅgori wakimareandi. Raniyei nimorehi nindowenihi afindi ranai ahandi hoafi himborimbo asu ahei fiambe aṅgüni ra aboedifembohünda ahambo sowana masinei. ¹⁶Ṽga afindimbo Sisas ai nindou kikefoefekoate-reandühi Godimbo didibafifembo aimbo huhani.

Sisas ai nindou mami yiriwari moaruwaimbü aboedimariri
(*Matyu 9:1-8; Mak 2:1-12*)

¹⁷Mamimbo Sisas ai nimorehi nindowenihi ranaheimbo yamundeandürühi nimarwane, asu ranihü Farisi nindou-yomo Suda-yafe ahinümbi hohoanimo yamundu-rundeimbi-yomo ranai mamarimo. Bidifiri ai muṅguambo ṅgoafi Gariri hifambe adaburo ranambeahindi, bidifiri ai Sudiahünda asu bidifiri Serusarem ṅgoafihünda raniyomo ranihü mamarimo. Raniyo asu nindoweyi fiambe aṅgüni moaruwai amarondüri ra aboedifembohünda Adükarindi ṅginindi ranai Sisasindi fiambe mamaro. ¹⁸Nindou bidifiri ai nindou mami yiriwari moaruwaimbü Sisasindi haṅgifoani safoefimbo yahomo houmbo safisendiwami nandu sowaründümo mahomo. ¹⁹Asu nimorehi nindowenihi afindi ranai gümarihi-ndamboemo ai ahambo semündü hifombo nafi ra hoeifekoate-yomondühiyomo, asu ahambo woriwami sowaründümo mahafomo. Raniyomo ai woteimi fifahirihoemo mburu rani nafi nindou-mayu ra safisendi-mayo rani kameihi nindou-mayei

ranahei mbusümo Sisasindi wagabe masafoarüwuri. ²⁰Sisas ai ahamundi anihondümböfo hohoanimö ranahambo ndare hoeireapurani mayoa, nindou-mayu ranahambo hoafiyundühi yahuya, “Wandafi, sihafi moaruwai hohoanimö ranahambo amboawi samboanahi,” mehundo.

²¹Suda-yafe ahinümbi hohoanimö yamundu-rundeimbi-yomo asu Farisi nindou-yomo ai ahamundihoari simbori hoafindurü-yafundühi yahomoya, “Nindou nda nini nindouyu God nahurai hoafiyuhi raninambo ahambo tirafoariri ndana? God yanggiri animbo moaruwai hohoanimö ranahambo amboawi mbüsümbuisi!” mehomo. ²²Sisas ai ahamundi hohoanimö amaropuri ranahambo fifire haya ahamumbo hoafiyupurühi yahuya, “Se ra nimboemo yahurai raru hohoanimöemo rana? ²³Ro hoafiyahühiya ‘Sihafi moaruwai hohoanimö ranahambo amboawi’ asahiyo asu ‘Botiyafo hawa hafi’ asahiyo, yimbu ra hoafimbo ro nginindeimb-anahi. Asu yimbu hoafi ra hoafimbo nahaniyo hiniñgirouayo asu nahaniyo tinjumbayo? Yibobo ra ro hoafindahani anihondümbö tükündifemboe. ²⁴Se Nindou Hondü ro nginindi masahamindihi moaruwai hohoanimö amboawi yaho hoafimbohünda ranahambo sihamumbo nafuimbo ro nindou nda aboedindihinimboyahi,” mehu. Raniyu asu ai nindou yiriwari moaruwaimbü-mayu ranahambo hoafiyundühi yahuya, “Haponda ro sihambo hoafehanini, botiyafo sihafi safisendi ra sowandifi hawa ngoafinambo ngafi,” mehundo. ²⁵Hoafi niñgoambe muñguambo nindou-mayei ranahei wagabe botifi ahandi safisendi ra semündü haya Godimbo aboedi hamind-ani yahuhü ngoafina mahu. ²⁶Raniyei asu muñguambo nindou ranai muñguna yahurai afindi hamindi mahepünehindi! Ai rani-moatükunimbo ngusüfo kibodiri-foarihindühi Godimbo aboed-ani seihüya, “Rani-poanimbo moatükuni haponda hoeimarihundi,” masei.

Sisas ai Rifaimbo ahambo süngufimbo mborai mehundo
(Matyu 9:9-13; Mak 2:13-17)

²⁷Rani-moatükuni ai refe hayamboyoane ranambe Sisas ai hu hoeirirane nindou mami ahandi ndüri Rifai takis kaki semündü-randeimbi ai ahandi ratüpuri worambe mamaru. Sisas ai ahambo hoafiyundühi yahuya, “Se wandi süngu mborai,” mehundowamboyu. ²⁸Asu Rifai ai botifi haya muñguambo moatükuni yare kokosifoare haya Sisasindi süngu ndamefiyu.

²⁹Raniyu asu Rifai ai ahandi worambe Sisasimbo sesi afindi sindimarandi. Raniyomo asu nindou takis kaki sowandümo-rundeimbi-yomo asu nindou amuri raniyomo ai sesi ra ai-babidimbo nimarimo masowasümo. ³⁰Raniyomo Farisi bidifiri rani rotu-ambeahindi-memo-yomo asu ahinümbi hohoanimö yamundu-ndeimbi bidifiri-yomo ranai Sisasindi süngururü-rundeimbi-memo ranahamumbo momori hoafiyomopurühi düdurüpurühi yahomoya, “Se ra

nimboemo takis kaki sowandümo rundeimb-anemo asu nindou amuri moaruwai hohoanimoyomo-rundeimb-anemo rani-babidimbo sesi sowasümo hoe simindimo arunda?” mehomopuri. ³¹ Sisas ai ahamumbo hihire hoafiyupurihi yahupuriya, “Nindou angünikoate ana, moai dokta sowana hei rihündi, nga angüneimb-anei hei arihündi. ³² Ro tükümeheandi nda nindou aheihoarimboya ro mbumundi nindou-anefti sei arihündi ranaheimbo awi se moaruwai hohoanimo hiniñgirihindühi aboedi hohoanimoyei sahehea tüküyaheambo yahipoani, nga wani. Iñga ro moaruwai hohoanimoyeimbi nindou ai aboedi hohoanimo süngumbeyahindi sahehea tükümeheandane,” mehupuri.

Sisas ai sesi wehi niñgombo hoafi yamundimareandi
(*Matyu 9:14-17; Mak 2:18-22*)

³³ Raniyei asu nindou bidifiri ai Sisasimbo hoafiyeihi seiya, “Nindou bidifiri Sonimbo süngurü-rundeimbi ana afindimbo sesi wehi niñgomombo Godimbo yangiri didibafi-yomondühanemo. Asu nindou Farisi-yomondi hohoanimo süngurundeimbi-ranai-amboani maru rani sünguru arundi, nga sihambo süngurunini-rundeimbi aiana sesi sowasümo hoe simindimo rundühanemo?” maseiamboyu. ³⁴ Asu Sisas ai aheimbo hoafiyundürühi yahundüriya, “Asu se ra nindou mami ai nimorehi semindimbo yahuanani rani-simboani sesi afindi raraorihindühi ngunindi afandihindi ranaheimbo sesi wembopo ndahümündihündüri mamandiyo sapo nindou nimorehi semindimbo-mayu ranai ai-babidimbo nimanduanani? I, ra wani. ³⁵ Iñga süngunambo nimorehi semindimbo nindou ranahambo ndowarindümo gorügoanini ngomondani rani-simboani animbo ai sesi wehindeimboyei,” mehu.

³⁶ Asükaiyu Sisas ai aheimbo ngorü kafeefe hoafi hoafiyundürühi yahundüriya, “Nindou mami ai-amboani moai hoeari simborindambo buramündi haya asu ngisihari hoeari wamindafi ambe aniñgo ranifihini pare haya kakiyu randi, nga wani. Ai rawareandi ana, hoeari simbori-mayo ranai bundeandani asu simbori hoeari ranai ngiri wamindafi hoeari-mayo ranifihini simongorindamindo. ³⁷ Asu nindou ngorü ai wain boboe simbori ra sapo wamindafi ninihondi hoeari hipiri wain keferandeimbi-mayo ranambe karareandi ana, simbori wain ranai wamindafi wain hipiri ra borindeandühi wain ranai hifini keboendühi wamindafi hipiri-mayo ra moaruwaindimboe. ³⁸ Iñga simbori wain boboe ranana sapo simbori ninihondi hoeari hipiri-mayo ranambe animbo kefemboane! ³⁹ Nindou ai wamindafi wain ra sümündi hayambo ana, ai ngiri simbori simindimbo yifirindu. Ai hoafiyuhiya, “Wamindafi wain-ane aboedayo,” mbüsümbui,” mehündüri.

Moani ngoafimbo nimari sihi Sisas ai wit nümbürambe mahu
(*Matyu 12:1-8; Mak 2:23-28*)

6 ¹ Moani ngoafimbo nimarimbo sihi Sisas ai wit nümbürambe mahu. Raniyo asu ahambo süngurü-rundeimbi ai wit hisi ra warihü hüründümo mburu

wari dūdūhūru hīpiri ra horimarihoayowa safi yangiri masowasūmo. ²Raniyomo asu Farisi nindou bidifiri ai dūduyafundūhiya, “Se nimboe rani-moatūkuni ra rawarundi rana? Yihoefi ahinūmbi hohoanimo ranai yahoya moani ŋgoafimbo nimarimbo sihi rani-moatūkuni refepoani meho,” mehomondamboyu. ³Asu simbori Sisas ai hoafiyupurūhi yahuya, “Awi se moai bukambe hoerundiyo sapo Defit ai ahandi nendi bidifiri-babidimbo wembomboyuhū ramareandi hoafi rana? ⁴Sapo ai Godindi worambe kefuai hūfu Godimbo sihefeimbihūndi bret meŋgoro ra semūdū sesūhi asu ahandi nendi bidifiri-memo ranahamumbo amboani masagapuri. Yihoefi ahinūmbi hohoanimo sūŋgu amboani nindou amuri ai ŋgiri refimbihūndi bret ra dagūdi, ŋga moani Godimbo sesi sihou-rundeimbi yangiri animbo bret ra dowadūmboemo,” mehupuri. ⁵Asu Sisas ai hoafi moendireandūhi hoafiyuhi yahuya, “Nindou Hondū ranai ana moani ŋgoafimbo nimarimbo sihi ra ai nimindani,” mehu.

Sisas nindou wari moaruwaimbū aboedimariri

(Matyu 12:9-14; Mak 3:1-6)

⁶Ŋgorū moani ŋgoafimbo nimari sihi Sisas ai Suda-yafe rotu worambe kefuai hūfu nimorehi nindowenihimbo yamundi-mareandūri. Ranihi nindou mami warihondū wari ahandi ranai moaŋgorifoarereri haya mamaru. ⁷Sudayomondi ahinūmbi hohoanimo yamundu-rundeimbi bidifiriyomo asu Farisi nindou-yomo ai nini nafisūngundihuri Sisasimbo papi-hoafindihuri yahomo houmbo mamarimo. Raniyomo ai moani ahambo himboarinambo yangiri hifandirūrihi mamarimo Sisas ai moani ŋgoafimbo nimarimbo si ranihū nindou aboedireandihūpo yahomo houmbo. ⁸Asu Sisas ai ahamundi hohoanimo ra fifirehayambo-wambo nindou-mayu ranahambo hoafiyundowohū yahuya, “Botiyafu hawa ndūhi wagabe sūhūfi,” mehundo. Raniyu asu nindou-mayu ranai botifi hūfu wagabe manūŋgu.

⁹Ramefi-yuwamboyu Sisas ai ahamumbo hoafiyupurūhi yahuya, “Ro sihamumbo dūduweheandi: nini-moatūkuniombo sihefi ahinūmbi hohoanimo ranai yowani moani nimarimbo sihi refepoani mehoa? Farihefemboyo asu moaruwaimbo-femboyo? Nindou mamindi yangiri niŋgombo ra didiboadofemboyo asu yembūfemboyo?” mehu. ¹⁰Ai ahamumbo mūŋguambo tūrapurani mayowamboyu asu nindou-mayu ranahambo hoafiyundowohū yahuya, “Sihaŋi wari ra ŋgurihoeŋi,” mehundo. Ai rani-sūngumareanda, asu ahandi wari ranai asūkaioyo aboedimayo. ¹¹Asu nindou-memo ranai ŋgusūfoambe moaruwairapurūhi Sisasimbo nūŋgundihuri yahomo houmbo ahamundihoari wataporimbomarundi.

Sisas ai ahandi hoafi semindi horambo nindou 12 masepurimūndu

(Matyu 10:1-4; Mak 3:13-19)

¹²Mami rani-simboani Sisas ai hifi wafuana Godimbo didibafifembo mahafu. Ai nimbokoani Godimbo didibafiyo hombo

sürüfoefembohünda. ¹³Raniyo asu simayoambo ai ahambo sünggurü-rundeimbi-memo ranahamumbo mborai yahupuri hürihepuri haya asu 12 nindou sepurimündühi ahamundi ndüri hoafi sowandümo homo-rundeimb-anemo yahu kamafoareapuri. ¹⁴Saimonimboyu Pitamboyu-randeimbi-mayu, asu ahandi akidi Andruyu, Sems, Son, Firip, Bartoromyu, ¹⁵Matyu, Tomas, Sems Arfusindi nimori, asu Saimon Serotihündi raniyomo.^a ¹⁶Sudas Semsindi nimori asu Sudas Iskariot, sapo Sisasimbo hürütümbi nendi-yomondi warihüreimbi-mayu raniyu.

Sisas ai angünümboyeimbi aboedimareandüri

(Matyu 4:24-25; Mak 3:7-12)

¹⁷Sisas ai hifi wafu waminindi ahandi hoafi sowandümo homo-rundeimbi-memo rani-babidi hanimo houmboemo asu nindou bidifiri afindi ahambo sünggurü-rundeimbi rani-babidi ndümündühi maningomo. Raniyei nindou afindi ra Sudia hifihündi, Serusaremhündi, Tair asu Saidoni-yafe hifihü siriwara gudikimi ngoafi adaburo ranihündambo ai-amboani ranihü burimaye. ¹⁸Asu ai ranihü tükümehindi ra ahandi hoafi himboriyo asu ahei angüni ra aboedimbireandambo sei hehimboyei. Asu didiyei moaruwai nendi nimarindürimbo tiñirifo sahümündeimbi ai-amboani tükümehinda aboedimareandüri. ¹⁹Muñguambo nindou ranai ahambo sindihori marihündi ra sapo ahandi fiambeahindi nginindi ranai kosifoendühi aheimbo aboedireiri marandamboyei. Raniyo Sisas ai muñguambo nindou aboedimareandüri.

Hihifi hihifi asu tiñirifo tükündifemboe hoafi

(Matyu 5:1-12)

²⁰Sisas ai ahambo sünggurü-rundeimbi-memo ranahamumbo himboari pareapuri nüngumbo hoafiyupurühi yahuya,

“Se didemo napokoate-ayomo seana hihifi-hihifi-mbemondamboane, nga haponda God nginindi hifandarandi ra sihamund-ane.

²¹Se didemo haponda wembomboemo seana

hihifi-hihifi-mbemondamboane,

nga seana bodoweimbi niñgomboemo!

Se didemo haponda arani-aranemo seana

hihifi-hihifi-mbemondamboane,

nga seana tikifinambo niñgomboemo!

²²Didemo sihamumboya Nindou Hondumbo sünggurü-rundeimb-anemo mbiseihi

asu rani süngumbo sihamumbo yiñoarukorhipuri,

^a 6:15 Serot ai Suda-yafe amao-yomondi hohoanimo yangiri süngufembo hohoanimo-memo. Ai Israer Romi-yomondi gafman hoarehi niñgombo moei mehomo.

nginindi hoafiyahüpuri asu seana moaruwai-anemo sei hoafayei
ana,
se hihifi-hihifindimo.

²³ Rani-moatükuni ra rawefeyo ana, se hohoripi-hohoripi-ndimondühi
hihifi-hihifindimo nimboe sapo sihamundi takini afindi sünambe
begoripuri. Nimboe sapo ahei amoa mami amboani Godindi hoafi
hoafiyomo-rundeimbi ahamumbo rani-moatükuni ramarihindi.

²⁴ Se didiyei haponda napo afindeimbaye, seana
hipoanimboembou-anei!

Sapo seana hapo yangiri animbo tijirifokoate-fi handihi
nimboeimboyei.

²⁵ Se didiyei haponda bodoweimbaye, seana hipoanimboembou-anei!
nimboe seana sapo wembombondeimboyei!

Se didiyei haponda tikifi-hoafinambo amarei, seana
hipoanimbembou anei!

Nimboe sapo seana arani-aranindeimboyei!

²⁶ Nindou ai siheimbo haponda aboed-anei sei hoafiyei arihündi, seana
hipoanimboembou-anei!

Nimboe ahei amoa mami amboani Godindi hoafi tikai
hoafiyomo-rundeimbi-memo ranahamumbo amboani yahurai
rasei marihündane,” mehu.

Sihei hürütümbi ranaheimbo ngusüfo pandihindüri

(Matyu 5:38-48; 7:12a)

²⁷ Sisas ai hoafiyuhi yahuya, “Se didiyei wandi hoafi himboriyei
arihündi siheimbo ro hoafayahi: Nindou didiyei sihei hürütümbaye
ranaheimbo se hipoambo-ndihindüri. Nindou didiyei siheimbo yiboaruko-
arihündüri ranaheimbo se ngusüfo pandihindürühi hipoambo-ndihindüri.

²⁸ Nindou didiyei siheimbo hoafinambo moaruwaimbo-arihindüri
ranaheimbo se God ai aboedi-aboedimbirea-ndüramboane mbisei. Asu
nindou didiyei siheimbo wudipoapofe-ndürikoate-aye ranaheimbohünda
se Godimbo didibafindei. ²⁹ Asu sihambo nindou ngorü ai mami

koaihoani harinduani asukai ngorü koaiho amboani hihirindowandani
ranifihi harimbiyuwamboane. Asu nindou ngorü ai sihafi ngisihari
hoeari ndemünduani ana, asukai sihafi siot ngorü-amboani

mbisemündu-wamboane. ³⁰ Nindou didiyei sihambo nini-moatükunimbo
düdundahindani ranaheimbo munquambo dabadüri. Asu nindou ngorü
ai sihafi nini-moatükuni napo ndemünduani asukai hihirife semindimbo
hoafipoani. ³¹ Asu se nindou bidifirambo ai wambo rani-moatükuni
rambirihindi asafi ra se aheimbo rani-süngundowandi.

³² Se nindou siheimbo hohoanimoyei-rihündeimbi rani nindoumbo
yangiri se hohoanimoyei ana, ngiri rani süngu siheimbo aboed-

anei mbisei. Nindou moaruwai hohoanimoyei-rihündeimbi amboani nindou didiyei aheimbo hohoanimoyei-rihündeimbi aheimbo yanggiri hohoanimorihündüri rihündühanei! ³³Asu se nindou siheimbo didiboado-rihindüri arihündi ranaheimbo yanggiri se didiboado-arihindüri ana, asu nggiri rani-sünggu aheimbo aboed-anei mbisei. Nindou moaruwai hohoanimoyei rihündeimbi amboani rani sünggürühi hündühanei! ³⁴Asu se nindou didiyei ranaheimbo nini-moatükuni ndahundürü mbundihumbo hihirindihu ndahumindefi sei hehi hohoanimoyeihi aheimbo yanggiri sahündüri arihündi ranimbo nggiri siheimbo aboed-anei mbisei. Nindou moaruwai hohoanimoyei-rihündeimbi amboani nindou bidifiri moaruwai hohoanimoyei-rihündeimbi ranaheimbo sahündüri rihündühanei, ra aheimbo masehindi nahurai hihirife semindimbohünda! ³⁵Yowani, nga se nindou didiyei siheimbo hürütüri-hündüri-rihündeimbimbo hipoambondihindüri. Asukai nini-moatükuni nindoumba sai mburimbo se yowani bidifiri moatükuni hihirife semindimbo hohoanimoyoponi. Rananimbo se takini afindi ndahümündi mbundihü asu God Nimoamo Hamindi ranahandi nimorindamboyafi. Nimboe aiana nindou didiyei hihifiyo-rakoate asu moaruwai hohoanimoyei-rihündeimbi ranaheimbo aboediyuhani. ³⁶Se hipoambondo ndandi sihafü ape ai-amboani hipoambore arandi nou.”

Nindou nggoründi ningo ra türüfoefeihü papi-hoafipoani
(Matyu 7:1-5)

³⁷“Se yowani nindou nggoründi ningo ra türüfoefeihü papi-hoafipoani. Asu rananimbo nggiri God ai sihei ningo ra türündandürühi papi-hoafindandüri. Se yowani nindou nggoründi ningo ra yibobofeihü moaruwai-ane yaho hoafiyopon. Asu rananimbo nggiri God ai sihafü ningo ra yibobondeandühi moaruwai-ane mbüsu. Se nindou bidifiriyei moaruwai hohoanimo ranahambo amboawi asei-animbo God ai-amboani sihei moaruwai hohoanimo ranahambo amboawi mbüsümbui. ³⁸Se nindou bidifirambo asahündüri animbo asu God ai siheimbo dagadürimbui. Refe süngu ana se afindi hamindi animbo ndahümimdeimboyei. Sapo se anihondümbo nindou farahehindi rani simogodühi animbo sihei warambe babiboai pitapindimboe. Se nini simogodühiyo nindou bidifirambo farihehindi süngu-animbo God ai siheimbo rani simogodühi randeandürimbui,” mehu.

³⁹Asu Sisas ai ahamumbo kafoefe hoafi nda hoafimepuri: “Nindou mami himboatihari ai nggiri nindou nggorü himboatihari-mayu ranahambo nderümündi haya nafi nafuindu ngu. Asu ai rawareandi ana, yiboboambo hoe apoarambe pindamboyafani. ⁴⁰Yamundife nimori ai ahambo yamundiri-randeimbi-mayu ahandi nimoamoyupoani, nga muṅguambo yamundife nimori ahei yamundife ratüpuri ra muṅgundoani ana, asu aheimbo yamundu-rundeimbi-memo nahuraimdeimboyei.

⁴¹Asu se nimboe nindou ŋgoründi himboarambe düdübudi akidou afoeru ranahambo yangiri himboapoyafühi asu sihafi himboarambeahi nimoko bidifiri afoero ranahambo hoeifekoate-a? ⁴²Nüngundo nindou ŋgorümbo hoafindafühiya, ‘Wandafi, awi sihafi himboarambeahi düdübudi akidou afoeru ra hündihehini samboanahi,’ mambisafi sihafi himboarambeahi nimoko bidifiri afoero ra sihafihoari hoeifekoate-a? Seana yimbu yafambeimbi nindou-anafi! Weaŋgurühi se boatei-animbo sihafi himboarambe nimoko bidifiri afoero ra hündühoefi mbundambo-animbo asu nindou ŋgoründi himboarambe düdübudi akidou afoeru ra wudipoapondo hoeindowandühi hündühoefindo,” mehu.

Nimi-ane asu ahandi hisi ranane

(Matyu 7:16-20; 12:33-35)

⁴³Sisas ai hoafiyuhi yahuya, “Nimi mami aboedi hamindi ai ŋgiri hisi moaruwaimbü niŋgo. Asükai nimi mami moaruwai ai-amboani ŋgiri hisi aboedeimbi niŋgo. ⁴⁴Muŋguambo nimi ra ahandi hisayo rani süngu-ane türüfoefihi awi rani nimi-ane eho. Se ŋgiri nimi hisi fik ra tihoari tihoareimbi nimi-fihindi hüründandifi, asu ŋgiri yukui amuri nimi-fihindi hüründandifi. ⁴⁵Nindou aboedi ai ahandi ŋgusüfoambe hohoanimoambeahi aboedi moatükuni arühayo ranane bokarihai arandi, ŋga asu nindou moaruwai ai ahandi ŋgusüfoambe hohoanimoambeahi moaruwai moatükuni arühayo ranane bokarihai arandi. Nimboe sapo nine-moatükuniyo ŋgusüfoambe hohoanimoambeahi amaro ranane asu yafambe ai weindahi hoafiyu arandi,” mehu.

Nindou yimbu worimborini-rinandeimbi

(Matyu 7:24-27)

⁴⁶Sisas ai yahuya, “Asu se nimboe wambo ‘Adükari, Adükariyei rihündühi asu wandi hoafayahi ra süngufekoate-ayeia? ⁴⁷Nindou düdi ai wambo sowahi tüküfi wandi hoafi himboriyu mburambo rani süngulareandi animbo asu ro ai nüngunahurai nindouayu ra siheimbo nafuindamboyahi? ⁴⁸Aiana sapo nindou worimbombo yahuhaya hifambe ndihi ragu kakira hanü mburambo kambohoani nimoeiwami mafemburifiyu nahurai-ani. Hoe ranai afindi hohoumboyohü wori ranahambo hariyo randa moai fifimiyo, nimboe sapo ai wudipoapore worimbora hayambowambo. ⁴⁹Iŋga asu nindou düdi wandi hoafi himboriyu mbura rani süngufekoate-ayu aiana sapo nindou worimbombo yahuhaya kambohoani wudipoapofe feburifekoate-yuwani asu hoe ranai hohoumboyohü wori ranahambo hariyo randani moani mamihari biramindi pirimayo nahurai-ani. Asu biramindi pirimayo ra moani afindi hamindi mamikari pirimayo!” mehu.

Sisas ai ami-yafe bogorindi ratüpuriyu-randeimbi diboadomariri

(Matyu 8:5-13; Son 4:43-54)

7 ¹Sisas ai nimorehi nindowenihi rani hoafi ra hoafiyundüri mbura Kaperneamühi hu tüküme fiyu. ²Nindou mami Romihündi ami-

yafe bogori ranihü manüngu. Raniyu ahandi ratüpurüyu-randeimbi ngusüfohüdi ranai angunümboyuhü yifimbo yanggirimayu. ³Ami-yafe bogori ai Sisas ranihü anüngu hoafi ra himboriyu haya raniyu ai Suda-yafe bogori bidifiri koamarihepura ahambo hoafimbo mahifomo. Ranimbo ahandi ratüpurüyu-randeimbi ra aboedimbirir-amboane yahu haya. ⁴Ai homo Sisas sowahi tüküyafu watiharürühi yahomoya, “Ai nindou aboed-ani, nga se ahambo fandihawori. ⁵Ngga ai Suda yihoefimbo ngusüfohü pareamuni-randeimb-ani. Ngga aiyu yihoefi rotu wori ra worimbomarani,” mehomondamboyu.

⁶Raniyu Sisas ai rani-babidi hu worikimi tüküfiyuani ami-yafe bogori ai ahandi ngunindi Sisasimbo hoafimbo koamari-hepura homo hoafiyomondühi yahomoya, “Adükari, ambe se tinjirifondamboyafi, nga ro nindou aboediyahi animbo wandi worambe madügüfi, nga ro moai munguna wandi worina didifi sahehea hohoanimoyahi. ⁷Ranimboanahi ro aboedi hamindi-yahanimbo sihambo sowana madidihü. Ngga moani se hoafi-yanggiri hoafindafani wandi ratüpurüyu-randeimbi ai aboedimbiyu-wamboane. ⁸Nimboe ro-amboani nindou wandi nimoamo ndüreimbi-memo ranahamundi hoarehanahi, nga asu ami-anemo wandi hoarehemo. Nggorümbo hoafindahühi, ‘Se hafi,’ mbisahani ai hu randühani. Asu nggorümbo hoafindahühi ‘Se sinifi,’ mbisahani ai süni randühani. Asu wandi ratüpurüyu-randeimbimbo hoafindahandowohümbo, ‘Rani-moatükuni raro,’ sahani, ai rareandühani,” mehu. ⁹Asu Sisas ai rani hoafi ra himboriyu haya nindou ranahambo afindi mahepünifiyu. Raniyu hihirifi nimorehi nindowenihi afindi ranaheimbo hoafiyundürühi yahuya, “Ro siheimbo hoafayahi. Ro moai anihondümbofe ndahurai ndühi hoeiriheandi, Israerihündi amboani, nga wani,” mehu. ¹⁰Ngga sapo nindou ami-yafe bogori ai koamarihepuri ranai homo worambe hoeirüwurane asu aboedimayu.

Nimorehi kaindi nimori Sisas ai yifihündi botimariri

¹¹Refe hayamboyoane, asu süngunambo ranambe nimai Sisas ai ngoafi mami ahandi ndüri Nen raninambo botifi mahafu. Ahambo süngururü-rundeimbiyomo asu nimorehi nindowenihi afindimayei raniyei ai mami mahahüsi. ¹²Sisas ai ndeara ngoafi giniri nafitambekimi tüküfiyuane asu ngoafambe-ahindi aranihoafi yasimondi ranai tüküme Feyo. Yifi nimoko ranana sapo nimorehi kai-mayo ranahandi nindowenihi nimori moani mami hamindi-mayu ranaiyu. Raniyo asu nimorehi nindowenihi afindi rani ngoafihündi ranai nimorehi rani-babidimbo mamarei. ¹³Asu Adükari ai nimorehi ranahambo hoeireanda mayoa asu ahambo ngusüfoambe afindi hipoamboreandühi hoafiyundühi yahuya, “Se yowani aranindafindo-mboyafi,” mehundo. ¹⁴Raniyu Sisas ai hu yifi safisendi-mayo ra sündimareanda asu nindou yifi

nimoko masowandümo-memo ranai ngingginiru maningomo. Raniyu Sisas ai hoafiyuhi yahuya, “Nindou hoarifi ro sihambo hoafehanini se haponda botiyafo,” mehundo. ¹⁵Raniyu asu yifiyumbi nindou-mayu ranai botifi nimarumbo wataporimayuyamboyu asu Sisas ai nimori ra ahandi hondandi warihumariri. ¹⁶Raniyo asu nimorehi nindowenihi afindi ranai ngusüfo kikifoarihindühi Godimboya aiana aboed-ani sei hoafiyahündowohü seiya, “Ahandi hoafi hoafiyu-randeimbi adükari hamindi ai yihoefi mbusümo tüküme fiyu! Ai ahandi nendi ranaheimbo aboedambofe-ndürimbo tüküme fiyu-ane!” masei. ¹⁷Sisas ai rani-moatükuni rawareandi hoafi ranai muṅguambo Sudia hifi asu rani hifikimi adaburo ranambe yaṅgori wakimareanda himborimaye.

**Son hundürüra-randeimbi ai ahambo süṅgrurü-rundeimbi yimbu Sisas
sowana koamarihepiri
(Matyu 11:2-19)**

¹⁸Sonimbo süṅgrurü-rundeimbi ai muṅgu moatükuni tüküme fiyo ra ahambo wataporimbomaruri. ¹⁹Raniyu asu Son ai ahambo süṅgrurü-rundeimbi nindou yimbu mborai yahupiri hürühepiri haya Adükariṁbo düdufimbohünda ahambo sowana koamarihepiri. Ahandi Adükariṁbo düdufe hoafi ra yahuraiyo, ‘Nindou nda horombo ro tükündüfimbui masahi raniyafi, asu ṅgorü tükündüfimbui mbisefi hohu himbomandefiyo?’ ²⁰Asu ai Sisasimbo-so tüküyafineandühi hoafiyafinadowohü safaniya, “Son hundürüra-randeimbi ai sihambo refe düdufeninimbo yihoehimbo koamarihemuna masinehi. Se nindou tükündüfimbui mehuyafi, asu ṅgorü tükündüfimbui mbisefi hohu himbomandefiyo,” masafani.

²¹Moani rani-simboani hamindi ranihü Sisas ai nimorehi nindowenihi afindi fi moaruwaimbü, aṅgünümbi, moaruwai nendi nimarumbi ranaheimbo aboedireandüri asu himboatihari afindi ranaheimbo himboari birihendürani asükai himboariyei rarao marihündi. ²²Sisas ai Sonimbo süṅguriniri-rinandeimbi ranahafanimbo simbori hoafiyupirühi yahuya, “Se ṅgafani Sonimbo hoafindafani se nine-moatükuni hoeirine himboriyafani marinandi ra: Rani-moatükuni ra sapo himboatihari ai asükai himboari birihehi himboariyei, tiṅari moaruwaimbi ai botiyahi hei, fi moaruwaimbü, mimaniho masimeimbi ai aboedi popoatapo-foarihi. Himbotühüfo ai asükai hoafi himbori-yei, yifiyeimbi ai yaṅgiri botiyahi asu aboedi hoafi ra nindou napokoate-yeimbi-maye aheimbo wataporimboyu ramarandi ranahambo. ²³Nindou didiyei wambo anihondümo-arihindiri ai-ana hihifi-hihifimbeiyai-amboane!” mehu.

²⁴Sonimbo süṅgurine-rinandeimbi mefani ranai hafandane süṅgunambo Sisas ai Sonimbo nimorehi nindowenihi-maye ranaheimbo hoafiyundürühi yahuya: “Sapo se Son sowana nimiwohi furikoate-

reandühi heihü ra se nini-moatükunimboyei tüküfeyoani hoeifembo sei hehi hohoanimomaye a? Awi se boabodari emündü werinambo mboahuri-hendani ra hoeifemboyei mahei? ²⁵Nini-moatükuni hoeifemboyei se mahei rana? Awi nindou hoeari moani rani-poanimbo aboedi hoeari yihuruyu haya nünguwanu hoeifemboyei mahei? Ra wani. Nindou yahurai hoeari aboedi yihuru-rihümündeimbi ana, adükari bogorindi worambe-ane nimboei arihündi. ²⁶Se wambo ndühi yarihi hoafiyahündiri sapo se nini-moatükuni hoeifemboyei mahei ra? Godindi hoafi hoafiyu-randeimbi nindou ranahambo hoeifimboyei? Yini ra anihond-ane Godindi hoafi hoafiyu-randeimbanisi, nga ro nda siheimbo anihondümboanahi hoafayahandüri. Son aiana Godindi hoafi hoafiyu-randeimbi nindou ranahambo ngasündireimb-ani. ²⁷Son ranahamboyo Godindi Bukambe yare hoafiyowohü yahoya, 'Ro nindou mami wandi hoafi semindi hombohünda koandihelinani, ai boatei se hokoate-yafambe ngumbui sihafi nafi nafirihéfembohünda,' meho," mehu. ²⁸Sisas ai bidifiri hoafi pareandühi hoafiyuhi yahuya, "Son ana nindou moani adükari hamindiyu haya asu ai nindou horombo maningomo ahamumbo ngasündeapureimb-ani. Nga asu nindou düdi ai sapo God nginindi hifandarandi ranambeahindi akidou aiyu aiana Sonimbo ngasündirümboani," mehundüri.

²⁹Munnguambo nindou ai Sonindi hoafi himboriyei hehi asu takis kaki sowandümo-rundeimbi nindou-amboani munnguambo rarihi hoafiyeihi seiya, "Yini, Godindi hohoanimo ranana anihondü hondü mbumundane," masei. Raniyei asu süngunambo ai ahandi warihü hundürümaye.

³⁰Nga Farisi nindou-yomo asu Suda-yomondi ahinümbi hohoanimo yamundu-rundeimbi-yomo ranai ahamundihoari Godindi hohoanimo ra himbori-yowohü süngufembo moei mehomo. Ranimboemo ai moai Sonindi warihü hundürüyomo.

³¹Sisas ai hoafiyuhi yahuya, "Nimorehi nindowenihi hapodanambe animboei ndanaheimbo ro nini-moatükunifihü simongorindihe hoeimandiheara? Nindou nda ai nüngunahurai nindouyei ndana?

³²Nindou ndana ana sapo nimori akidibou ngoafihü ninouyeimbo nahurai-anei. Sapo ai nimareimbo bodimondi nimoakidibumbo rarihi hoafiyeihiya, 'Ro siheimbo fufunnambo fufun-mehundüri, nga asu se moai botiyahi yiriwari moporiyei! Ro siheimbo wenggisahoafinambo marihundüri, nga asu se moai aranihoafirihündi rani ranimaye!' nahurai-anei. ³³Son sapo nindou hundürüra-randeimbi-mayu ranana tüküfi sesi sesü, wain hoe simindi rakoate-mayua, asu se hoafiyehüya, 'Ahandi fiambe ana moaruwai nendi nimarimboane,' masei! ³⁴Asu Nindou Hondü ai tüküfi sesi sesü, hoe sümündi marandambo, asu se hoafiyeihiya, 'Nindou ranahambo hoerihori! Aiana sesi afindi sesi asu nginindi wain hoe sümündi arandi. Aiana nindou takis kaki

sowandümo-rundeimb-anemo asu nindou moaruwai wosihoafori hohoanimoyomo-rundeimb-anemo ranahamundi ŋgunind-ani! masei. ³⁵Ŋga asu nindou didiyei Godindi-mayo fifirife ra anihond-ane sei sahumündimbi aiana rani fifirife ra anihondumbo nafuiyehanei,” mehu.

Sisas ai Saimon Farisihündandi worambe mamaru

³⁶Farisi nindou ai Sisasimbo sesimbohünda ro-dibo dowadifi mehundo-wamboyu asu Sisas ai ahandi worambe hu farifi hafu mamaru. ³⁷Rani ŋgoafihü nimorehi mami ai nindowenihi birabiri hohoanimoyo-randeimbi maningo. Sisas ai Farisi nindoundi worambe sesi sesühi amaru hoafi ra himboriyo haya, asu ai arabasta nimoei kaki afindi fih semindümbi hipirambe fisigarümbi moatükuni hipiri tüküre semindi haya maho. ³⁸Raniyo ai ho Sisasindi daboarani yirikimi ningombo araniyowohü Sisasindi tiŋari ra ahandi aranihimboaho-mayo ranambo popoaimarandi. Raniyo asu ai Sisasindi tiŋari ra ahandi mbirinani ranambo niŋombirihoayoa yahohaya gedühai mbura wakikihirapirühi fisigarümbi moatükuni ra tiŋari yimbumefani raniwami kamafoareandi.

³⁹Asu Farisi nindou Sisasimbo mborai mehundo ranai rani-moatükuni ramareanda hoeire haya ahandi fimbo hoafiyuhi yahuya, “Nindou nda anihondü Godindi hoafi hoafiyu-randeimbayu ana, ai nine nimorehi ahambo sündareri nda fifirindeambui. Asu moaruwai yahurai nindowenihi birabirümbi nimorehi aningo ranahambo fifirindeambui,” mehu. ⁴⁰Sisas ai simbori hoafiyundühi yahuya, “Saimon, ro sihambo hoafiyoninimbo hoafi moai siheheandi,” mehundowamboyu. Asu Saimon ai ahambo hoafiyundühi yahundoya, “Yini, Yamundo-randeimbi nindou se wambo ndühi hoafiyafindiri,” mehuamboyu.

⁴¹Asu Sisas ai piyu haya hoafiyuhi yahuya, “Nindou yimbu nimbafani henamboafani ai nindou ŋgorüdi-mayo kaki simbori hihindiho ndehoamboehi safani hena masowandifani. Nindou ŋgorü ai sapo kaki sairandeimbi-mayu ranahandi-mayo 500 kaki hoari semüdu süngunambo simbori saimbohünda asu nindou ŋgorü-mayu ranai 50 kaki hoari semüdu süngunambo simbori saimbohünda. ⁴²Nindou yimbu ranai kaki masowandifani ra simbori hihirife saimbo kakikoate-mefandamboyu asu nindou ranai ambe mehupiri. Nindou yimbu ra didi ai nindou-mayu ranahambo ŋgusüfo afindi pamandira?” mehuamboyu. ⁴³Asu Saimon ai simbori ahambo hoafiyundühi yahuya, “Ro rarihe hohoanimoyahi ana, nindou sapo ahambo kaki adükari masagado ranai-animbo afindi hamindi ŋgusüfo pandirümbui.” Raniyo Sisas ai yahuya, “Yini, se anihondumboanafi hoafayafi,” mehu.

⁴⁴Raniyo asu ai nimorehi-mayo ranahambo sowana hihirifihi Saimonimbo hoafiyundühi yahuya, “Se nimorehi ndanahambo moai hoeirowandiyo? Ro sihafi worambe mafareheandi, ŋga asu se moai

wambo hoe sawandiri wandi tiŋari popoaimbohünda. Iŋga asu nimorehi ndanaiyo wandi tiŋari ra ahandi aranihimboahonambo popoaira mbura ahandi mbirinaŋinambo gedümarandiri. ⁴⁵Seana moai wambo sowandifindiri worinirowandirühi wakikihirandiri, ŋga wani. Iŋga nimorehi ndanai ana ro sühühambe peyo haya wandi tiŋari ra moai wakikihi hiniŋgireandi, ŋga wakikihi hoafina hohombo haponda tükefeyo. ⁴⁶Se moai wambo mbiroambe kefembohünda orif nimi hisi boboe didiboadiro sihawandi, ŋga nimorehi aiyo wandi tiŋari ra fisiŋarümbü moatükuni ranambo kamareandiri. ⁴⁷Ranimboanahi ro sihambo hoafehanini, nimorehi ndanai ahandi hohoanimo moaruwai afind-ane, ŋga ranahambo God ai amboawi mehu. Nimboe sapo ai wambo ŋgusüfo afindi pamareandiri. Iŋga asu nindou daboe ahambo moani akidou yangiri amboawi yahoweimbi nindou ana ai moani akidou yangiri ŋgusüfo pareandirühani,” mehu.

⁴⁸Raniyu asu Sisas ai nimorehi-mayo ranahambo hoafiyundowohü yahuya, “Sihafi hohoanimo moaruwai ranana ro amboawi samboanahi,” mehundo. ⁴⁹Raniyo asu nindou bidifiri sesi fondikimi mamarimo ranai ahamundi mbusümo hoafiyomondühi yahomoya, “Nindou nda düdi moaruwai hohoanimo amboawi yahu aranda?” mehommo. ⁵⁰Iŋga asu Sisas ai nimorehi-mayo ranahambo hoafiyundühiya, “Sihafi anihondümbofe hohoanimo ranamboyo sihafi moaruwai hohoanimo ranambehindi aboedambo-mariheanini, ŋga se ŋgusüfo afurindo künde hawa ŋgafi,” mehundo.

Nimorehi bidifiri ai Sisas-babidimbo mahei

8 ¹Ranümbi ra kikefoendane, asu süngunambo Sisas ai adükari ŋgoafi asu akidou ŋgoafi ranambe huhü God ŋginindi hifandarandi ranahambo wataporimbo-marandi. Sisasimbo süngururü-rundeimbi 12 ai Sisasindi süngu mahomo. ²⁻³Raniyei asu nimorehi bidifiri didiyei moaruwai nendi nimarindüreimbi asu anŋüni moaruwaimbü Sisas ai aboedimarearü amboani ahandi süngu mahei. Nimorehi-mayei ranai ana Maria Makdarahündi, sapo Sisas ai moaruwai nendi 7 ahandi fiambehindi raganambo-reandeimbi-mayo ranayo, Soana, Kusandi nimorehi, nindou ranai Herodindi wori hifanda randeimbi-mayu ahandi nimorehiyo, Susana asu nimorehi bidifiri sapo ahei kakinambo Sisas asu ahandi hoafi sowandümo homo-rundeimbi farihehipuri-rihündeimbi-mayei amboani ai-babidi mahei.

Nindou sesi ahuri nümbürambe bubumafoareandi kafeofe hoafi
(*Matyu 13:1-9; Mak 4:1-9*)

⁴Nindou afindi ranai ŋgorü ŋgoafihündi ŋgorü ŋgoafihündi kikirihefekoate Sisas sowana nümbüni tümarihinda, ndani kafeofe

hoafi hoafiyundürühi yahuya, ⁵“Nindou mami ai sesi ahuri semündü hu bubufoareandane, asu bidifiri nafikimi pütapimayo. Nindou ai hahabodeihü pütapiyeiane, asu ndu ai nimoamonindi pühiyei masahüsi. ⁶Bidifiri ahuri ranai nimoei boatifowami pütapiyo mbura tüküfehündamboyo asu yapataparimayo hifi ranai hoe puuari-koate niñondi hamindiwambo. ⁷Asu bidifiri ai wohi tihoari tihoarümbi ninouyoambe pütapiyo mbura rani dibore tüküfihioyo asu wohi ranambo gabudi-mafoareandi. ⁸Ŋga asu bidifiri ahuri ranai hifi aboedambe pütapiyo haya tütükiyowohüyo 100, 100-mbore hisimayo.” Sisas ai rani hoafi ra moendifembo yahumbo hoafiyuhi yahuya, “Nindou düdi ai himboambeimbi-nduhü ana, hoafi ra himborimbiyu-wamboane,” mehu. ⁹⁻¹⁰Raniyomo ahambo süngrurü-rundeimbi ai rani hoafi ranahandi nimindi ranahambo düdumefundo-wambo hoafiyupurühi yahuya, “Sihamumbo ana God ŋginindi hifandarandi dibohindi hoafi ra masayopurane, ŋga nindou amuri ranaheimbo ana kafeofe hoafinamboane hoafayondüri. Rananimbo ai himboari-ndeimboyei, ŋga ŋgiri hoeindihindi asu himbori-ndeimboyei, ŋga ŋgiri fifirindihindi.”

Sesi ahurimbo kafeofe hoafi ranahandi nimindi hoafi
(*Matyu 13:18-23; Mak 4:13-20*)

¹¹“Kafeofe hoafi ranahandi nimindi ra ndahurai-ane. Sesi ahuri ra Godindi hoaf-ane. ¹²Sapo sesi ahuri nafini pütapimboyowohü pütapimayo ranana nindou didiyei hoafi himboriyeihaneisi, ŋga asu Satan ai ahei ŋgusüfoambeahindi semündü pireandühani. Sapo Satan ranai aheimboya anihondumbo-ndihi hehi aboedambo-ndahimboyei yahuhaya. ¹³Sesi ahuri sapo nimoei boatifowami pimayo ranana nindou didiyei hoafi ranahambo himboriyei hehi sahümündihi hihifi-hihifiyeihaneisi, ŋga ahei ŋgusüfoambe hoafi ra moai kikimifoare nimarondüri. Ai hoafi ranahambo anihondumbo-rihindühaneisi, ŋga asu nine-moatükuni aheimbo refe hoeifendürimbo tüküfeyoambe ai peyeihanei. ¹⁴Sesi ahuri wohi tihoari tihoarümbi mbusümo pütapimayo ranana, sapo nindou didiyei ai hoafi ra himboriyeihaneisi, ŋga asu afindi hohoanimo, kaki napo sihefe hohoanimo, hifi ndanihündambo hihifi-hihifi hohoanimo ranai gabudi-foareandürani asu ai aboedi hisikoate-aye nahurai-ane. ¹⁵Sesi ahuri hifi aboedambe pimayo ranana, sapo nindou didiyei ai hoafi ra himboriyei hehi ŋgusüfoambe kikihü-safimarihümündi-anei. Ai ahei hohoanimoambe didiboadorihoeimbi hamindi hondü nimarindürimboyo asu ai hisi aboedi tükümevendüri.”

Nindou ai moai si wambüri hoarehi dibonapiferandi
(*Mak 4:21-25*)

¹⁶“Nindou mami ai moai ram hai ra yimunde mbura wambürinambo gabude, asu fondi hoarehi ninde randi, ŋga wani. Sapo aiana yimunde

mbunda ram hai nindiferambo fondi-mayo raniwami nimoamo animbo nindeandani nindou didiyei worambe keboehindühi hoeindihimboyei. ¹⁷Nine-moatükuni dibo menjgoro ranai ana weindahi moanambühi tükündifemboe. Nine-moatükuni nindou ai gabudih masihehindi ranai ana weindahi hai sihi tükündifeyoani hoeindihimboyei. ¹⁸Awi se hibadihümbo, himbo yanggiri kündih ni mandei. Nindou düdi hohoanimo ra ndore fifirareandi ana, God ai adükari ndagadombui. Ijga nindou düdi ndofe fifirifekoate-ayu ana, nine akidou fifirimareandi amboani God ai raguanambo-ndeambui,” mehu.

Sisasindi hondi asu akohoandi
(*Matyu 12:46-50; Mak 3:31-35*)

¹⁹Sisasindi hondiyu asu ahandi akidi mamiyomo ranai Sisasimbo hoeifimbo tükümehindi, ija ai nimorehi nindowenihi afindi rani mbusümowambo moai ahandi fikimi papühühahindi. ²⁰Raniyei nindou bidifiri ai Sisasimbo hoafiyahündowohü sahündoya, “Sihafi me-ane asu amondi mam-anemo ai weindani animboei sihambo hoeifeninimbo seimbo,” maseiamboyu. ²¹Asu Sisas ai nindou ranaheimbo muñguambo yare hoafiyundürühi yahuya, “Nindou didiyei ai Godindi hoafi himboriyei mburihü sünguarihindi ranai-anei wandi me asu akohoandayomo,” mehu.

Sisas ai hoafimayua weri afurimareandi
(*Matyu 8:23-27; Mak 4:35-41*)

²²Mamimbo Sisas ai ahambo süngururü-rundeimbi babidimbo botambe fareafundühi hoafiyupurühi yahuya, “Awi sihiri kurihoe rani goesürüni bandihehu ngefo,” yahupuri haya mahomo. ²³Ai botambe homondühi-yomo asu Sisas ai yapombofi menjguru. Raniyo asu njinindi hamindi hoeweri ranai kurihoe-mayo ranambe tüküfehüyo, hoe botambe tüküfehü asu ai ndeara himoni hanimbo yanggirimemo.

²⁴Raniyomo asu ahambo süngururü-rundeimbi ai Sisas sowana homo yanggirirüwuri hoafiyomo-ndowohü yahomoya, “Adükari! Adükari! Sihiri ndeara yifimbo yanggirayefi,” mehomondamboyu. Asu Sisas ai botifi hoewerimayo ranahambo awi-awimefiyu-wamboyo afureandühiyo asu hoe ranai afure mafoero. ²⁵Raniyu Sisas ai ahamumbo yare hoafiyupurühi yahuya, “Asu sihamundi anihondümbofe ra nüñguia?” mehupuramboemo. Asu ai hepünafu yihimbo sisireapurühi simbori hoafiyafundühi yahomoya, “Nindou nda düdi rana? Ai moani hoeweri ranahambo awi-awimefiyuwa ahandi hoafi himboriyowohü afurimareandi,” mehomo.

Sisas ai nindou mamindi fiambeahindi moaruwai nendi hemafoareandi
(*Matyu 8:28-34; Mak 5:1-20*)

²⁶Sisas ai ahambo süngururü-rundeimbi babidimbo Gerasa-yafe hifinambo Gariri hoe gogoasürüni homo tüküme fundi. ²⁷Tüküyafu

mburu botambeahindi kusifoendane nindou mami rani ngoafihündi moaruwai nendi nimarindoweimbi ranai ahambo sowanambo mahu. Aiana horombo hondü piyu haya moai hoeari güdeandi, nga moani yare safoeyapo manüngu-ane. Ai ngoafihü niᅅgokoate yifi sihehi rihündeimbi hoᅅguambeyu nüᅅgu marandi. ²⁸Nindou ranai Sisasimbo hoeirürühi puküna heiyuhü yirikimi piyu nimarumbo hoafiyuhi yahuya, “Sisas, God Nimoamo Hamindi Hondüdi nimori, se wambo nüngufendirimbo safomboyafa? Ro sihambo hüti hoafarihanini se yowani wambo tiᅅirifo ndawandirimboyafi,” mehundo. ²⁹Nindou ranai yare hoafimayu ra sapo Sisas ai moaruwai nendi ranahambo hoafimayundoa kosifoendühiyo. Afindimbo moaruwai nendi ranai kikihirimindi nimaroani asu muᅅguambo nindou ranai himboari safühirürühi seninambo hüputüpu-rihawurani ai rani-moatükuni ra gurihai haya moaruwai nendi ranai fare serimindi haya nimi wohi furikoate-yowani ho-marandi.

³⁰Sisas ai ahambo düdufihü yahundoya, “Ndüri sihafü ninea?” mehindowamboyu. Asu ai simbori hoafiyundühi yahuya, “Wandi ndüri ana Awai nindou-ane.” Ai yare hoafimayu ra sapo moaruwai nendi afindi ranai ahandi fiambe mamarei ranimboyu. ³¹Moaruwai nendi-mayei ranai Sisasimbo hüti hoafiyahündowohü seiya, “Se yihoefombo nimbi nimarümbi hifambe ranambe koandihawamuni-mboyafi,” masahüdo.

³²Raniyo asu moatei afindi ranai hiripinini himborihündühi burimayei-amboyo moaruwai nendi ranai Sisasimbo moatei ranahei fiambe koarihefendürimbo hüti-hütimarihora koamarihendüri. ³³Raniyei nindoundi fiambeahindi kosifoehi hehi moateiyei fiambeyahindühi asu moatei ranai hiripinini pipinambo hanei kurihoeambe piyei hoe karihüsi hehi yifisafimayei.

³⁴Nindou moatei hifandimarundi ranai hoeirunda mayoa, pipiyomo homo rani ngoafihü asu nümbürambe ratüpuriyeihi burimayei ranaheimbo hoafihümarundüri. ³⁵Nindou ranai nini-moatükuniyo tüküme feyo sei hehi hoeifembo Sisasimbo-so tükümehindi. Raniyo tüküyahi hoeirihindane, nindou moaruwai nendi nimari haya kosifoendeimbi-mayu ranai ahandi yiri kimi hoeari yihuruyu mbura hohoanimimo aboedi koadürü hohoanimoyu arandi süᅅgu mamaruwa hoeirihorühi yihimbo sisirimehindi. ³⁶Nindou hoeifembo mahüsi ranai Sisas nindou aboedi-mariri ra hoeirihü hehi nindou bidiframbo waporimbo-marihündi. ³⁷Raniyei asu muᅅguambo nindou Gerasa hifihündi ranai yihimboyeihi Sisasimbo ragu ᅅgafi maseia asu botambe farifi haya ndamefiyu.

³⁸⁻³⁹Raniyo asu nindou moaruwai nendi nimari haya kosifoendeimbi-mayu ranai Sisasimbo hüti hoafirürühi yahuya, “Wambo se yini safanimbo se-dibo didi,” mehundo-wamboyu. Asu ai ahambo koariheirühi yahuya, “Se ᅅgoafina ᅅgafi nini-moatükuniyo God

ai sihambo ramareanini ra nindou bidifirambo wataporimbo-ndandi,” mehundo. Raniyu asu hu nine-moatükuni Sisas ai ahambo ramariri ranahambo rani ŋgoafihündi-mayei ranaheimbo wataporimbo-marandüri.

**Sisas ai bogorindi nimorehi nimori yifihündi botire asu nimorehi
aŋgünümbi ai Ahandi hoeari sündimareandi**
(Matyu 9:18-26; Mak 5:21-43)

⁴⁰Sisas ai asükai Gariri ŋgorü-goanini hu tükümeŋiyu-wamboyei nimorehi nindouwenihi ranai ahambo hihifi-hihifimayei, sapo himbomayei hei ranimbowambo. ⁴¹Ranühi asu nindou mami ahandi ndüri Sairus rani ŋgoafihü rotu wori hifandira-randeimbi ai Sisasindi yirikimi tüküfi piyu nimarümbo wandi worina dügüfi yahu haya hüti-hoafimarüri. ⁴²Ai sapo ahandi nimorehi nimori 12 himbani mami yaŋgiriyo haya yifambo-mayowamboymeŋiyu. Sisas ai Sairusindi worina hüfuane, asu nindou afindi ranai aŋgoaŋgo-marihori hei. ⁴³Ahei mbusümo nimorehi mami 12 himbanimbo amoamo watikoafimboyo mara ho ranai maningö. Ai ahandi aŋgüni ra aboedifembohünda doktambo hoeifepurimbo kaki afindi sai marandi, ŋga asu nindou didi ai-amboani moai aboedireandi. ⁴⁴Nimorehi ranai Sisasindi daboarani ho niŋgombo hoeari himbori-mayo ranifihi masündeandamboyo asu ahandi hori ranai moani rani-simboani hamindi kikimarihoayo.

⁴⁵Raniyu asu Sisas ai düdufihi yahuya, “Düdi wandi hoeari masündeanda?” mehuamboyo. Asu muŋguambo nindou ranai waniwaniyeihi didimomayei-amboyo asu Pita ai hoafiyuhi yahuya, “Adükari, nindou afindi ranai sihafi fikimi wakire yaŋgorimbo simbori koarürimayei,” mehundowamboyo. ⁴⁶Asu Sisas ai hoafiyuhi yahuya, “Nindou ŋgorü ai wambo masündeandira wandi fiambeahindi ŋginindi ranai makosifoendi ranimboanahi,” mehuamboyo.

⁴⁷Asu nimorehi ranai wambo fifirihi-ndirimboanei, ŋga ro ŋgiri dibo nimboahi yahohaya, hihamindari kameihi ho Sisasindi yirikimi piyo mamaro. Raniyo ai muŋguambo nindouyei himboahü wataporimbo-marandi nimboe masünderi asu nününgureamboyo rani-simboani hamindi aboedimayo ranahambo. ⁴⁸Sisas ai nimorehi ranahambo yahundoya, “Nimori akidou, sihafi anihondümbofoe ranai sihambo aboedimareanini, ŋga se ŋgusüfoambe afurindo künde hawa ŋgafi,” mehu.

⁴⁹Ai wataporimbo-randühi nünguambe, nindou mami ai hifandira-randeimbindi worambeahindi tüküfi hu hoafiyuhi yahuya, “Sihafi nimori ana yifimayo, ŋga se yamunde-randeimbi-mayu ranahambo tiŋirifo dabadomboyafi,” mehuamboyo. ⁵⁰Sisas ai rani hoafi ra himboriyu haya, Sairusimbo hoafiyunduhü yahuya, “Se yihimbondamboyoafi, ŋga

anihondümbö-ndowandani animbo sihafi nimori ra aboedindimboe,” mehundo.

⁵¹ Ai nimorehi-mayo ranahandi afindandi worambe hu tüküfi haya moai nindou amuri semündündüri worambe kefuendi, nga Pita, Son, Sems asu nimorindi hondafindi aheimbo yanggiriyo süngurearü haya mahüfu. ⁵² Nindou afindi ranihü mamarei ranai nimori ranahambo hohoanimoyeihi aranihoafi-marihündamboyu Sisas ai yahuya, “Ai ana yifiyombo-yopoani, nga ngiri aranihoafi-ndihünda,” mehuamboyei. ⁵³ Nindou ranai nimori yifimayo ra fifirihindi, ranimboyo Sisasimbo tikifinambo-rihorühi tirifoefe hoafimayahünda. ⁵⁴ Nga ai nimori-mayo ranahandi warihü kikihamündü hoafiyundowohü yahundoya, “Nimori akidou, se botiyafo,” mehundo. ⁵⁵ Asu ahandi yifiafi ranai hihirife ho fiambe farifehüyo asukai botimefeyo. Raniyo Sisas ai nimori ranahambo sesi sahünda yahu haya hoafimayundüri. ⁵⁶ Asu hondafindi ai hoerineanda mayoa mahepünafi-neandamboyu Sisas ai rani-moatükuni tükümefeyo ranahambo “Nindou ngörümbo yowani hoafipoani,” mehu.

Sisas ai ahambo süngururü-rundeimbimbo koamarihepuri

(Matyu 10:5-15; Mak 6:7-13)

9 ¹ Sisas ai ahambo süngururü-rundeimbi 12 ranahamumbo mborai yahupuri hürühepuri haya moaruwai nendi asu muṅguambo aṅgüni aboediferambo nginindi adükari masagapuri. ² Raniyu God nginindi hifandarandi ranahambo wataporimboyo asu aṅgüni aboediferambohünda koamarihepuri. ³ Ai ahamumbo yare hoafiyupurühi yahuya, “Sihamundi hoahoango ranambe se yowani niminimi, arü, sesi, kaki, asu hoeari yimbu-ane ra ndowandümböemo. ⁴ Se nini-worambeyo afareafundi ra moani se rani worambe yanggiri nimandimo mbundu botindafu ngomo. ⁵ Nahi homondani nindou ai sihamumbo worinifepurikoate-ndeiani ana, asu se ngoafi ra hiniṅgindu houmbo ngomondühi yirifihindi hifi hasüfi ra kükiboadu houmbo ngomo ranaheimbo God ai moaruwaimbomöreandüri yaho refe nafuiyo-ndürimbohünda,” mehupuri. ⁶ Raniyomo asu ahambo süngururü-rundeimbi ai ranihü hiniṅgiru houmbo homo muṅguambo ngoafi ranambe Godindi hoafi ra wataporimbo-rundühi nindou aṅgünimbo-yeimbimbo aboedirundüri marundi.

Herot ai afindi hohoanimomayu

(Matyu 14:1-12; Mak 6:14-16)

⁷ Gariri-yafe adükari bogori Herot ai muṅguambo moatükuni tükümefeyo ranahambo hoafi ra himboriyu haya, afindi hohoanimomayu. Ai yare hohoanimomayu ra, nindou bidifiri ai rarihi hoafiyeihi seiya, Son hundürüra-randeimbi ai yifihünda botimefiyu masei. ⁸ Asu bidifiri ai seiya, “Godindi hoafi hoafiyu-randeimbi Eraisa ai yihoefombo-so

tüküme fiyu.” Asu awi bidifiri ai seiya, “Nindou mami Godindi hoafi hoafiyu-randeimbi horombo hondü manüngu ranai yifihündi botimefiyu-ane,” maseiamboyu. ⁹Herot ai yare hoafiyuhi yahuya, “Ro sapo Sonindi mbiro ra kikimarihini. Asu nindou düdi nda ai yahurai ro hoafi nda himboriyaha tüküme fiyu. Asu ahambo hoeifimbo samboanahi,” mehu.

Sisas ai 5,000 nindoumbo sesi masagadüri
(*Matyu 14:13-21; Mak 6:30-44; Son 6:1-13*)

¹⁰Kraisindi hoafi sowandümo homo-rundeimbi ai hihiriyafu homo Sisasimbo-so tüküyafu muṅguambo moatükuni ai ramarundi ranahambo wataporimbo-maruri. Raniyu ai süngure sepurümündü haya Betsaida ṅgoafinambo ai yangiri nimarimbo mahomo. ¹¹ṅga asu awai nendi afindi ranai Sisas nahanafiyu mahu ranahambo türüfoarihi hehimbo-wambo, ai süngumarihori hei. Raniyu asu ai aheimbo mborai-mborafindüri hiniṅgireandüri haya, God ṅginindi hifandarandi ranahambo wataporimbo-marandi. Asu nindou didiyei ṅṅünümbi-maye aheimbo aboedimareandüri.

¹²Hüfihamindi hürimindoambe, süngurü-rundeimbi 12 ai ahambo-so tüküyafu hoafiyomondowohü yahomoya, “Se nindou ndanaheimbo koarihawandürani mbihei. Ranimbo asu ai hei adükari ṅgoafihüyo asu himboraniyo ranihü apofondiyo asu sesiyo ra kokombiri-hündamboane. Ndanihü ana nindou nimarikoate-yohane,” mehomo. ¹³Raniyu asu Sisas ai ahamumbo hoafiyupurühi yahuya, “Seanimbo sesi ra aheimbo ndabudürü,” mehuamboemo. Asu ahambo yaru hoafiyomondühi yahomoya, “Roana hondahüfeimbi bret-anemo asu kini akidou yimbu-anafani rani yanggiranane sihehumboayefi. Asu muṅguambo nindou ranaheimbo se homo sesi pemiyomo safimboyafi hohoanimoayafa?” mehomo. ¹⁴Nindowenihi ranihü mamarimo ra 5,000-yomo. Sisas ai ahambo süngurü-rundeimbi ahamumbo hoafiyupurühi yahuya, “Nindou ranaheimbo hoafindimondürani animbo ai 50, 50-ndahi mbimari-amboane,” mehupuri. ¹⁵Raniyomo ahambo süngurü-rundeimbi-memo ai himboriyomo houmbo nindou ranaheimbo rani-süngumarundüra mamarei. ¹⁶Raniyu Sisas ai hondahüfeimbi bretiyo asu kini yimbume fani ra semündü haya, sünambe himboyu hafuhü sesi ranahambo-hünda Godimbo hihifirüri mbura, bret kini hifitire ahambo süngurü-rundeimbimbo nindou-maye ranaheimbo yimbufe-ndürimbohünda masagapuri. ¹⁷Nindou ranai sesi ra sahäsi muṅgu pari hindühiyei, asu Sisasindi süngurü-rundeimbi ai sesi bidifiri bidifiri korimayo ra 12 wambüri tükuru madüburafundi.

Pita ai Sisasimboya nindou ndanana God dibonimayu Kraisani mehu
(*Matyu 16:13-19; Mak 8:27-29*)

¹⁸Mamimbo Sisas ai ahand-amboani Godimbo didibafiyuhü nimaruwane, asu ahambo süngurü-rundeimbi ai, ai-babidimbo mamarimo. Raniyu

ahamumbo düdufipurühi yahuya, “Nindou ai wamboya ai düdi seia?” mehu. ¹⁹Asu simbori ahambo hoafiyomondühi yahomoya, “Bidifiri ai Son sapo nindou hundürüra-randeimbi-mayu-ani sei. Bidifiri ai sihambo seiya ai Eraisa-ani maseiamboyei, asu bidifiri ai Godindi hoafi hoafiyu-randeimbi horombo hondü manüngu ranai yifihündi botimefiyu-ani masei,” mehomondo. ²⁰Raniyu asu ai ahamumbo simbori hoafiyupurühi yahuya, “Asu se ra wambo nünguru hohoanimoyomo ro didiyaha?” mehuamboemo. Asu Pita ai ahambo simbori hoafiyundühi yahuya, “Seana Krai-anafi nindou God ai diboniyunini hiningi-mareanini nindou aboedambo-fendürimbohünda,” mehundo.

**Sisas ai yifinda mbundiha yifihündi botindaheamboyahi
yahu wataporimbomarandi**
(*Matyu 16:20-28; Mak 8:30; 9:1*)

²¹Raniyu asu Sisas ai rani hoafi ranahamboya, “Se nindou ngorümbo yowani hoafindimboemo,” mehupuri. ²²Asükaiyu ahamumbo yare hoafiyupurühi yahuya, “Nindou Hondü ai ana asübusümbi tijirifo afindi ndemündühi animbo ahambo bogori nindou-anemo Godimbo sesi sihou-rundeimb-anemo asu ahinümbi hohoanimo yamundu rundeimb-anemo ranai yiboaruko-ndurimboemo. Ai ahambo hifokoandüwurani yifindümbuisi, nga asu ai ngimi sindu mbunda sünguna yifihündi botindifimbui,” mehu.

²³Ai munguambo aheimbo hoafiyundürühi yahuya, “Nindou didiyei ai wandi süngu hombo hohoanimondeihi ana, asu ai ahei hohoanimo ra hifinambo-ndihi hehi nimi keimbi karihendeimbifihü yifimbo noundahi hehi munguambo si aho ra wambo süngumbirihü-ndiramboane. ²⁴Nindou düdi ai ahandi yangiri ningo hohoanimo ra ahandihoari hifandarandi ana, ai awari-ndihoemboe. Nga asu nindou düdi wambohünda ahandi yangiri ningo hohoanimo ranahambo moanane ehu ana, ra gedühi ningomboe. ²⁵Nindou mami ai ratüpuri-yuhümbo munguambo moatükuni napo hifi ndanihündambo ra gugurareandi ana, asu ahandihoari awarindihembui, nga nüngunde ahambo mafandihera? ²⁶Nindou düdi ai, roanahi asu wandi yamundife hoafi ranane ranahambo amoaningayu ana, asu ro-amboani nindou ranahambo Ape, ro, asu sünambeahindi nendi babidi yihoe fi nginindi himboamupuimbo-randeimbi kapeihü kosahambe amoaningi-ndihünimboyahi. ²⁷Ro siheimbo anihondümboanahi nda hoafayahandüri, nindou bidifiri didiyei ndanihü aniboadei ranai ana yifikoate yangiri nimboei-ambe God nginindi hifandarandi ra hoeindihimboyei,” mehündüri.

Sisasindi fi ranipoanambo fiyoweimbi tüküme feyo
(*Matyu 17:1-14; Mak 9:2-13*)

²⁸Sisas ai rani hoafi ra hoafiyu haya, 8 si howane, ai Pita, Son asu Sems ahamumbo sepurimündü haya hifi wafunambo Godimbo

didibafifembo mahafu. ²⁹Ai Godimbo didibafiyuhü nünquane asu ahandi ngusumboari ra ranipoanambo fiyowohüyo asu ahandi hoeari ra kifohi hamindiyowohü si nahurai tüküme Feyo. ³⁰Raniyo asu rani-simboani Moses, Eraisa ai Sisas-dibo wataporiyafandühi manimbafani. ³¹Nindou yimbu ranai himboamupuimbo-randeimbi kapeihü tüküyafine henamboyafani asu Sisas ai Godindi ratüpuri moendifihü Serusarem ngoafihü yifimbo-mayu ranahambo ai-babidi wataporimemo. ³²Pita ai ahandi ngunindi yimbu Son asu Sems ai ahamumbo yapombo himbomarapura mapomo. Asu himboari birihomo hoeirundane, Sisasindi himboamupuimbo-randeimbi si ranambe nindou yimbu ranai-amboani yahurai ai-dibo manimbafani. ³³Moses Eraisa ai ndeara hombo safani henambo-yafandane, Pita ai Sisasimbo hoafiyundühi yahuya, “Adükari, aboed-ane ndanihü amarefisi, nga sihiri dago ngimi hündihupurimboane, sihambo ngorü, Mosesimbo ngorü asu Erasambo ngorü.” Pita ai yare hoafimayu ra ai ndore fifire hayamboyoani hoafimayu.

³⁴Ai rani hoafi ranahambo yare hoafiyuambe mburüngai ranai piyo gabudi-mafoareapura, asu ai yihimbomemo. ³⁵Raniyo asu hoafi ranai mburüngai-ambeahindi tüküfihü yahoya, “Wandi Nimor-ani nda, ro ahambo dibonimayahando-ani. Se ahandi hoafi himborindimo,” meho. ³⁶Rani hoafi ra ho kikamindoambe Sisas ai yangiri ranihü manüngu. Pita, Son, Sems ai rani-simboani nini-moatükuni hoeimarundi ranahambo nindou ngorumbo moai nini hoafi hoafiyomo.

Sisas ai nimori moaruwai nendi fiambe nimarindoweimbi aboedimariri
(*Matyu 17:14-21; Mak 9:14-29*)

³⁷Ngorü sina hifi wafu ra hiniñgiru houmbo hanimondani, nimorehi nindowenihü afindi ranai Sisasimbo nafini hoeimarihori. ³⁸Nindou mami, nimorehi nindowenihü afindi-mayei ranambeahindi ai Sisasimbo puküna hoafi karihoehü yahuya, “Nindou yamundo-randeimbi karihasi. Se sühüfi nimori wandi hoeiriwori, nga wandi mami ndearani nda. ³⁹Moaruwai nendi ai nimori ranahambo kikihi-safirimindühane asu ai hepünüfi heiyu arandi. Moaruwai nendi ranai ahambo yabadiri wakirerihane asu yahamo kasiau wutüpuariyu arandi. Ai ahandi fi ranahambo mungunambo moaruwaimbo-rerihane asu ahambo nimai hiniñgifi hombo sisamindarandi. ⁴⁰Ro sihambo süngurunini-rundeimbi ranahamumbo hütihütimarihapuri moaruwai nendi ranahambo raguanambofembo, nga ai ngiri raguanambondundi,” mehundo.

⁴¹Asu Sisas ai simbori hoafiyundühi yahuya, “Nindou nda se ana anihondümbofo hohoanimokoate-yehanei, asu sihei niñgo hohoanimo ra moai ndorihoayo. Nüngunimbimbo awi ro se-babidimbo nimboambo sihei nimbori ra mandahamindiha? Nimori sihafi ra ndühi sowarindifi

sühüfi,” mehu ⁴²Nimori ranai süfuane moaruwai nendi ranai serimindi hifihü purapoaporeri siheri haya yabadimariri. Iḡga asu Sisas ai moaruwai nendi ranahambo ḡginindi hoafiyundo haya nimori ranahambo aboediriri mbura ahandi afindambo hihiriri maserügudo. ⁴³Raniyei asu muḡguambo nindou-maye ranai Godindi ḡginindi adükari ranahambo mahepünehindi.

Sisas ai asükaiyu yifindamboyahi yahu wataporimbo-marandi
(*Matyu 17:22-23; Mak 9:30-32*)

Muḡguambo nindou ranai Sisas ramareandi ranahambo afindi hohoanimoyeihi nimboeiambe, ai ahambo süḡgrurü-rundeimbimbo hoafiyupurühi yahuya, ⁴⁴“Ro nine-moatükuni sihamumbo haponda hoafehapuri ndanahambo mitanindündümboemo. Iḡgiri amitata Nindou Hondü ndanahambo nindouyei wariwami hiniḡgindihori,” mehu. ⁴⁵Iḡga asu ahambo süḡgrurü-rundeimbi ai rani hoafi ranahandi nimindi ra moai fifirundi. Rani hoafi ra ahamumbo dibo meḡgoro wambo ai moai ndoru türüfoarundi. Iḡga asu ai Sisasimbo düdufembo ra yihimbomemo.

Nindou düdi adükarayu
(*Matyu 18:1-5; Mak 9:33-37*)

⁴⁶Sisasimbo süḡgrurü-rundeimbi ai nindou düdi adükarayu yahomo houmbo simbori hoafimemo. ⁴⁷Sisas ai fifireandi nine hohoanimo ahamundi ḡgusüfoambe amaro ranimbo. Raniyu asu ai nimori akidou serümündü ahandi ḡgirisafini pamariri. ⁴⁸Raniyu ai hoafiyuhi yahuya, “Nindou düdi ai nimori akidou ndanahambo wambohünda hohoanimoayundo ana, wambo amboani hohoanimoyu-ndirühani. Nindou düdi ai wambo hohoanimoayundiri ana, asu nindou sapo wambo koamarihendira makosahi ahambo amboani hohoanimoyu-ndohani. Nindou düdi ai sihamundi mbusümo akidou hamindayu ai-ani moani adükari hamindi hondayu,” mehu.

Nindou düdi sihefimbo moaruwaimbo-fekoate-ayu
aiana sihefi ḡgunind-ani
(*Mak 9:38-40*)

⁴⁹Raniyu asu Son ai simbori hoafiyuhi yahuya, “Adükari, ro hoerihundani nindou mami ai sihafi ndürinambo moaruwai nendi raguanambomareanda, ro ahambo rani-moatükuni raguanambofembo yowani masahundo. Ro ahambo ramarihuri ra nimboe sapo ai moai sihambo süḡgureanini ro rawehundi nou,” mehu. ⁵⁰Sisas ai Sonimbo hoafiyundühi yahuya, “Se yowani ahambo yowani yahondopoani, sapo nindou düdi ai simbori sihamumbo hoafiyopurikoate-ayu ranai ana nindou “sihamundani,” mehupuri.

Samariahündi ai Sisasimbo ahei ngoafina hombo yowani masei

⁵¹Sisas ai God sowana hafombo si ranai ndeara akimi tüküfeyoambe, ai Serusarem ngoafinambo hombo hohoanimomayu. ⁵²Raniyu ai muṅguambo moatükuni ahambo yimuṅgurifembo nindou bidifiri horombo koamarihepura homo Samaria ngoafihü tüküme fundi. ⁵³Ḷga asu nindou rani ngoafihü ranai moai Sisasimbo mborai sahündo ai Serusareminambo mahuwambo wambo. ⁵⁴Sisasimbo süṅgururü-rundeimbi nindou, Sems, Son ai rani ngoafihündi ramehindi ranimbo hoerine hena hoafiyafandühi safaniya, “Adükari, ro sünambeahindi hai ranahambo hoafindehani kosi nindou ranaheimbo moaruwaimbofendürimbo ra se yifirindafani ana, randihoa?” masafandamboyu. ⁵⁵Raniyu asu Sisas ai ahafanimbo hihirifi ḡginindi hoafimayupiri. ⁵⁶Raniyomo asu ai ranihünda ḡgorü ngoafina mahomo.

Sisasimbo süṅgufe hohoanimo

(Matyu 8:19-22)

⁵⁷Ai homondühiyomo nafini nindou mami ai Sisasimbo yare hoafiyuhi yahuya, “Se nininiyo ahafi ra roana moani sihambo yangiri süṅgundihanini-mboyahi,” mehuamboyu. ⁵⁸Asu Sisas ai ahambo hoafiyuhi yahuya, “Nimambeahindi yafari ana ahandi hifi ambe ra mbaninḡo ai ho aporambo, asu ndu ai ḡgerümb-anei, ḡga Nindou Hondü aiana fondikoate-ani ai ho ahandi mbiro bidagorife aporambo ra,” mehu. ⁵⁹Nindou ḡgorü-mayu ranahambo Sisas ai hoafiyundühi yahuya, “Se wambo süṅgundandiri,” mehundo. Ḷga asu ai ahambo yare hoafiyundühi yahuya, “Adükari, awi ro ḡga wandi apembo hifi-kandihini heheambo asu süṅguna ḡgamboyahi,” mehu. ⁶⁰Ḷga asu Sisas ai ahambo yare hoafiyundühi yahuya, “Nindou yifiyeimbi ai aheihoari yifinimoko ra hifi kambirihini-ndamboane, ḡga seana ḡgafi God ḡginindi hifandarandi ranahambo animbo wataporimbo-ndandi,” mehu. ⁶¹Nindou ḡgorü ai hoafiyuhi yahuya, “Adükari, ro sihambo süṅgundihanini-mboyahi, ḡga awi ro ḡga wandi fikiminindi-mayei ranaheimbo asürü ahinindihearü mbundihambo animbo süṅgundihea-ninimboyahi,” mehu. ⁶²Sisas ai ahambo hoafiyundühi yahuya, “Nindou mami ai nimi hitandühi daboarani kefuai himboayu ana, God ḡginindi hifandarandi ranahambo ḡgiri ratüpurindu,” mehundo.

Sisas ai 72 nindou ahandi ratüpurimbohünda koamarihepuri

10 ¹Süṅgunambo Adükari ai 72 nindou diboniyu mbura, ahamumbo boatei yimbu-yimbure nine ḡgoafi sapo ai hombo yahuhayambo-mayu rani ḡgoafini koamarihepuri. ²Ai ahamumbo yare hoafiyupurühi yahuya, “Nümbürambe sesi afindi burayo ranai ndeara muṅgu süfi

yanğirayo, nga asu sesi ranahambo yimungurife gugurifembo nindou ana afindiyo poani. Ranimbo-hündambo animbo asu se nümbüri aharambüri ranahambo didibafindafundani animbo asu ai sesi ra yimungurife gugurifembohünda nindou afindi safi koambiri-hepuramboane.

³Hapoana se ngomo, nga awi se himboriyomo! Ro sihamumbo sipsip wei nahurai yafori harümbi nimboeiambe nou koarariheheapuri.

⁴Se kaki sandiferambo arü akidouane, napo arü ane, asu su yirambe kikifoefemboane ndowandümbömo, nga yowani. Asu se nindou nafini hoeindundürühi aheimbo wari furüboadundürühi wataporimbo-ndürimboemo, nga yowani.

⁵Se nini worambe-yomo afareafundi ra, boatei randu hoafindimondühi animboya, 'Nindou ndani worambe amarei se ngusüfoambe afurindihi kündihindi,' mbisimo. ⁶Nindou bidifiri rani worambe ngusüfoambe afurife kife hohoanimombo yifiriyeimbi nimandiani ana, nindou aheimbo-so ngusüfoambe afurife kifeimbi hohoanimo sihamundi-mayo ra mbeyangoro-amboane. Iga asu wanayo ana, rani hohoanimo sihamundi-mayo ra asükaindo sihamundi hihirife mbihowamboane. ⁷Se moani wori mamani ranambe yanğiri nimandimo. Nindou rani worambeahindi ai nini-moatükuniyo ndehüpurani se rani worambe yanğiri sesi dowadümo hoe ndimindimo ndundi. Iga se worini worinipo-ndimboemo.

⁸Nini ngoafihüyo se tüküyafundani nindou ai sihamumbo ndahüpurümüdi worinindihipurani ana, se moani nine-moatükuni ai sihamumbo püpimarihindi ra dowadümo. ⁹Asu rani ngoafihü angünümübi nindou amarei ranaheimbo aboedindundürühi hoafindomondürühi animboya, 'God ai nginindi hifandarandi ranai ndeara siheimboso akimi tüküfemboane,' mbisimo. ¹⁰⁻¹¹Iga asu se nini ngoafihüyo homondani nindou ranai sihamumbo sepurimindi worinifekoate-ndeiani ana, asu rani ngoafihü se ngomo nafini niñgomombo aheimbo hoafindomondürühi animboya, 'Sihei ngoafihüdi hifi hasüfi yihoefi tiñarifihi apeniño ra siheimbo hütimbo-hündamboane püpürifafoarihundi. Iga awi se randihi fifirindihi God nginindi hifandarandi ranai ndeara akimi tüküfemboane,' mbisimo. ¹²Ro sihamumbo rarihe hoafehapuri, Godindi yibobofembo si tüküfeyoambe ana, siheimbo tiñirifo Sodomihüdi ranaheimbo tüküme Feyondüri ra ngasünde haya moaruwai hamindi tükündifemboe.

Anihondümbofekoate-yeimbi nindou ana hipoanihimboe-mbou-anei
(*Matyu 11:20-24*)

¹³Hipoanihimboembou-anei Korasinihüdi se! Hipoanihimboembou-anei Betsaidahüdi se! Siheimbo moaruwai hamindi tükündifendürimboe. Asu ro hepünifeimbi moatükuni sihei ngoafihü ramariheandi rahurai Tair ngoafihü Saidon ngoafihü rambarihea-

mbonana, nindou rani ŋgoafihündi ranai horombonambo animbo moaruwai hohoanimo hiniŋgirihi hehi didiboadorihi nimarei. Rananimbo ai hasüfi yihuruyei mburihumbo nimarei sapo roana yihoefi moaruwai hohoanimo ranahambo hiniŋgirihamboanefi sei hehi. ¹⁴Ŋga asu Godindi yibobofe si tüküfeyoambe ana, Tair ŋgoaf-ane Saidon ŋgoaf-ane ranaheimbo ana ŋgiri afindi hamindi tiŋjirifo tükündifeyo, ŋga siheimbo ana nine moani afindi yahurai hamindi tiŋjirifo tükümandifendüri. ¹⁵Asu Kaperneam se ra sünambe ndüri adükari mandahümündiyo? Wani yaŋgir-ane ana! Siheimbo ana hifini safi pindeandürani gadeimboyei!” mehu.

¹⁶Ai ahambo süngrurü-rundeimbimbo hoafiyuhi yahuya, “Nindou düdi ai sihamundi hoafi himborayu ana, wandi hoafi amboani himboriyuh-ani. Asu nindou düdi ai sihamundi hoafi himboriyo hefe semindikoate-ayu ana, asu wandi hoafi ŋgiri himbondu haya ndemündu. Asu nindou düdi ai wandi hoafi himboriyo hefe semindikoate-ayu ana ai ŋgiri Nindou düdi wambo koamarihendiri ahandi hoafi amboani himborindu haya ndemündu,” mehu.

72 nindou ai hihiriyafu mahomo

¹⁷Nindou 72-memo ranai hihifi-hihifi kameihi hihiriyafu homo tüküyafu hoafiyomondühi yahomoya, “Adükari, sihafi ndüri dükarihunda moaruwai nendi ranai yihoefi hoafi himboriyei marihündi!” mehomo. ¹⁸Sisas ai simbori ahamumbo hoafiyuhi yahuya, “Ro hoeiriheandani Satan ai sünambeahindi wabürüsi nahurai pimayu. ¹⁹Awi se himboriyomo, sapo ro sihamumbo amoasiriyo hifitanjiyo raniwami pütapiyo hombo ŋginindi masahapur-ane. Asu sihamundi hürütümbindi ŋginindi ŋgasünde-andeimbi ŋginindi masahapuri. Ŋga ranimbo-hündambo animbo sihamumbo ŋgiri nini-moatükuni moaruwaimbo-ndeapuri. ²⁰Sapo moaruwai nendi sihamundi hoafi himborimaye ranimbo se yowani hihifi-hihifindimboemo. Ŋga sapo sihamundi ndüri sünambe pare masihepuri ranimbo-hündambo animbo hihifi-hihifindimo,” mehupuri.

Sisas ai Afindambo didibafimefindo

(Matyu 11:25-27; 13:16-17)

²¹Raniyo asu rani-simboani Yifiafi Aboedindi hihifi-hihifi ranai Sisasindi ŋgusüfoambe tüküfehüyo, asu ai yare hoafiyuhi yahuya, “Ape, sünambe-ane asu hifi ndanihü-ane se Adükari-anafi. Ro sihambo hihifarihanini ra nimboe sapo nindou fifirihi mburihü didiboado-rihehindeimbi-maye aheimbo rani-moatükuni ra dibonapiro mbura, asu nimori akidibou nahurai-maye aheimbo nafuimefindüri ranimbo-hünda. Yini, Ape se rani-moatükuni refembo yifirayafi,” mehu. ²²Sisas ai

hoafiyupurühi yahuya, “Wandi Ape ai wambo munġuambo moatükuni nġinindi ra masendiri. Nindou didi ai moai Nimor-ayu ndanahambo fifiriri, nġa Afindi ai yanġir-ani fifirimboayu. Asu nindou didi ai moai Afindambo fifiriri. Nġa Nimori aiani asu nindou didemo Nimori ai ahandihoari dibonimayupuri sapo Godimbo fifirifi hoafimbo-memo ai yanġir-anemo fifirumboemo,” mehu. ²³Raniyu Sisas ai hihirifi nünġumbo ahambo süngurü-rundeimbi-memo ranahamumbo-poanimbo yanġiri hoafiyupurühi yahuya, “Nine-moatükuni se sihamundi himboarinambo hoeiarundi rani-moatükuni ra nindou ai-amboani hoeiareandi ana, ai hihifi-hihifimbiyu-wamboane! ²⁴Ro sihamumbo nda hoafepapuri, Godindi hoafi hoafiyomo-rundeimbi-yomo asu bogori nindou-yomo ai nine-moatükuni haponda se hoeiarundi ndanahambo ai hoeifembo mehomoyosi, nġa ai moai hoeirundi. Asu ai nine hoafi se himborayomo ranahambo amboani himborimbo mehomoyosi, nġa asu ai moai himboriyomo,” mehupuri.

Sudahündambo Samariahündi ai mafariherü

²⁵Suda-yomondi ahinümbi hohoanimo yamunde-randeimbi nindou ranai Sisasimbo refi hoeifimbo tükümeŋiyu. Ai yare hoafiyuhi yahuya, “Yamundo-randeimbi, ro nünġundiheandühi koadürümbo yanġiri nünġombo hohoanimo ra mandahamindiha?” mehuamboyu. ²⁶Asu Sisas ai simbori ahambo hoafiyuhi yahuya, “Asu nünġureamboyo Baiborambe hoafimayoa? Nünġundo se rani-moatükuni ranahambo hoeindo fifirimandowanda?” mehuamboyu. ²⁷Asu nindou-mayu ranai hoafiyuhi yahuya, “Adükari aiana sihei God-ani, ranimboanimbo se ahambo sihei yifiafi, nġinindi, hohoanimo ranambo nġusüfo pandihori. Asu sihei wandafi ranaheimbo amboani nġusüfo pandihindüri sapo se sihei fimbo nġusüfo pararihindi nou,” mehu. ²⁸Asu Sisas ai simbori hoafiyuhi yahuya, “Se anihondümbo-anafi hoafayafi. Se randowandühi animbo yanġiri nimboamboyafi,” mehundo. ²⁹Nġa asu ai Sisasimboya ai adükari fifireandeimb-ani yahuhaya ahambo düdufinduhi yahuya, “Nindou düdi ai wandi wandafayua?” mehundowamboyu.

³⁰Sisas ai simbori hoafiyundühi yahuya, “Mamimbo nindou mami ai Serusarem nġoafihündi botifi haya Seriko nġoafina hanuwane, hühbühüni nindou ai nafini mburindümo houmbo hoeari napo ahandi hirifoarundowöhü asu ahambo bubururi yifimbo yanġiri sihawuri-houmbo ndamefundü. ³¹Rani-moatükuni ranai refeyowane Sudahündi Godimbo sesi sihai-randeimbi nindou ai nafi rani-sünġu mahanu. Nġa asu nindou ranai hoeirira mayowamboyu himbori nafi wakiramündü tüküfi haya mahanu. ³²Nindou mami Godimbo sesi sihai-randeimbi Rifai sirihündi ai mahanu. Ai sünguni hanü nindou ranahambo hoeirira mayowamboyu himbori nafi wakiramündü tüküfi haya mahanu. ³³Raniyo asu nindou

mami Samariahündi ai nafi rani-süngu mahanu. Ai hanü nindou buburüri masihawuri ranahambo-so tükümeñyu. Asu ai nindou ranahambo hoeirira mayoa ahambo hipoambo afindi hipoambomarüri. ³⁴ Samariahündi-mayu ranai hüfu ahandi fikimi tüküfi orif hisi weri hoeyo asu wain hisi hoeyo ra buburura horimayo raniwami kare mbura hoeari goesürinambo himondimariherü. Raniyu ai nindou ranahambo serümündi ahandi dongimayo raniwami nandi serümündü haya, nindou fandühi apoei-rihündeimbi worina mahanu ranihü semündi ho hifandiyö nimarimbohünda. ³⁵ Ñgorü sina Samariahündi-mayu ranai kaki sepurimündi hu nindou tüküyahi apoei-rihündeimbi wori hifandira-ndeimbi-mayu ranahambo sagadowohü yahuya, ‘Nindou ndanahambo se didiboadondiwori. Se ahambohünda kaki pütaiyafi ana, ro asükainda hihindahe dügühühi sihambo hihindihe ndahananimboyahi,’ mehundo,” mehu.

³⁶ Sisas ai asükaiyu düdufindowohü yahuya, “Se sihafi hohoanimonambo nindou ñgimi ra düdi wandafi ranahambo ñgusüfo paririmbayua?” mehuamboyu. ³⁷ Ai hoafiyuhi yahuya, “Nindou sapo düdi ai ahambo hanü hipoamborirühi mafariherü ranai-ani,” mehindowamboyu. Asu Sisas ai simbori hoafiyundohü yahuya, “Se ñgafi moani rani süngundowandi,” mehundo.

Sisas ai Mata Mariambo hu hoeimareapiri

³⁸ Sisas ai ahambo süngurürü-rundeimbi babidimbo nafi homondühi ai ñgoafi mami Mata nimarümbi rani ñgoafihü tüküfiyuane asu ahambo serimindi worinimareri. ³⁹ Mata ai akidimbüyo hayamboyo ahandi ndüri ra Maria ai sifo Adükarindi yirikimi nimarimbo ahandi yamundife hoafi wataporimbo-arandi ra hihimborimayo. ⁴⁰ Ñga asu Mata ai afindi ratüपुरi worambe engoro ranahambo tiñambo-yowohüyo ai moai ñgusüfoambe ndore küreandi. Ai ahambo-so ho hoafiyondowohü yahoya, “Adükari seana awi moai wandi akidi ranai hiniñgireandirani muñguambo ratüपुरi wand-amboani rarawarihandi ranahambo ana hohoanimoyafiyö? Se hoafiyafindoani animbo ai sini wambo mbifarihendiri,” mehindowamboyu.

⁴¹ Asu Sisas ai simbori hoafiyundowohü yahuya, “Mata, Mata, seana muñguambo moatükuni ranahamboanafi afindi hohoanimoyafühi ñgusüfoambe ndofe kifekoate-ayafi. ⁴² Mami moatükun-ane adükari hamindayo. Maria aiana aboedi moatükuni hamind-ane ai warife semindimboayo. Rani-moatükuni ranai ahandi warambeahindi ñgiri hündühümüdi,” mehundo.

Sisas ai Godimbo didibafifembo hohoanimo yamundimareandi (Matyu 6:9-15; 7:7-11)

11 ¹ Mamimbo Sisas ai ñgoründühi didibafiyuhü manüñgu. Ai didibafiyu kikamünduane, asu ahambo süngurürü-

rundeimbi mami ranai hoafiyundühi yahuya, “Adükari, se yihoeffimbo didibafiyorambo ra Son ai ahambo süngrurü-rundeimbimbo ramareapuri nou yamundowamuni,” mehuamboyu. ²Asu Sisas ai hoafiyupurühi yahuya, “Se ndandu didibafi-ndafundühi animboya,

‘Ape, sihafi ndüri ra moani ahinümbi-mbeyowamboane.

Sihafi nginindi hifandarandi ra mbikosowamboane.

³Munguambo si ro sesi semindimbo hohoanimoayefi ra se ndawamuni.

⁴Yihoeffi moaruwai hohoanimo ra amboawi mbisafimuni,

ro-amboani munguambo nindou yihoeffimbo moaruwaimbo-rihimuna, amboawi asahundüri nou.

Asu se yihoeffimbo nini-moatükuni refe hoeifemunimboayo ranambe ndowandifimuni ngamboayafi,’

mbisimo,” mehu.

⁵⁻⁶Raniyu asu Sisas ai hoafiyupurühi yahuya, “Asu se sihafi ngunindi-mayu ranahandi worina nimbi mbusimondühi hafi hoafiyafi-ndowohüya, ‘Wandafi, se wambo bret ngimi sawapuri, nimboe sapo wandi ngunindi ai nafimbo süni tükümeffiyu, nga ro ai sesimbo sesi-koate-anahi.’ ⁷Nindou worambe amaru ranai rande simbori hoafinduhüya, ‘Yipuri pariheamboanahi, nga se wambo tijirifo ndawandiri-mboayafi, nga ragu moeindani ngafi. Roana nimori babidimbo fondihü apoefi. Ro ngiri botindahe sihambo nini-moatükuni amboani ndahanini,’ mbüsümbui. ⁸Ro sihamumbo hoafiyahapuri, wori aharambüri ranai botindüfi nini-moatükuniyo mbonimbo-maramündu ra worambeahindi fufundamündi dagadombui. Nindou ranai ahandi ngunindi ranahambo farihefimbo rareandühiyupoani, nga düdu-düdupo-marürambo ranimbo dagadombui.

⁹Ro sihamumbo hoafehapuri nda, düdundafundani animbo God ai sihamumbo dagapurümbui. Kokoarundi animbo hoeindumboemo. Yipurifihi pirako-pirakondundani animbo yipuri ranai sihamumbo sübüdihoemboe.

¹⁰Anihondane, munguambo nindou düdi-düdufi arandi hu-animbo ai ndemündümbui. Nindou düdi ai kokoara hu-animbo ai hoeindeambui.

Munguambo nindou düdi ai yipurifihi pirako-pirakoara hu-animbo ahambo yipuri ra sübüdihoemboe.

¹¹Asu sihafi nimori ai kini sao sei hehi düduehindi ra se harinendi madabudürüyo? ¹²Asu sihafi nimori ai songo sao sei hehi düduehindi ra asu se aheimbo hifitanji madabundürüyo? ¹³Se moaruwai hohoanimoyomorundeimbi nindou-anemosi, nga asu se sihamundi nimori ranaheimbo aboedi moatükuni sabudüri arundi. Mami yahurai-ane nindou didiyei Ape sünambe amaru ahambo düduehindi ana, Yifiafi Aboedi dagadürümbui,” mehu.

**Sisasimboya moaruwai nendi-yafe bogori Berseburindi
nginindinamboane ratüpuriyu arandi masei
(Matyu 12:22-30; Mak 3:20-27)**

¹⁴Mamimbo Sisas ai moaruwai nendi hemafoareandi nindoundi fiambe nimarimbo nindou ranai waporikoate-yu maranda. Nindou

ranahandi fiambeahindi moaruwai nendi ranai kosifoendühiyo, asu nindou-mayu ranai wataporimayu. Raniyei nimorehi nindowenihi ranai mahepünahindi. ¹⁵Ŋga asu nindou bidifiri ai hoafiyeihi seiya, “Sisas ai moaruwai nendi-yafe bogori, ahandi ndüri Bersebur, ahandi ŋginindinambo moaruwai nendi ra nindoweyi fiambeahindi raguanambore arandi,” masei. ¹⁶Asu nindou bidifiri ai Sisasimbo refe hoeifimbo seihehi hohoanimoyeihiya, “Ai Godindi ratüpuriyo rawareandi ra nafuimbohünda hepünifeimbi moatükuni rambirea-ndamboane,” masei.

¹⁷Asu Sisas ai ahei hohoanimo ra fifireandüri haya hoafiyundürühi yahuya, “Nindou didiyei ŋgoafi mami papirihi nimareimbi ranai yimbumbore yibobore haya yifiarayo ana, ŋgiri aboedi nimboei. Asu nindou mami rani worambeahindi ranai yimbumbore yiboborihi mburihü aheihoari yifiaraye ana, ŋgiri aboedi nimboei. ¹⁸Asu Satanindi nendi ranai yimbumbore yibobore haya ahafehoari yifiarayo ana, asu nüngunde mamühi ŋginindi manŋgoa? Se wambo seiya, ‘Ai ana moaruwai nendiyei bogori ahandi ndüri Berseburindi ŋgnindinamboani moaruwai nendambo hefoare arandi,’ masei. ¹⁹Asu ro Berseburindi ŋginindinambo moaruwai nendi ra raguanambo-mbarihea mbonana, asu sihei nendi ai dade ŋginindinambo moaruwai nendi ra raguanamboru arunda? Sihei nendi ranai siheimbo yibobondundürühi sihei hoafi ra anihondüyopoani mbisimo nafuindimboemo. ²⁰Ŋga asu God ai ahandihoari wambo ŋginindi ra sendirani rani ŋginindinambo moaruwai nendi ra raguanambo-ariheandi ana, awi se randihi fifirindihindi God ai ŋginindi hifandarandi ra siheimbo-so tüküfemboane.

²¹Nindou hari ŋginindi ai muŋguambo yifiari niminehoari gugure haya ahandi wori ranahambo hifandarandi ana, ahandi muŋguambo moatükuni ranai aboedi yagodimboe. ²²Ŋga asu nindou ŋgorü hari ŋginindi hondü ai tüküfi nindou rani-dibo yifiariyafanimbo ahambo hifinamboariri ana, nindou muŋguambo nindou fehefe yifiarimbo napo ra fufundamündühi asu ahandi-mayo napo muŋguambo ra nindou amurambo yibobondearümbui. ²³Nindou düdi ai wandi ŋgunindiyupoani ehu aiana wambo yihoaruko-reandirühani. Asu nindou düdi ai wambo farihefendiri hefe nindou ranaheimbo gugurifendüri-koate-ayu ana, ai aheimbo waribadandüri wakindearümbui,” mehu.

Moaruwai nendi ranai asükaiyo tüküme feyo
(*Matyu 12:43-45*)

²⁴Sisas ai yahuya, “Moaruwai nendi nindou-mayu ranahandi fiambeahindi makosifoendi ranai nine hifi niŋondi anango raninambo ranihü warihefe nimarimbo kokora howohane. Ai fondi ra mam-amboani hoeifekoate-ayo ana, ai ahandihoari hoafindowohü animboya, ‘Awi

ro asükainda wandi horombodidi wori hiniŋgimariheandi raninambo hihirindahe nga,' mbisimboe. ²⁵Asu ai ŋgo wori ra hoeindeanda moani aboedi yihoarihefe didiboado-yimindümbi fondarimboe. ²⁶Rananimbo asu ai ŋgo moaruwai nendi 7 bidifirambo fihindamindindüri ŋgo ai mami rani worambe nimandeimboyei. Moaruwai nendi süngu tükümehindi ranai moaruwai hamindi-ndeimboyei. Muŋguambo ai nindou-mayu ranahandi fiambe gugurindahi nimandiani animbo nindou ranai horombo mamaru nahurai nimarikoate moani moaruwai hamindi hondü nimandümbui," mehu.

Nini nindou ai anihondümbi hihifi-hihifimandei

²⁷Raniyo asu Sisas ai rani hoafi ra yare hoafiyuambe nimorehi mami ai nimorehi nindowenihi afindi meŋgoro rani mbusümo botife Sisasimbo hoafiyowohü yahoya, "Nimorehi ndanai sihambo wakiramindinini mbura titihümaranini ranai ana hihifi-hihifimbeyo-wamboane," mehoamboyu. ²⁸Asu Sisas ai simbori ahambo hoafiyundühi yahuya, "Nindou didiyei ai Godindi hoafi himboriyei mburihü rani-sünguarihindi aianimbo hihifi-hihifimbeyo-amboane," mehu.

Nindou bidifiri ai Sisasimbo hepünifeimbi moatükuni refembo düdumehindo (Matyu 12:38-42; Mak 8:12)

²⁹Nimorehi nindowenihi afindi ranai türehowohü ahambo akimi kakimarihomindeidei heiamboyu aheimbo hoafiyundürühi yahuya, "Nindou hapondanambe animboei ndanai ana awi nindou moaruwai hamindane. Ai ana hepünifeimbi moatükuni hoefemboane hohoanimoayeidei sapo wamboya ai anihondü Godindi ratüpuriyo ratüpurayu yaho fifirifembohünda. Ŋga asu aiana ŋgiri nini-moatükuniyo tükefeyo ranahambo hoeindihindi, nga wani. Aiana sapo nindou Godindi hoafi hoafiyu-randeimbi ahandi ndürü Sonambo nine-moatükuni tükümefeyondo rani-moatükuni yaŋgiri animbo hoeindihimboyei. ³⁰Mare yahuraiyo Godindi hoafi hoafiyu-randeimbi nindou Sona ai Ninife ŋgoafihü nindou amarei ranaheimbo yahurai-ane yaho nafuiyo-ndürimbohünda tükümefeyo. Mare yahurai-animbo Nindou Hondü ndanai-amboani tükündüfimbui God ai nindou hapondanambe amarei ranaheimbo nafuiyo-ndürimbohünda. ³¹God ai nindoumbi yibobofendürimboayu rani si tüküfeyoambe animbo bogori adükari nimorehi hifi wari kadüdanipoedi ai tükündife nindou hapondanambe animboei ranaheimbo nini-moatükuni ai moaruwai ramarihindi ranimbo papi-hoafindandürimboe. Rani-moatükuni refemboayo ra nimboe sapo ai adükari bogori Soromonindi ndofe fifirife hoafi himborimbohündambo ahandi hifi bidifirani angunipoedi hiniŋgire haya masino.

Ŋga ro siheimbo hoafehandüri nindou sihei mbusümo anüngu aiana Soromonimbo ŋgasündirümboani. ³² God ai nindoumbo yibobofe-mboayu rani si tüküfeyoambe ana Ninife ŋgoafihündi nindou ranai botindahi nimboeimbo siheimbo papi-hoafindühürimboyei. Ai refemboaye ra nimboe sapo Sona ai hoafi wataporimbo-maranda himboriyeyi mburihü moaruwai hohoanimo ahei ra hiniŋgimarihindi ranimbo-hünda. Ŋga asu ro siheimbo hoafehandüri sihei mbusümo nindou mami anüngu aiana Sonambo ŋgasündirümboani,” mehu.

Nindou-yafe hohoanimoambe si nahurai

(Matyu 5:15; 6:22-23)

³³ Sisas ai yare hoafiyuhi yahuya, “Nindou didi ai moai ram hai ra yimundihi mburihü wambüri hoarehi dibonapirühi rihündi, ŋga wani. Aiana moani sapo yimundihi mbundihümbo nimoamo fondiwami nindihindani animbo si ranai boakiboadeandani nindou didiyei worambe fandahindühi hoeindihimboyei. ³⁴ Sihei himboari ra sihei hohoanimo ranahandi ram hai nahurai-anendüri. Asu sihei himboari ra aboedayondüri ana, sihei hohoanimoambe si ranai boakiboadeandürimboe. Ŋga asu sihei himboari ranai moaruwaiayo ana, sihei hohoanimoambe nimbi bündearümboe. ³⁵ Ranimbohündambo animbo se hibadihümbo, ŋga asu sihei hohoanimoambe si amaro ranai nimbindeamboe. ³⁶ Asu muŋguambo hohoanimoambe sihei fiambe ranai si yangiri boakifoareandühi gorügoanini nimbi nimarikoate-ayondüri ana siheimbo si ranai boakiboade-andürimboe ram hai si boakafoareandi nou,” mehu.

**Sisas ai Farisi nindouyomo asu ahinümbi hohoanimo
fifirundeimbi bogoriyomo ahamumbo papi-hoafimarapuri**

³⁷ Sisas ai wataporimbora mbura asu Farisi nindou mami ai hoafiyundühi yahundoya, “Dügüfi dagoade-ndihoamboane,” mehundo. Raniyu asu Sisas ai hüfu farifi sesi fondihü mamaru. ³⁸ Raniyo asu Farisi nindou ranai Sisas wari popaikoate nimarü sesi ra masesuwa hepünimefiyu. ³⁹ Adükari ai hoafiyundühi yahuya, “Farisi nindou seana hoe simindi hipiri asu sesi foefe sesi hipiri ra moanambüh-ane ndoru popoaiarihoemo. Ŋga sihamundi wagabeyahi ana hümbuhüni hohoanimo asu muŋguambo moaruwai hohoanimoane amaropuri. ⁴⁰ Seana hihindi hohoanimo-yomondeimb-anemo nimboe sapo God weindani nafimarandi ai wagabe-amboani nafimarandi. ⁴¹ Nine hohoanimo aboedi sihamundi ŋgusüfoambe amaropuri ranambo nindou didiyei nine napo mbonimbo-arihümündi ranaheimbo fandihaundüri. Rawarundi animbo asu sihamundi muŋguambo moatükuni ra aboedi yangirindimboe.

⁴² Farisi se hipoanimboembou-anemo! Nimboe sapo seana muŋguambo akidibou sesambefembo moatükuni wambüfi nahurai ranane se

yimunggurundümo mburu asu 10 ranahandi ngorü bidifiri ra Godimbo yiboboru asihoemo. Nga seana mbumundi hohoanimo asu Godimbo ngusüfo pefembo hohoanimo ranahambo hiniᅅgirumboanemo. Se rani hohoanimo ra afindi hohoanimo-ndimondühi asu se ngorü ahinümbi ra hiniᅅgife poani.

⁴³ Farisi, se hipoanimboembou-anemo! Nga seana Suda-yafe rotu wori ranambe bogorimbofe nimarimboanemo hohoanimoemo. Asu nindou ai sihamumbo nindou afindi himboahü hihifi-mbirihümuna yahomo houmboanemo.

⁴⁴ Se hipoanimboembou-anemo! Se hoeifekoateimbi yif-ambe nahurai-anemo. Nindou yif-ambe ranahambo fifirifekoate raniwami hei hehi asu raninambo moaruwai tükümehindi. Yahurai-ane sihamundi moaruwai hohoanimo wagabe ragu amaropuri ranai nindou-yafe hohoanimo moaruwaimbo-ndeandürimboe,” mehu.

⁴⁵ Nindou mami ahinümbi hohoanimo fifireandeimbi ai hoafiyuhi yahuya, “Yamundo-randeimbi, se rani hoafi Farisimbo hoafayafi ranana yihoefombo kameihi moaruwaimbo-rowamunühanafi,” mehuamboyu.

⁴⁶ Asu Sisas ai hoafiyuhi yahuya, “Ahinümbi hohoanimo fifirundeimbi, Se hipoanimboembou-anemo. Seana nindou bidifiriyei daboahamindiwami nimboreimbi mbisahümündi yahomo houmbo hüputüpuründümo nandundühanemo. Asu seana ngiri akidou-amboani wari pandundi nimboreimbi moatükuni aheiwami manandundi ranahambo farihefendüri hefe semindimbo, nga wani.

⁴⁷ Se hipoanimboembou-anemo! Nga seana Godindi hoafi hoafiyomo rundeimbi sihamundi amoao mami hifokoa-marupuri ranahamundi yifambe yihururu arundi. ⁴⁸ Seana nafuiyomo-ndühanemo, sapo sihamundi amoao Godindi hoafi hoafiyomo-rundeimbimbo hifokoamarüपुरi ranahambo aboed-ane yahombo. Nimboe sapo ai ahamumbo hifokoamarüपुरi, nga se ahamundi yifambe yihururu arundi. ⁴⁹ Asu aboedi ndorihoayoweimbi hohoanimo Godindi-mayo ranai hoafiyowohü yahoya, ‘Ro Godindi hoafi hoafiyomo-rundeimbi asu hoafi sowandümo homo-rundeimbi ra koandihe-heapurani bidifiri hifokoandupuri-mboemo, asu bidifirambo moaruwaimbo-ndüpurimboemo,’ meho ⁵⁰ Muᅅguambo nindou hapondanambe ai hütiyomo Godindi hoafi hoafiyomo-rundeimbi hifikoamarüपुरi. Horombo God ai hifi nda nafirandambe peyo haya sinimbo hapondadidi nimorehi nindowenihi burayei aheimbo yagodimboe, nga rani süᅅgumbo animbo tiᅅirifo ndahümündimboyei. ⁵¹ Ai nindou hifokoako-marüपुरi Aber nüᅅguwami piyo haya sini Sekaraia nüᅅguwami kikire hiniᅅgimareandi. Nga asu ranahambo Godimbo sesi sihefe fondikimi Godindi worambeyo kefoaru marundi. Muᅅguambo moaruwai hohoanimo ranahandi hüti ra nindou hapondanambe burayei aheimbo rani süᅅgumbo animbo tiᅅirifo ndahümündimboyei.

⁵²Ahinümbi hohoanimo fifirundeimbi, se hipoanimboembou-anemo. Iŋga seana fifirife aboedi semindimbo-mayo ranahambo yipuri papiru hiningirundühanemo. Iŋga seana sihamundihoari kefoundühiyomo-poani, ŋga asu bidifiri ai kefoefe fifirife semindimbo seiani-ane asu se nafi gürarundüri,” mehu. ⁵³Sisas ai wori nimarümbi ra hiningire hayambo hu-ane ahinümbi hohoanimo yamundu-rundeimbiyomo asu Farisiyomo ai ahambo moaruwaimbo-rüwurühi düdu-düumaruri. ⁵⁴Ai ahambo refi hoeifyuwani asu aboedi simbori hoafikoate-nduani ahambo papi-hoafindihuri yahomo houmboemo ramarüwuri.

Farisi-yomondi yimbu yafambeimbi hohoanimo ranahambo hibadumbo
(*Matyu 10:26-27*)

12 ¹Nindou afindi tausen gugureandühiyo asu simbori tijari yipütapürimaye. Raniyu asu Sisas ai ahambo süngrurü-rundeimbimbo boatei hoafiyupurühi yahuya, “Se Farisi-yomondi fufudigoyo-randeimbi moatükuni yis ranahambo hibadumbo. Ro hoafayahi ranana ahamundi yimbu yafambeimbi hohoanimo ranahambo anahi hoafayahi. ²Nine-moatükuni muŋguambo hapondanambe gabudambe engoro ranana asu süngunambo weindahi gabudiwami nimoamo yagodimboe. Asu nine-moatükuni muŋguambo dibo mengoro ranai weindahi fifinde fifindendamboe. ³Nine-moatükuni nimbi nimaröani hoafimaye ra asu si peyowohü himborindeimboyei. Asu nine-moatükuni se-dibo yipuri parihi hehi hoafi simoasinambo wataporimbo-marühündi ra weindahi wori bogimondiwami nimboeimbo puküna hoafindeimboyei,” mehu.

Sihiri Godimbo yanggiri animbo yihimbo-ndihurimboane
(*Matyu 10:28-31*)

⁴“Wandafi mami, ro siheimbo hoafehandüri, nindou fi hoeari yanggiri hifokoaru arundi ranahambo se yihimboyopoani, ŋga asu ŋgiri yifiafi ana hifokoandundi. ⁵Iŋga ro daboe yihimbombo ra siheimbo hoafindamboyahi. Godimbo se yihimbondei sapo ai animbo hifokoefe mburimbo hai ŋgoafinambo koarihefe rambo ŋginindeimbayu ranimbo-hünda. Anihondane, mami ranahambo yanggiri animbo yihimbondefomboane. ⁶Ndu akidou hondahüfeimbi ra yimbu toeanambo yanggir-ane pemiyei sahümündi arihündi. Iŋga asu God ai ŋgiri mamamboani mitanindamüdu. ⁷Iŋga asu God ai nüngunümbi mbirinanäyo sihafi mbiroambe amaro fifireamboani. Ranimbo-animbo se yihimbo-ndeimboyei, seana Godindi himboahü ndu akidou ranaheimbo ŋgasündi-hindürimboanei,” mehu

Sihiri yihimbokoate Sisasindi ndüri weindahi hoafindefomboane
(*Matyu 10:32-33; 12:32; 10:19-20*)

⁸Sisas ai hoafiyuhi yahuya, “Ro sihamumbo hoafepuri nindou düdi nindou himboahü nüngumbo ro Sisasimbo anihondumbo-rihinimboanahi

ehu ana, simbori nindou ranahandi ndüri Nindou Hondü ro Godindi sünambeahindi nendi-yomondi himboahü nindou ranana wandani mbisamboyah. ⁹Ŋga asu nindou düdi nindou himboahü nüngumbo wamboya moai ahambo anihondumbo-rihini ehu ana, asu simbori amboani Godindi sünambeahindi nendi-yomondi himboahü ai wandiyupoani mbisamboyah. ¹⁰Nindou düdi ai Nindou Hondumbo moaruwai hoafayu ana, God ai amboawi mbüstumbui. Ŋga nindou düdi ai Yifiafi Aboedi ranahambo moaruwai hoafayu ana, God ai ngiri amboawi mbüsu, Ŋga wani. ¹¹Ai sihamumbo rotu worinambo papi-hoafi himboriyomo-rundeimbi asu bogori nindou-yomondi himboahü ndowapundümo ngomondani ro nüngunahurai asu nini hoafi hoafimandefi mbisimo houmbo ranahambo afindi hohoanimondimboemo. ¹²Mami rani-simboani animbo se nine hoafi hoafimbo ra Yifiafi Aboedi ranai sihamundi hohoanimoambe horinde dagapurimboe,” mehu.

Kaki afindeimbi nindoundi hihindi hohoanimo kafeefe hoafi

¹³Nindou afindi gugure megoro ranambeahindi mami ai hu Sisasimbo hoafiyuhi yahuya, “Nindou yamundo-randeimbi, se wandi amonjoambo hoafindafani ai apendi-mayo napo yihoehi ra yibobondihoa-mindembo,” mehuamboyu. ¹⁴Asu Sisas ai hoafiyundowohü yahuya, “Didi ai hoafimayuwamboyo ro sihafandi papi-hoafi himboriyohü yibobofembo rana?” ¹⁵Asukai hoafiyundürühi yahuya, “Se ndondihi hibadihümbö, Ŋga munguambo moatükuni semindimbo afindi hohoanimondimboemo. Ŋga se ngiri koadürü koadürümbo niŋgo napo ranifihü ndowandifi,” mehu.

¹⁶Sisas ai kafeefe hoafi ra wataporimbo-randühiya, “Nindou napo afindeimbi mami ranai hifi ranifihü nümbüri hifireandani afindi safimayo. ¹⁷Nindou ranai aimbo nimarü hohoanimoyuhüya, ‘Ro nini nüningundiheambo, Ŋga nümbürambeahindi sesi ra kurifembo fondi wanayo,’ mehu. ¹⁸Raniyu asu hoafiyuhüya, ‘Awi ro nda süngundihea. Wandi sesi wori ra mungu biriboadihe mbundihambo mami afindi worimbondihü mbundihambo wit asu amuri napo ra kundihamboyah.’ ¹⁹Ranimbo wandifimbo hoafindahühiya, ‘Hapoana afindi himboani aho ra sesimbo aboedi napo ra wanjei-ane. Ŋga nimandefi sesi ra dagudifi hoe ndimindifi raraondihundühi hihifi-hihifindifo,’ mehu. ²⁰Ŋga asu God ai hoafiyundühi yahuya, ‘Seana ngusufokoate nindou-anafi! Hapo nimbikoani animbo se yifindamboyah. Ŋga asu nindou didi ai napo sihafimayo ndorandifi masihawandi ra mandemünda?’ mehu. ²¹Yahurai animbo nindou didiyei napo afindeimbaye aheimbo tükündifemboe, Ŋga aiana Godindi himboahü napo-koate-anei,” mehu.

Ŋgusüfo pukiyowohü afindi hohoanimoyo hoango hoafi

(Matyu 6:25-34)

²²Sisas ai ahambo süngrurü-rundeimbimbo hoafiyuhi yahuya, “Ro sihamumbo hoafehapuri nda, Se nini sesi madagudifi mbisimo

asu nini hoeari yihoefi fi gabudimandihu mbisimo houmbo afindi hohoanimondimboemo. ²³ Yangiri ningo ranane adukari hamindayo, nga sesi ana moanane asukai fi-ane adukari hamindayo, nga hoeari ana moanane. ²⁴ Asu awi se ndu nimoamo ahahabodei ranaheimbo hoeirunduri. Ndu ranai ana moai nini-moatukuni hoari hifikarihi, sesi yimungurihumundi hei worambe sihehi raraorihundi, nga aheimbo ana God ai sesi ra sagaduri arandi. Nga seana ndu ranaheimbo ngasundihindurimboanei. ²⁵ Se rani-moatukunimbo afindi hohoanimoyafi ranai ngiri fandiheninani akidou geduhi safi yangiri nimbafi. ²⁶ Asu se akidou moatukuni yahurai ra ndofe hifandiyokoate-ayafi ra asu nungundo adukari moatukuni ra hibadimandanda?

²⁷ Nungure hayamboyo wohi ahuriyei arihundi ra hoeiru, aiana moai ahei fimbohunda hoeari kakiyei asu ratupuriyei rihundi. Nga ro sihamumbo hoafehapuri horombo adukari bogori Soromon ai napo afindeimbiyu, nga ahandi yihuru aboedi yihurumaramundu ra wohi ahuri ranai Soromonindi yihuru ra ngasundeamboane. ²⁸ God ai wohi hapondani yangiri amaro ra hifihu hoeari yihurure hiningireanduhani, nga asu sumbo ana haiambe pifemboane. Se akidou anihondumbofe-koate-yomondeimbi God ai sihamumbo amboa hoeari yihurundeapurimbui. ²⁹ Se nini sesimboyo mbisei asu nini simindiramboyo mbisei hehi ranahambo afindi hohoanimondei ngeimboyei, nga yowani. ³⁰ Godimbo anihondumbofe-koate-yeimbi ana mungu moatukuni ra semindimboane hohoanimoyei, nga Ape God ai fifireamboani se semindimbo afindi hohoanimoyei ra. ³¹ Nga God nginindi hifandarandi ranahambo kokondudani animbo rani amboani dagapurimbui,” mehu.

Aboedi napo gugurife hohoanimo

(Matyu 6:19-21)

³² “Sipsip afindifuri ra se yowani yihimbo-ndeimboyei, nga nduhi suhisi, sihei Ape ai siheimbo amboani nginindi hifandarandi ranambe hifandiyondurimbo yifirayu. ³³ Se sihamundi napo ra kakifih koandihou mbundu asu napo-koate-yeimbi ranaheimbo kaki ra dabuduri. Se kaki foefe hipiri yahurai ndowandumo nimai moaruwaiyo rakoate-yoweimbi asu rananimbo aboedi napo sunambe gugurindundi. Ngiri sunambe ana fandihoyo, ngiri humbuhuni nindou ndahumundi asu susimbumi ai dagudi. ³⁴ Sihei ngusifo ana sapo nahi sihei napo yangorih animbo kundarimbui.”

Nafindihumindi nimandimbo hibadihundi

(Matyu 24:45-51)

³⁵ “Se hoeari yihuru-rihumundi amarei nou nine-moatukuni tukufemboayo ranahambo hibaduhunduhi sihei ram ra yimundihinda

simbeyowamboane. ³⁶Se ratüpuriyei rihündeimbi nahuraindeihī asu ahei bogorimbo nindou ai nimorehī semindimbo si ra hu mbura asu hihirifi huani nou hibadihori. Ai sūfu yipuri fihī pirako-pirakondandani nimai yipuri sūbūdihehindi. ³⁷Asu ahei bogori nindou ranai hu himboyuwani yapombofekoate yaŋgiri nimarei ahambo hifandarihori ana, ai hihifi-hihifindei. Ro siheimbo anihondūmboanahi hoafehandūri bogori nindou ranai ahandi warihoandarūmbi ŋgisihari hoeari ra yimūndihai mbunda hoafindūndūrani sesi fondikimi nimandeiani dūdi sesi dagadūrūmbui. ³⁸Ratüpuriyei-rihündeimbi ranai nimbi mbusūmomboyoy asu si hoafimboyoy hifandihūmbo nimareiani ahei bogori nindou ranai hu hoeiareandūri ana, ai hihifi-hihifindeimboyey. ³⁹Se fifindihindi sapo wori aharambūri ranai nini-simboaniyo hūmbuhūni nindou tūkūfemboayū ra fifirareandi ana, tūkūndafu hūmbuhūni-ndimboemo mbūsi haya gūnde nimandūmbui. ⁴⁰Ranimboane se-amboani hibadihūmbo, ŋga Nindou Hondū ranai tūkūfembo ra mitani-rihūmūndi hehi hidibo-hidiboyeiambe animbo kudūmbui,” mehu.

**Nindou ratüpuriyafani-rinandeimbi aboedi asu moaruwai
ranahafandi kfoefe hoafi
(Matyu 24:45-51)**

⁴¹Pita yahuya, “Adūkari hoafayafi nda yihoefimbo yaŋgiriyaŋgi asu muŋguambo nindoumboyafi?,” mehuamboyu. ⁴²Simbori Adūkari ai hoafiyuhi yahuya, “Nindou dūdi ai aboedi ndore anihondūmbo fifireandeimbiyu haya aboedi ratüpuriyu randeimbeyua? Nindou ranahambo ahandi bogori nindou-mayu ranai anihondūmbo-riri hayambo wambo worambe sesinapo eŋgoro ra hifandiyohū ratüpuriyomo rundeimbi nindou ai sesi semindi simboani segupuri rambohūnda kaboadiri hiniŋgindirūmbui. ⁴³Nindou ranahandi bogori nindou ranai worambe tūkūfi hoeirirani ratūpurayū ana, moani afindi hamindi hihifi-hihifi-mbiyuwamboane. ⁴⁴Ro sihamumbo anihondūmboanahi hoafehapuri, bogori nindou ranai nindou ranahambo ahandi muŋguambo moatūkuni ranahambo hifandimbo bogorimbondirū hiniŋgindirūmbui. ⁴⁵Ŋga asu nindou ranai yare hohoanimoyuhūya, ‘Awi, wandi bogori nindou ranai ŋgiri nimehūnou hihirindūfi dūdu,’ yahu haya bodimondi ratüpuriyei rihündeimbi nimorehī nindowenihi ranaheimbo bubuhaiyu sesi sesū bia ndūmūndū haya hihindi hohoanimondūmbui. ⁴⁶Ŋga asu bogori nindou ranahambo ahandi ratüpuriyu-randeimbi ranai mami simboani ŋgiri tūkūndifiyu mbūsi haya hidibo-hidiboyuambe animbo tūkūndūfimbui. Ranimbo bogori nindou ranai bubundūri mbunda koandihairani ŋgu nindou bidifiri himborikoate-yei rihündeimbi babidimbo nūngumbui.

⁴⁷Ratūpuri-yurandeimbi ranai ahandi bogori nindou ai refembo yifirayū ra fifireandi, ŋga ai refekoate-yu, asu bogori nindou ai yifirayū

süngufekoate-ayu ana, bogori nindou ranai afindimbo bubundurumbui. ⁴⁸ Ijga asu ratüpuriyu-randeimbi ranai ahandi bogori nindou yifirayu ra fifirifekoate-yu haya ndofe ratüpurikoate-ayu ana, asu yimbumamimbo safi bubumboani. Sapo nindou didiyei afindi hamindi masahümündi ana, asu simbori afindi hamindi mbisehindamboane. Asu nindou ranahei warihü afindi hamindi asihehindi ana, asu simbori afindi masihehindi ra ngasündeandeimbi segodürimbo hohoanimombeye-amboane.”

Sisas ai nindou yikürübüfe-ndürimboyu makusu

(Matyu 10:34-36)

⁴⁹ “Ro makosahi nda hifi ndanihü hai püpfemboyahi makosahi asu hai ranai yimbeyowa sahehea yifiar-ayahi. ⁵⁰ Nindou hoeambe hundürayei nou ro asübusi afindeimbi hundürü-ndamboyahi, nga hundürü ra awi moai hundürüyahi ranimboanahi ngusüfo sihayahi. ⁵¹ Se randihi hohoanimondeihya, ‘Ai ana yifiari yifiari hifi ndanihü engoro ra kikifembo makusu-ane,’ mbiseimboyei, nga wani. Ro moai yifiari yifiari ranahambo kikifembo kosahi, nga nindou yikürübüfe-ndürimboyahi makosahi. ⁵² Hapondani peyo haya aho ra nindou mami ai ahandi fikiminindi hondahüfeimbeimbayu ana, yibobondahimboyei. Rananimbo yimbumbündafe asu ngorü ngimeimbinde hehi simbori simborindeimboyei. ⁵³ Rananimbo yibobondahi mbundihü, nindowenihi nimori ai afindambo asu afindi ai nimorimbo hürütüri-ndamboyafani. Asu nimorehi ai ahandi nimorehi nimori-dibo simbori hürütürindafe asu yamongoamindoho ai simbori hürütürindafe rarandeimboyei,” mehu.

Munguambo nindou nine-moatükuni tükefeyo ranahandi

nimindi moai fifirihindi

(Matyu 16:2-3)

⁵⁴ Sisas ai nindou afindi ranaheimbo hoafiyundurühi yahuya, “Se hoeirihindani hüfihamindi hanuwanipoedi hoenimbañi sifowani hoeirihindühi hoendimboe seiani asu hoeyo arandi. ⁵⁵ Asükai se hoeirihindani ngirisafinipoedi weri sifowani yahimondimboe seiani asu yahimoyo arandi. ⁵⁶ Seana yimbu yafambeyeimb-anei, sapo se fifirihimboanei nine moatükuni hifini asu sünambe tükefeyo ra. Asu nimboe nine-moatükuni hapondani God ai ratüpurimayuwa tükefeyo ra fifirifekoate-ayeia?” mehu.

Düdi sihambo hoafimayunini dibo hoafi didiboadondowandi

(Matyu 5:25-26)

⁵⁷ “Nimboe sihafihuari yibobofekoate-ayafi nine-moatükuniyo abodayo ranahambo? ⁵⁸ Asu nindou ngorü ai sihambo papi-hoafiyoninimbo mbüsü haya yibobore-randeimbi sowana hoafi himborimbo ndemündünini nguani

ana, se nimai ngafi nafini aboedi-aboedi-ndafineandi. Asu se refekoate-ayafandi ana sihambo papi-hoafi ranini-randeimbi nindou ranai hoafi himboriyu randeimbini warihundeana, prisma ai karabusambe hiningindeaninimbi. ⁵⁹Ro anihondumboanahi sihambo hoafehanini, se rando nimandifimbo kaki pemindafi mehomo simogodühi pemayafi animbo tükundafoamboayafi,” mehu.

Nindou düdi anihondümbkofekoate-ayu ana awarindihombui

13 ¹Rani-simboani nindou bidifiri ranai Sisasimbo rarihi hoafiyehiya, “Nindou Garirihüdi bidifiri ai ninihondi hifokoaru Godimbo sihoundane Pairat ai hifokoamareapuri. Raniyo asu ahamundi hori ra ninihondi hori Godimbo saimbo hifokoamarundi rani bitapire mamikarimayo,” masei. ²Sisas ai hoafiyuhi yahuya, “Rani-moatükuni tüküme Feyo ra se rarihi hohoanimoyeyani ahei moaruwai hohoanimo ra Garirihüdi bidifiri ranahei moaruwai hohoanimo ra ngasündeamboyo? ³Wani, nga ro anihondumboanahi hoafehandüri, Se sihei hohoanimo ra didiboadofe-koate-aye ana, munguambo siheimbo amboani yahurai tükündifendürimboe. ⁴Asu nunguriyei 18 nindou Siroamihüdi aheimbo nimoei wori hoandari piyowohü hifokoamareandüri rana? Se rarihi hohoanimoyeyani, Nindou worinambo hifokoamareandüri ranahei moaruwai hohoanimo ra Serusaremihüdi bidifiri ahei moaruwai hohoanimo ra ngasündeamboyo? ⁵Wani, nga ro anihondumboanahi hoafehandüri, se sihei hohoanimo ra didiboadofe-koate-aye ana, munguambo se-amboani yifindeimboyei,” mehu.

Nimi hisiyo rakoate ranahandi kafeefe hoafi

⁶Sisas ai mami kafeefe hoafi wataporimbo-randühi yahuya, “Nindou mami ai ahandi wain nümbürambe süfuri nimindi ra hifimareandi. Raniyo süngunambo süfuri nimindi ra hisiyohüpo yahuhaya mahu, nga moai hisi mamamboani hoeireandi. ⁷Raniyu asu nindou ranai ahandi nümbürambe ratüpuriyu-randeimbi ranahambo hoafiyundühi yahuya, ‘Ro süfuri nimindi nda ngimi himbani sini himboyarihanda moai hisiyorandi, nga hitiboadowandi. Ai hisi-koate moani hoangire haya ningombo nümbüri hifi bidifiri gabudarandi,’ mehu. ⁸Iga asu ahandi ratüpuriyu-randeimbi ranai simbori hoafiyundühi yahuya, ‘Ritifo, awi moani mami himbani ningo hoeireandühi animbo, nga hisimboyohüpo. Asu awi ro nimi rani-fikimi hifambi kakindühi mbundiha, asu yafisühumi afümambe püpindühi hoeindiheamboayahi. ⁹Randihe hoeindiheandane ngorü himbani ra hisindoani ana, aboed-ane, nga hisi-koate-ayo ana, hitifoefemboane;’ ” mehu.

Sisas ai moani ngoafimbo nimarimbo sihi nimorehi mami aboedimareandi

¹⁰Sisas ai Suda-yafe moani nimarimbo si ranambe ahei rotu worambe yamundimareandüri. ¹¹Raniyo ranihü nimorehi mami, 18 himbani

ahandi fiambe moaruwai nendi nimarimbo amoefoe semindi haya homarandi. Asu ahandi daboadi hamindi ra fare hayamboyo asu moai mbumundi botife niŋgorandi. ¹²Raniyo Sisas ai hoeireanda mayoa mborai mehundowa mahowa hoafiŋyundühi yahuya, “Me, hapoana aŋgünimbomayafi ra aboedi anafi,” mehu. ¹³Sisas ai ahandiwami wari manande-andamboyo asu nimehünou mbumundi botife niŋgombo Godimbo aboed-ani yaho ŋgusüfo pamareri.

¹⁴Raniyo Suda-yafe rotu wori hifandandeimbi bogori ranai ŋginindimayu Sisas ai moani nimarimbo sihi nimorehi aboedimareandi ranimbo. Nindou ranai hoafiŋyühi yahuya, “Sapo 6 si-ane ratüpurimbo siayo. Iŋga sapo aboedifembo ana, rani si animbo refemboyosi, ŋga moani nimarimbo si ana yowan-ane,” mehu. ¹⁵Adükari ai simbori hoafiŋyühi yahuya, “Seana yimbu-yafambeimbi nindou-anemo! Asu se moai sihamundi burimakau asu dongi ra muŋguambo si asu moani nimarimbo sihi ranamboani wofi fufurihoundüri mburu hoe simindimbo sowandümondüri homo rundiyo? ¹⁶Nimorehi ro aboedimariheandi, nda ai Abrahamindi nimor-ane, asu ahambo Satan ai 18 himbani kikihiramündi manüngu-ane. Asu ro ahambo moani nimarimbo sihi aboedambo-fembo ra ahinümbiyo.” ¹⁷Sisas ai yare hoafiŋmayu-wamboemo asu ahandi hürütümbi-memo ranai amoaniŋambo-mefundi. Iŋga asu bidifiri afindi meŋgoro ranai aboedi moatükuni ramareandi ranimbo hihifi-hihifiŋmayei.

Sisas ai hoari akidouhündi adükari tüküfembo kafoefe hoafi hoafiŋmayu
(*Matyu 13:31-32; Mak 4:30-32*)

¹⁸Sisas ai hoafiŋyühiya, “God ŋginindi hifandarandi ra nünŋunahuraiyowa? Asu ro nünŋundihe yibobomandihea? ¹⁹Ai rahuraiane, nindou mami ai ahandi nümbürambe mastet hoari hambomo nahurai akidou hifireandühani. Asu hoari akidou ranihündi adükari tikoani nahurai niŋgowani, ndu ai raniwami ŋgeramborühi arihündi,” mehu.

Fufudogoyo-randeimbi moatükuni yis ranahandi kafoefe hoafi
(*Matyu 13:33*)

²⁰Asükai Sisas ai hoafiŋyühi yahuya, “Ro asükainda God ŋginindi hifandarandi ranahambo nini-moatükuniŋihi yibobomandihea? ²¹Nimorehi ai fufudogoyo-randeimbi moatükuni yis semindi haya wambürambe fraua bubufoare mbura yis ra babifoareandani fufudogoyo hafo nahuraiane,” mehu.

Nafitambe akidou nafi ho
(*Matyu 7:13-14, 21-23*)

²²Sisas ai Serusareminambo huhüyu muŋguambo adükari ŋgoafi asu akidou ŋgoafi aheimbo wataporimbo-marandüri hu. ²³⁻²⁴Nindou

ngorü ai Sisasimbo hoafiyundühi yahuya, “Adükari, yimbu mami nindou yangiri aboedambo-mandahindiyo?” mehuamboyo. Ai simbori hoafiyuhi yahuya, “Yipuri nafitambe akidou ranambe kefoefembo hütihütindei, nga nindou afindi ai-amboani hütihüti-ndeimboyei ranambe kefoefembosi, nga ngirindei. ²⁵Süngunambo wori aharambüri ai yipuri papareandi ana, se weindani nimboeimbo yipurifihi pirako-pirako-ndihündühi animboya, ‘Adükari, yipuri sübüdühawamuni,’ mbiseimboyei. Nga simbori hoafindühiya, ‘Ro moai siheimbo fifiriheandüri,’ asu ‘Se nahani-hündamboyei?’ mbüsümbui. ²⁶Ranimbo se hoafindafühiya, ‘Ro se-dibo sesi sahusifi hoe simindefi asu yihoefi ngoafi nafi hohü yamundowamuni marandi’ mbiseimboyei. ²⁷Asu ai siheimbo hoafindühi animboya, ‘Ro moai siheimbo fifiriheandüri, nga asu nahani-hündamboyei? Andai ragu, nga seana moaruwai hohoanimoyei rihündeimbanei,’ mbüsümbui.

²⁸Se aranindeihi asu yahafi hitihündühi nimboeimboyei, nga Abraham, Aisak, Sekop asu Godindi hoafi hoafiyomo-rundeimbi ai God hifandarandi ranambe nimandeimboyei, nga asu siheimbo ana ragu moeindani pindihirimboyei. ²⁹Ranimbo nindou afindi ai hüfihamindi süfuwanipoedi, hanuwanipoedi, himbori yimbunipoedi ai God nginindi hifandarandi ranambe sesi fondikimi tükündahi nimandeimboyei. ³⁰Ranimbo nindou didiyei haponda adükarimboehindi aiana süngunambo akidoumbo-ndahimboyei, nga akidoumboehindi aiana süngunambo adükarimbo-ndahimboyei,” mehu.

Sisas ai Serusaremimbo hipoambo-marandi

(Matyu 23:37-39)

³¹Rani-simboani Farisi bidifiri ai sifomo Sisasimbo hoafiyomondowohü yahomoya, “Andai ndanühündambo ragu hafi, nga Herot ai sihambo hifokoefeninimbo yahumboani!” mehomo. ³²Sisas ai hoafiyupurühi yahuya, “Ngomo nindou sisindira randeimbi ranahambo hoafindimo, nga hapo sümbo ana ro moaruwai nendi fiambe nimareimbi raganambo-riheandüri asu nindou aboedambo-riheandürühi anahi. Nga asu ngimi si animbo wandi ratüpuri ra moendindi-heamboyahi. ³³Asu ro hapo, sümbo, asangu ranana nafi ngamboyahi. Nga sapo Godindi hoafi hoafiyurandeimbi ana ngiri amurühi hifokoandüwuri, nga Serusaremihi animbo hifokoandü-wurimboemo.

³⁴Serusarem, Serusarem! Seana Godindi hoafi hoafiyomo-rundeimbi sihambo sowana koehefepura masinimo ra nimoeinambo hifokoaroapuri arandi. Ro afindimbo sihafi nindou ranaheimbo kakaro hondi nimori gugureandüri mbanendi hoareharamindo nou mbanendi hoarehi-fendürimbo samboyahi, nga moai se yifiriyei. ³⁵Haponda sihafi wori ranambe nini akidou-amboani yangorikoate wori yangiri hamindindimboe. Ro hoafehanini, se ngiri hoeindi-hindiri, nga ngombo

se wambo randihi hoafindeihiya, ‘God ai aboedi-aboedi-mbiriramboane Adükarindi ndürinambo akusu nda,’ mbiseimboyei,” mehu.

Sisas ai nindou aḡgünümbi aboedimariri

14 ¹Moani nimarimbo sihi Sisas ai Farisi bogorindi worambe sesi sesimbo mahuwa nindou ai ahambo ndortuwuri himboari safühimarüwuri. ²Ranihü nindou mamü yiriwari fiyuweimbi mamaru. ³Raniyo Sisas ai Farisi nindou-yomo asu ahinümbi hohoanimo fifirundeimbi-yomo ahamumbo hoafiyuhiya, “Moani nimarimbo sihi ra nindou aboedifemboyo asu yowanio?” mehu. ⁴Ḳga asu ai moai ahandi hoafi simbori hoafiyomo. Raniyo asu Sisas ai nindou ra serümündü aboediriri mbura koamarherü.

⁵Sisas ai ahamumbo hoafiyupurühiya, “Sihamundi nimoriyo asu burmakauyo ai moani nimari sihi feamongoambe pirayo ra nimai hümändihouyo asu wanimändiyo?” mehu. ⁶Raniyomo asu moai ahambo simbori hoafiyomondo.

Se yowani sihafi fimbo roana ndorihehe-andeimb-anahi yahopoani

⁷⁻⁸Sisas ai hoeireapurane nindou sesi sesimbo hoafimayua tüküme fundi ranai nimarifondi aboedi hamändiwami nimarimbo hohoanimo-memonda yare hoafiyuhiya, “Nindou ḡgorü ai sihambo nimorehi semindambe sesesimbo hoafinduanü ḡgafühi ra se nimarifondi aboedühi ndowandimboyafi, ḡga nindou ndorihoeimbi ahambo amboani hoafiyomondowohüpo. ⁹Nindou sihafanimbo yiboboambo hoafimayupira mahafani ranai düdü sihambo hoafindühiya, ‘Nindou ndanahambo sihafi-mayo fondi ra sabado,’ mbüsümbui. Randifiyuwani asu se amoanḡḡindafi mbunda ḡgafi bidifirani fondiwami nimandimboyafi. ¹⁰Ḳga sihambo hoafindeiani ḡgafühi ra fondi sapo akidou yahurḡḡoahuri safi-mayo raniwami animbo nimandifi. Rananimbo sihambo hoafimayunina mahafi ranai ḡḡu hoeindeaninani wani hoafinduhüya, ‘Wandafi, fondi aboedühi ndaniwami sühüfi nimarifi,’ mbüsüwani asu bidifiri amuri mafandihindi ranai sihambo nindou adükar-ani mbiseihü ahinindeimboyei. ¹¹Nindou didiyei ai ahei fi botarihindi ana, God ai hiḡḡinambo-ndearümbui. Asu nindou didiyei ahei fi hiḡḡinambo-arihindi ana, God ai aheimbo botindearümbui,” mehu.

Se takini ndowandimboyafi

¹²Sisasimbo nindou hoafimayundoa mahu ranahambo hoafiyundühi yahuya, “Hüḡḡinimboyo asu nimbambeyo sesesimbo ra, se yowani sihafi ḡḡunindi, fikiminindi, boagiri, sihafi napo afindeimbi wandafi aheimbo yangiri mborai yahopoani. Asu simbori amboani ḡḡorüsimboani hoafindeiani ḡḡafani sesi ndahüninimboyei. ¹³Ranamboasi, ḡga se sesesi-ndafühi ra napo-koate-yeimbi,

fi moaruwaiyeimbi, tiŋari moaruwaiyeimbi asu himboatihariyeimbi aheimbo animbo mborai mbisafi. ¹⁴Ranimbo God ai sihambo aboedi-aboedindeaninimbui, nimboe sapo aiana napo-koate-wambo asu ŋgiri simbori nini ndehindi. Ŋga aboedi nindou ai yifihündi botiyahindi simboani God ai takini daganinimbui.”

Sisas ai nimorehi semindi simboani sesesimbo kafoefe hoafi hoafimayu
(*Matyu 22:1-10*)

¹⁵Mami simboani nindou mami sesi fondiwami Sisas-dibo nimarumbo God ŋginindi hifandarandi ranambe nimareimbo seses-aye hoafi ra himboriyu haya hoafiyundühi yahuya, “Nindou ranai hihifi-hihifimbeyei-amboane,” mehuamboyu. ¹⁶Sisas ai hoafiyundowohü yahuya, “Nindou mami ai afindi sesesimbo hohoanimoyu haya nindou afindimboya ‘Mborai’ mehupuri. ¹⁷Mami munguambo sesi sindi nafiramindoani ahandi ratüpuriyu randeimbimbo hoafiyundowohü yahuya, ‘Nindou ro hoafimehapuri ranahamumbo sowana hafi hoafiyafipurühi animboya, ‘Mborai, munguambo sesi sindi nafiramindimboane’ mbisafi.

¹⁸Ŋga asu munguambo nindou ranai moeimbo ŋgiri didefi mehomo. Ŋga ŋgorü ai boatei hoafindühiya, ‘Ro hifi pemiya heheambo wamboanahi ŋga hoeindihea samboanahi asu ro ŋgiri didihi,’ mehu. ¹⁹Ranikimi ŋgorü ai hoafinduhüya, ‘Roana burmakau 10 ratüpuriambohünda pemiya heheambo wamboanahi ŋga randihe hoeindihea samboanahi, ŋga asu ro ŋgiri didihi,’ mehu. ²⁰Asu bidifiranambo nindou-mayu ranai hoafiyuhi yahuya, ‘Ro ana hapondani yangiri nimorehühi-yahe heheambo wambo ŋgiri didihi,’ mehu.

²¹Raniyo asu ahandi ratüpuriyu-randeimbi ai hihirifi hüfu ahandi bogorimbo nindou ai yi boaruko-memo ranahambo hoafimayundo. Raniyu asu bogori ai ŋgusüfoambe moaruwaiyuhü hoafiyuhiya, ‘Nimehünou asükai ŋgafi munguambo adükari nafihü asu munguambo akidou nafihü, napo-koateyeimbi, fi moaruwaiyeimbi, yitiŋari moaruwaiyeimbi asu himboatihari ra fufondandifindüri dügüfi,’ mehu ²²Süŋgunambo ratüpuriyu-randeimbi ai hoafiyundowohü yahuya, ‘Bogori, ro ramariheandi se hoafimayafi süngu, ŋga awi fondi aningo,’ mehuamboyu. ²³Ahandi bogori ai hoafiyundowohü yahuya, ‘Ŋgafi tükündafu hawa akidou nafi asu nimambe nafi ŋgafühi hoeindowandürühi ana hüti hoafindafani mbüsühiamboane. Ranimbo wandi fondi ra simongori-mbeyowamboane. ²⁴Ro nindou weangurühi hoafimehapuri ra ŋgiri didai-amboani wandi-mayo sesi ra apindeandi,’ mehu,” Sisas ramehu.

Nindou düdi ai Sisasimbo süngufembondühi ana ndonde
hohoanimondu hoeindeandühi animbo
(*Matyu 10:37-38*)

²⁵⁻²⁶Nindou afindi ranai ahandi süngu tümareandamboyu asu aheimbo hihirifi hoafiyundürühi yahuya, “Nindou düdi ai wambo

süngureandirühi asu ahandi hondafindi, nimorehi, nimori, akohoandi rehimami aheimbo asu ahandihoarimbo amboa afindi hohoanimoyuhü wambo akidou-yanğiri hohoanimoyu ana, nindou ranai wandi süngureandeimbi-yupoani. ²⁷Nindou düdi ai wandi süngunambo ahambo tiğirifo afindi tükefeyo ranahambo moanane yahu nginindi ningokoate-ayu ana, ai wandi süngureandeimbi-yupoani.

²⁸Sapo se afindi hoandari worimbombo hohoanimoyafi ra weanğurühi nimandifi hohoanimondafi nünğunümbi kakinambo wori nda moendimandihini mbisafi hohoanimondafi hoeindowandühi animbo randowandi. ²⁹Asu refekoate-ayafi ana, se kambohoani yanğiri fondo hiniğindo hawa asu moendifekoate-ndafani bodimondi ai shambo tirifoefe hoafi-ndahüninimboyei. ³⁰Ai randihi hoafindeihiya, ‘Nindou nda worimbo-marandiyosi, nga moai moendireandi,’ mbiseimboyei.

³¹Adükari bogori nindou nğorü ai adükari bogori nğorü-dibo yifiarimbo hohoanimoyu ana, ai nimandü hohoanimondu hoeindeandühi animbo rambüfiyuwamboane. Ai nimandü hohoanimondu hoeindeandühi animbo 10,000 ami ra 20,000 ranahambo wanğeimandiyu. ³²Asu nğirinduhü ana, bogori nğorü ai anğuniyuambe animbo nindou nğorü koandiheirani nimai hu hoafiyuwani asu aboedi-aboedi-mbeyafine-andamboane. ³³Mami rahuraiane se muñguambo moatükuni ranahambo ambe yahokoate-ayafi ana, nğiri se wandi süngurwandiri-randeimbi tükündafandi,” mehu.

Sisasimbo anihondumbo-fimbi nindou ana sor nami nahurai-ane
(*Matyu 5:13; Mak 9:50*)

³⁴Nami ana aboed-ane, nga nami ra budesowani aparikoate-ndoani nğiri ahandi aparai ra koadürü koadüründife hiniğindifeyo, nga wani. ³⁵Nami moaruwai yahurai ana nğiri nümbürambeahindi sesi ranahambo fandihendani aboedi tükündifeyo. Asu nğiri hihamoe awai bitapindihu nümbürambe diğehundi, nga wani. Iğa nindou ai moani pindihimboyei. Se didiyei himboambeimbaye ana, ndondihi himborindei.

Sisas ai sipsip mami mafarihoayo kafeefe hoafi hoafimayu
(*Matyu 18:12-14*)

15 ¹Takis kaki sowandümo-rundeimbi-yomo asu nindou ai ranahamumbo moaruwai-anemo ase i raniyomo ai muñguambo sinimo Sisasindi hoafi himbori-memo. ²Raniyomo Farisi asu ahinümbi hohoanimoyamundu-rundeimbi ai momori hoafiyomondühi yahomoya, “Hoeiru, nindou ndanai moaruwai hohoanimoyomondeimbi sepurimündü hiniğireapuri mbura asu nimarü aibabidi sesi sowasümo arundi,” mehomo

³⁻⁴Raniyu Sisas ai rani kafeefe hoafi ra hoafiyupurühi yahuya, “Nindou mami ai ahandi 100 sipsip moanğui fandandeimbi-hündi asu

mami ai afarihoayo ra nūngumandūfia? Ai amuri 99 ranaheimbo rande hiniṅgindeirani wafuwami wohi dagūdi wakindihindani animbo asu ṅgorū mafarihoayo ranahambo kokonda wakindeambui. ⁵⁻⁶Nindou ranai sipsip mafarihoayo-mayo ra kokora hoeiareandi ana nindou ranai ahandi sipsip ranahambo afindi hamindi hihifi hihifindūhi warambuhiwami nande ndemūdū haya ṅgoafina ṅgumbui. Rananimbo ahandi ṅgunindi asu woriyimbu-rineandeimbi ranaheimbo hoafiyuhiya, ‘Se robabidi hihifi-hihifindei, ṅga ro wandi sipsip mafarihoayo ra asūkai hoeiriheamboanahi,’ mehu. ⁷Ro hoafehandūri, mare yahurai-animbo nindou dūdi ai moaruwai hohoanimo hiniṅgire haya aboedi hohoanimoayu ana, sūnambe afindi hamindi hihifi-hihifi animbo tūkūndifemboe. ṅga asu nindou 99 aboedi hohoanimoyeimbi aheimbo ana ṅgiri yahurai hamindi hihifi-hihifi tūkūndifeyo,” mehu.

Kaki mafarihoayo kfoefe hoafi

⁸“Nimorehi mami ai 10 kaki ambeimbi sepurimindoane asu mami pīmayu. Rananimbo asu ram yimunde mbunda yihoarindo wakindeandūhi kokonda hoeindeamboe. ⁹Ai kokora hoeireandūhi ahandi ṅgunindi asu woriyimbu-rineandeimbi ranaheimbo hoafiyowohū yahoya, ‘Se robabidi hihifi-hihifindei, ṅga ro wandi kaki mafarihoayo ra hoeiriheamboanahi,’ meho. ¹⁰Mare yahurai animbo, nindou moaruwai hohoanimoyumbū ai moaruwai hohoanimo hiniṅgire haya aboedi hohoanimoayu ana, Godindi sūnambeahindi nendi ai hihifi-hihifi-ndimboemo,” mehu.

Nindowenihī nimori ṅgoafi hiniṅgire ṅguni mahu kfoefe hoafi

¹¹Raniyu Sisas ai hoafiyuhiya, “Nindou mami ai nindowenihī nimori yimbumarapiri. ¹²Asu akidi nimori ai afindambo hoafiyuhiya, ‘Napo sapo wambombuimbi-mayo ra ndawandiri,’ mehu. Raniyo asu afindi ai napo ra nimori yimbombo yibobomareapiri.

¹³Raniyu asu moai amitata akidi ai ahandi napo ra sagadūri mbura ranifihindi kaki ra semūdū mbura ṅguni ṅgorū hifina mahu. Ranūhi ahandi muṅguambo kaki mamikare mbirimafoareandi. ¹⁴Ahandi muṅguambo kaki ra mbirifoare hayamboyuane asu rani hifihū sesi waniyowohū asu nimori ranai worambe nini kikefoefekoate-yuhū wembombomayu. ¹⁵Raniyu ai hu nindou mami ṅgoafi aharihūndi ahandi ratūpuriyu randeimbimbo-mefiyuwa asu nūmbūrīna koamarīheira moatei ginirinambo moaṅguimbo mahu. ¹⁶Asu nimori ranahambo nindou ṅgorū ai-amboani moai sesi sagado raniyo wembomboyuhū nimi hisi hipiri moatei masahūsi ra sesimbo hohoanimomayu.

¹⁷Asu sūṅgunambo ndore hohoanimoyuwa mayowamboyu, ‘Wandi apendi ratūpuriyomo-rundeimbi aiana sesi afindi mbasihoemo. ṅga

ndanihü animboahi nda ro wembombo yifimbo yanggir-ayahi. ¹⁸ Ambehoango, nga ndühi hiniḡindihe hehea nga apembo hoafindahandowohü animboya, “Ape, ro sihambo asu Godimbo moaruwai hohoanimo-yahapirimboanahi. ¹⁹ Hapondani ana ro nindou aboediyahipoani, nga ḡgiri se wambo wandi nimori mbisafindiri. Iḡga moani se rando hiniḡindowandira sihafi ratüpuriya rihandeimbi nahurai tükündaheamboane,” mbisamboya, mehu. ²⁰ Raniyu asu nimori ranai ranihü hiniḡgire haya ahandi afindi sowana ndamefiyu. Ai anḡuni ḡgahi sünuambe afindi ai hoeirirühi ahandi nimori ranahambo hipoambomariri. Raniyu asu afindi ai pipiyu hüfu wari kafoariri haya wakikihi-marüri.

²¹ Nimori ai hoafiyuhiya, ‘Ape, ro moaruwai hohoanimo-yamboanahi sihambo asu Godimbo amboani. Iḡga hapondani ana ro nindou aboediyahipoani, nga ḡgiri se wambo wandi nimori mbisafindiri,’ mehuamboyu. ²² Asu afindi ai ahandi ratüpuriyomo-rundeimbimbo hoafiyuhi yahuya, ‘Nimehünou hoeari aboedi sowandümo sifomo yihuruwuri. Asu warambeahindi moatükuni kikifoarüwuri, yiri hoeari güdündo. ²³ Asu burmakau nimori safeimbi maningo ra hifokoandu mandu houmbo animbo dagudifihumbo hihifi-hihifi-ndefomboane. ²⁴ Wandi nimori nda yifimbomayuyosi, nga asu yanggiri haponda anḡngu! Ai mafarihoayuyosi, nga haponda hoeiarihuri,’ mehu. Raniyo ai sesesiyomondühi hihifi-hihifimemo.

²⁵ Asu amongo nimori ai nümbürambe nḡngu mbura worikimi huane gita hoafiyowohü heirümemo ra himborimayu. ²⁶ Raniyo asu ratüpuriyu-randeimbi mamimbo düdurirühi yahuya, ‘Ninimboe ndana?’ mehuamboyo. ²⁷ Asu ratüpuriyu-randeimbi ai hoafiyundowohüya, ‘Sihafi amond-ai aboedi tüküme fiyu, nga ranimboyo ape ai burmakau nimori mami safeimbi hifokoare mande hayambo sahusifühi hihifi-hihifayefi,’ mehu. ²⁸ Raniyo asu amongo ai ḡginindirirühi moai sesesi-mayei ranambo hu, nga wani. Raniyo afindi ai hu sesesi ranambe hombo hütihüti-marüri. ²⁹ Asu amongo nimori ai afindambo yare hoafiyundowohüya, ‘Ro sihambo afindi himbani moani ratüpuriya rihandeimbi nahurai hoafi himboriyahühi fariheheanini marihandi. Iḡga se moai wambo wandi wandafi babidimbo hihifi-hihifiyohü sesesimbohünda meme nimori amboani sawandi. ³⁰ Iḡga sihafi nimori ranana, sihafi-mayo kaki ra nimorehi wosihofori hohoanimoyei rihündeimbiyeyi-fihi moendire haya tüküme fiyu-ane asu ahambo burmakau nimori safeimbi ra hifokoaro mamandowando,’ mehu.

³¹ Asu afindi ai hoafiyundowohü yahuya, ‘Nimoakidou, se ro-dibo manimbafanesi, nga muḡguambo moatükuni wandi-mayo ra sihafane. ³² Sihiri hihifi-hihifi-ndefomboane nimboe sapo sihafi amond-ai yifimbo-mbuimbiyusi, nga asu haponda yanggiri tüküfi anḡngu. Asu ai mafarihoayuyosi, nga haponda hoeiarihuri,’ mehu,” Sisas mehu.

Anihondü aboedi hamindi napo

16 ¹Sisas amboani ahambo süngurü-rundeimbimbo hoafiyupurühi yahuya, “Nindou mami ai napo afindeimbiyu hayamboyu asu ahandi napo ra hifandimbo nindou ngorü serümündü hiniŋimariri. Raniyomo asu nindou bidifiri ai nindou ranahambo papi-hoafirürühi yahomoya, ‘Bogori, sihafi napo ra mbirimafoareandi,’ mehomondo. ²Raniyu asu napo afindeimbi-mayu ranai ahandi napo hifandandeimbi bogori-mayu ranahambo mborai yahundo hürüheirü mbura düdurirühi yahuya, ‘Hoafi ra nünguriyo ro sihafi ratüpuri ranahambo himborimayahi? Nga se ngafi wandi kaki raninambo nini ratüpuriyo ramarowandi ra sürü papinda ndawandi, nga ngiri se wandi napo hifanda-randeimbindafi,’ mehu.

³Raniyu asu ratüpuri hifanda-randeimbi-mayu ranai aimbo hoafiyuhiya, ‘Ro nüngumandahe wandi bogori ai ratüpuri ranambeahindi raguanambo-areandiri ra? Roana hifi hirimbo nŋinindiyahipoani asu aheimbo moako-moakombo amoaniŋgimboanahi. ⁴Ro fifirihamboanahi nine-moatükuni süngufeyowani nindou ai wambo semindindiri worinifendirimbo ra,’ mehu. ⁵Raniyo napo hifandandeimbi-mayu ranai ahandi bogorindi kaki masowandümo ranahamumbo mborai yahupuri hümarihepuri. Asu weaŋguruhindididi-mayu ranahambo düdurirühi yahuya, ‘Se nüngunümbiyo wandi bogorindi-mayo kaki masowandifi?’ mehindowamboyu. ⁶Asu ai simbori hoafiyundowohü yahuya, ‘100 adükari hipiri weriyo,’ mehuamboyo. Asu napo hifandandeimbi ai hoafiyuhi yahuya, ‘Nimehünou sihafi ndüri pairoweimbi pepa ra ndowandifi hawa 50 adükari hipiri pandowandi.’ ⁷Asukai ngorumbo düdurirühiya, ‘Se ra nüngunümbiyo masowandifi?’ mehindowamboyu. Asu ai simbori hoafiyundowohü yahuya, ‘100 bek witiyo,’ mehuamboyo, asu hifandirandeimbi ai hoafiyundowohüya, ‘Sihafi ndüri parundeimbi pepa ra sowandifi hawa 80 bek pandowandi,’ mehu.

⁸Raniyo asu napo afindeimbi-mayu ranai anihondümbo hoafikoate hifandirandeimbi-mayu ranahambo hoafiyuhi yahuya, ‘Se nini-moatükuniyo sihambo süngunambo tüküfemboayo ranahambo wudipoaporo hohoanimoyafi ra aboed-ane,’ mehu. Nga ro hoafehapuri, nindou ai hifinindi moatükunimbo hohoanimoyei arihündi ranai diboadorihoeimbi nahurai-anei, nga rananei asu nindou sürühehindeimbi ranaheimbo süngunambo nini-moatükuniyo tüküfemboayo hohoanimbo ra nŋasündarihindüri.

⁹Ro siheimbo hoafehandüri hifi ndanihündambo kaki napo rani süngumbo se nimorehi nindowenihi babidi nŋunindimboehindi, nga süngunambo kaki semindimbo ra münguyoambe siheimbo ndemündündüri worindeirani asu se koadürümbo koadürümbo nimandeimboyei.

¹⁰Nindou düdi ai akidou moatükuni ndore hifandarandi ana, asu adükari moatükuni amboani ndonde hibandambui. Ijga asu ai akidou moatükuni ndofe hifandikoate-ayu ana, asu ngiri adükari moatükuni amboani ndonde hibandandi. ¹¹Asu se kaki napo hifi ndanihündambo moaruwai ra ndofe hifandikoate-ayei ana, asu se ngiri napo hondü ra hibadihündi. ¹²Se nindou ngorüdi napo ndofe hifandikoate-ayafi ana, asu se ngiri napo sihei hondü ra ndondihi hibadihündi.

¹³Nindou ngorü ai ngiri yimbu bogori nindouyafandi ratüpurümbi nünngu. Ijga nindou ranai ana bogori ngorü ranahambo moaruwaimbo-ndirühi asu ngorü bogori ranahambo ngusüfo pandirümbui. Se ngiri kakimbo ratüpuri asu Godindi ratüpuri yiboboambo ngusüfo pandowapiri.”

**Sisas ai ahinümbi asu nginindi God hifandarandi
ranahambo hoafimayu**

(Matyu 11:12-13; 5:31-32; Mak 10:11-12)

¹⁴Farisi nindou, kakimbo yanggiri ngusüfo parundeimbi-memo, ranai rani hoafi hihimboriyomo houmbo asu Sisasimbo tikifinambo-maruri. ¹⁵Ai simbori hoafiyupurühi yahuya, “Seana nindouyei himboahü aboedi himboyomondühanemo, nga God ana sihamundi hohoanimo ra fifireapurimbo-ani. Nine nindouyei himboahü aboedi hamindayo ra Godindi himboahü ana moaruwai hamindane.

¹⁶Mosesindi ahinümbi hohoanimoyo asu Godindi hoafi hoafiyomo rundeimbi-yomondi hoafi ra wataporimboru sinimombo asu Son ai tüküfi nünnguambe kaimayo. Ijga Son nünnguambe peyo haya asino ndanana God nginindi hifandarandi aboedi hoafi ra muñguambo ngoafi tükefeyo. Ranane asu God hifandarandi ranambe kefoefembo muñguambo nindou ai hamindi tütüngarihehindi. ¹⁷Hifi sünü ranai muñgundimboe, nga Godindi-mayo ahinümbi hohoanimo ranana ngiri akidou-amboani awarindihoeyo.”

Nimorehi semindihünda hininggifembo yamundife hoafi

(Matyu 5:31-32; 19:9; Mak 10:11-12)

¹⁸“Nindou düdi ai ahandi nimorehi hininggire haya asu ngorü asemündu ana, ai moaruwai wosihoafari hohoanimoyumbo-ani. Asu nindou düdi ai nimorehi horombo ahandi nindowenihi ai moei yahumbü asemündu ana ai-amboani moaruwai wosihoafari hohoanimoyumbo-ani.”

Napo afindeimbi asu Rasarusi-yafandi hoafi

¹⁹Sisas ai hoafiyuhi yahuya, “Nindou mami ai kaki napo afindeimbiyu haya asu ai hoeari aboedi-aboedi yihuruyu haya muñguambo si sesi aboedi sesühi nimarü marandi. ²⁰Nindou mami napo-koate ahandi ndüri

Rasarus ai ahandi fi masimei yanggiriyu haya napo afindeimbindi yipuri nafitambeihü nimarü marandi. ²¹ Ai napo afindeimbindi-mayo sesi fu fondiwaminindi pindoani dagadi yahuayamboyu ramefiyu. Raniyo asu yafari ai hei ahandi masimei ra mongoarühi marihündi.

²² Süngunambo Rasarus ai yifimayuamboyo asu sünambeahindi nendi ai sowaründümo hafomo Abrahami-dibo hiningimarüwuri. Asu napo afindeimbi-amboani yifimayuwa hifi kamarihori. ²³ Asu yifiafi ngoafihü napo afindeimbi-mayu ranai asübusi afindi masemündu. Asu ai himboyuane anguni goagu Abraham ai Rasarus parümündü haya manimbafani. ²⁴ Ai hoafiyuhiya, 'Abraham, wambo hipoambo-rowandiri! Se Rasarus koarihaworani hoe wari foare hüramündi süfo wandi amindasümo kusimbireandiri, nga wambo hai hüfinambo müngunambo-arandiri,' mehu

²⁵ Abraham ai hoafiyuhi yahuya, 'Wandi nimori, se yanggiri nimbafambe aboedi moatükuneimbi-mayafi, nga asu Rasarus ai moaruwai mamaru. Nga asu ai haponda ndanihü aboedi mamaruwa asu se asübusi asowandifi. ²⁶ Ngörü-moatükuni ra ai hoe apoari afindi mbusümondühi kikireamunimboane, nga ngiri didai badihoei ndühi düfu asu ngiri didai badihoei rühi düfu,' mehu.

²⁷ Asu napo afindeimbi ai hoafiyuhi yahuya, 'Ape, refe ana Rasarus koandihaworani appendi worina mbihuwamboane. ²⁸ Ro hondahüfeimbi akohoandeimb-anahi rananimbo Rasarus ai hoafinduanü asübusi afindi semindi nafi kosikoate-mbeyomo-ndamboane,' yahuhaya hoafimayu. ²⁹ Abraham ai hoafiyuhiya, 'Ai ana Mosesindi-mayo ahinümbi hohoanimo asu Godindi hoafi hoafiyomo-rundeimbi sürü papimarundi ra hoeindundühi fifirindumboemo.' ³⁰ Napo afindeimbi ai hoafiyuhi yahuya, 'Wani, Ape Abraham! Nindou düdi yifihündi ahamumbo sowana ahu ana, ai ahamundi moaruwai hohoanimo ngörü süngundundühi asu anihondümbö-ndumboemo.' ³¹ Abraham ai hoafiyundowohü yahuya, 'Asu ai Mosesindi hoafi himborikoate-yomo, Godindi hoafi hoafiyomo-rundeimbi-yomondi hoafi himborikoate-ayomo ana, asu ngiri nindou yifeimbi-yei hoafi amboani himborindomo,' mehu.

**Moaruwai hohoanimo ai anihondümböfe hohoanimo
hifinambore arandi**

(Matyu 18:6-7; 18:21-22; Mak 9:42)

17 ¹ Sisas ai ahambo süngurü-rundeimbimbo hoafiyupurühi yahuya, "Awi süngunambo mamikarambo moatükuni moaruwai tükündifemboe asu rani süngumbo wambo nimorehi nindowenihi ai moaruwai hohoanimondeimboyei. Hipoanimboe-mbouanei nindou düdi nimorehi nindowenihi ranaheimbo rareandani moaruwai hohoanimoaye. Nindou ranahambo ana moaruwai hamindi animbo

tüküindifemboe. ²Asu ai rareandani nimori akidibou ndanai moaruwai hohoanimoayei ana nindou ranahambo amindasümoambe nimoei hondi wofifihi kife mburimbo hoe hohoeambeahi pifiyuwani hanü yifimbo ra aboed-ane. ³Ranimbo-hündambo animbo se hibadihümbo. “Asu sihafi wandafi ranai moaruwai hohoanimondüani se ahambo hoafindafühi, sihafi moaruwai hohoanimo ra hiniᅅgindowandi mbisafindo. Asu ai ahandi moaruwai hohoanimo ra hiniᅅgindeandani ana, se ahambo amboawi mbisafi. ⁴Asu nindou ranai sihambo mami sihi 7-mbo moaruwai hohoanimoyu mbura asükai 7-mbo hu sihamboya, ‘Karihasi, ro sihambo moaruwai hohoanimo-mayahanini,’ ehü ana, ahandi moaruwai hohoanimo ra amboawi mbisafi,” mehu.

Anihondümbofe hohoanimo

⁵Ahandi hoafi sowandümo homorundeimbi ranai Adükarimbo hoafiyomondühi yahomoya, “Se rarowandani yihoefi anihondümbofe ra afindimbeyo.” ⁶Mehomondamboyu asu Adükari ai simbori hoafiyupurühi yahuya, “Asu sihamundi anihondümbofe ranai mastet hoari nahurai akidouayo-amboani se nimi ndanahambo hoafindimondühi animboya ‘Firihoefi hawa ahasihari kameihi hafimbo hoe hohoeambe nimbafi,’ mbisimondani asu nimi ranai se hoafimemo süngu randifemboe,” mehupuri.

ᅅgorü nindoundi ratüpuriyu-randeimbindi ratüpuri

⁷Sisas ai hoafiyuhi yahuya, “Nindou mami seambeahindi ai ahandi ratüpuriyu-randeimbi ranai ᅅgu nümbürambe hifi hirindu asu sipsip hifandinda mbundambo asükai worinambo düduwani, ai hoafindu-ndowohüya, ‘Nimehinou sinifi nimarifimbo sesi sowasifi,’ mambüsindoyo? ⁸Wani, ᅅga ahambo animboya, ‘Wandi boatei sesi ra didiboadondo ndao hawambo animbo asu se hoeari güdo mbunda nimandifi hibadandirani ro boatei sesi dagadi hoe ndimindahaimbo nimandihani animbo asu se sihafi sesi ra süngu dowadifi,’ mbüsümbui. ⁹Asu bogori nindou ranai ahandi ratüpuriyu-randeimbi nindou ranahambo hihifimandüriyo ahandi hoafi himboriyuhü süngumareandi ranimbo-hünda? Wani. ¹⁰Ranimbo-hündamboane se-amboani God ai hoafimayu ra muᅅgu ratüpurayomo ana se randu hoafindimondühiya, ‘Roana aboedi ratüpuriyefi rihundeimbiyefipoani, ᅅga rani ratüpuri ranana yihoefimbo ratüpurindimo yahu hoafimayu raniyo ratüpurimayefi,’ mbisimo.”

Sisas ai mimaniho masimeimbi nindou 10 aboedimareapuri

¹¹Sisas ai Serusarem ᅅgoafina yare huhüyu Sameria asu Gariri-yafe hifi yipupuiambe nafi mahu. ¹²⁻¹³Ai hu ᅅgoafi mami ranihü tüküfiyuwane,

nindou 10 mimaniho masimeimbi ranai homo ahambo nafini hoeimarüwuri. Ai anguni niŋgomombo raru miŋgiyomo hoafiyomondühi yahomoya, “Sisas! Nindou Adükari! Se yihoefimbo hipoambo-rowamuni,” mehomondo. ¹⁴Asu Sisas ai ahamumbo hoeireapurühi hoafiyupurühi yahuya, “Se ŋgomo Godimbo sesi sihou-rundeimbi ahamumbo animbo sihamundi fi ra nafuindimondani animbo asu ai tümbürüpuramboane,” mehu. Ai nafi homondane ahamundi fi ranai asukai aboedi tüküme Feyo.

¹⁵Asu nindou mami ahamundi mbusümo ranai hoeireandani ahandi fi ranai asukai aboedi-mayowamboyo, ŋgoafinambo hihirifi huhü puküna hoafiyuhi Godimbo aboed-ani mehu. ¹⁶Nindou ranai hu Sisasindi yirikimi piyu yanggurumbo hihifimarüri. Nindou ranai ana Samariahündiyu. ¹⁷Sisas ai nindou ranahambo hoeiriri haya hoafiyuhi yahuya, “10 aboedimayafundi. Ŋga asu ŋgorü 9 ra nüŋguyafunda? ¹⁸Asu nimboe nindou ŋgorü sirambeahindi mami ndanai yanggiri süni Godimbo hihifarüra?” ¹⁹Asu Sisas ai nindou ranahambo hoafiyundowohü yahuya, “Botiyafo hawa hafi, ŋga sihafi anihondümböfe ranaiyo aboedambo-mareanini,” mehundo.

Nindou Hondü ranai weindahi tükündüfimbui
(*Matyu 20:23-28; 24:37-41*)

²⁰Farisi nindou ranai Sisasimbo düduyafundühi yahomoya, “Nüŋgusümboani God ŋginindi hifandarandi ra tükümandifea?” mehomondamboyo. Asu Sisas ai simbori hoafiyupurühi yahuya, “God ŋginindi hifandarandi ranai tüküfemboayo rani-moatükuni nafuimbohünda ŋgiri nini-moatükuni tükündifeyoani nindou ai ahei himboarinambo hoeindihindi. ²¹Ai ŋgiri randihi hoafindeihya, ‘Hoeirihya aiana ndani,’ mbisei asu ‘Goagu ra’ mbisei. Nimboe, sapo Godindi ŋginindi ranana sihei mbusümo-ane engoro.”

²²Raniyo asu ahambo süŋgrurü-rundeimbimbo hoafiyupurühi yahuya, “Süŋgunambo rani-moatükuni ranai tükündifemboe, rananimbo se Nindou Hondü si ra hoeifembo afindi hohoanimbo-ndimboemosi, ŋga se ŋgiri hoeindundi. ²³Rananimbo sihamumbo hoafindeihya, ‘Hoeiru, aiana goagu anüŋgu ra’ mbisei asu ‘Hoeiru, aiana ndanüŋgu,’ mbiseimboyei, ŋga se yowani anihondümböfeihü ho kokopoani. ²⁴Sapo wabürüsi ranai sünü ŋgorü himborani tüküfe haya ho ŋgorü himborani kararamindo, yahurai animbo ndimboe Nindou Hondü ai ahandi tüküfembo sihi ra. ²⁵Ŋga asübusi afindi boatei ndemüdi mbundambo asu nindou ndani simboani animboei ranai ahambo daboadi hihirindihori mbundühumbo-ndeiani animbo ndimboe.

²⁶Horombo Noa nüŋguambe ramefeyo yahurai animbo Nindou Hondü ranai tüküfemboyambe-amboani randifemboe. ²⁷Sapo Noa nüŋguambe nindou afindi ranai sesi sahüsi, hoe simindei, nimorehühüyafu,

anamindühiyahi raraorühi heimbo mami bidifiranambo sihi Noa ai botambe mafarifiyu-wamboyo hohoambu afindi ranai kosowohü nindou ra hifokoako-mafoareandi.

²⁸Horombo Rot nünquambe ramefeyo yahurai animbo ndimboe. Muñguambo nindou ranai sesi sahüsi hoe simindei, napo pemiyei, kaki semindimbo koarihehi, nümbüri hifirihi, worimborühi raraomarihündi. ²⁹Ŋga Rot ai Sodom ŋgoafi ra hiniŋgire haya hu simboani hai asu sarfa nimoei ranai hoe nahurai sünambeahindi pütapiyowohü muñguambo nimorehi nindowenihi hifokoako-mafoareandüri.

³⁰Mami yahurai animbo Nindou Hondü ranai weindahi tüküfi simboani amboani randifemboe. ³¹Rani-simboani nindou ŋgoafihü amaru ranai ŋgiri kebuai ahandi napo worambe engoro ra ndemündu. Asu mami yahuraiane nindou nümbürambe anünqu ranai ŋgiri ahandi worinambo hihirindüfi ŋgu. ³²Sapo Rotindi nimorehimbo tüküme feyo ra se hohoanimondimo. Ai hihirife ŋgoafi hoeimareanda yifimayo. ³³Nindou didiyei ahei yaŋgiri niŋgo ranahambo afindi hohoanimoyeihi kikiharihümündi ana, awarindihoemboe. Ŋga nindou didiyei ahei yaŋgiri niŋgo ranahambo afindi hohoanimokoate-aye ana, aboedambo-ndifemboe. ³⁴Ro sihamumbo hoafehapuri, nindou yimbu ranai mami fondiwami guguiyafani apafani ra God ai ŋgorümbo nderümündühi ŋgorü rande apofondiwami diŋeirümbui. ³⁵⁻³⁶Nimorehi yimbu ranai mbanı hirayafe ra God ai ŋgorümbo ndemündühi ŋgorü rande hiŋŋgideambui,” mehu. ³⁷Sisasimbo süŋgrurü-rundeimbi ai düdurüwurühi yahomoya, “Rani-moatükuni ra nahü tükümandifea?” Asu Sisas ai simbori hoafiyupurühi yahuya, “Yifinimoko yaŋgorowohü ana, koaheimb-ane hei sahüsi arihündi,” mehu.

Nimorehi kai asu yibobore-randeimbi-yafe kafeefe hoafi

18 ¹Sisas ai ahambo süŋgrurü-rundeimbimbo didibafiferambo yiboaruko-ndimboemo yahu haya kafeefe hoafi mami yamundife-purimbohünda hoafimayupuri. ²Sisas ai yare hoafiyuhi yahuya, “Mami adükari ŋgoafihü nindou yibobore-randeimbi mami ai manünqu. Aiana moai Godimbo yihimboyu asu nindoumbo afindi hohoanimoyu randi. ³Raniyo adükari ŋgoafi ranihü nimorehi kai niŋgo haya ho nindou yibobore-randeimbimbo hüti hoafiyondo randühiya, ‘Wandi hürütümbi ai wambo hürütarandiri, ŋga se wambo hoafi yibobofe ra farihawandiri,’ meho.

⁴Gedühi safiyu nindou yibobore-randeimbi ranai nimorehi ranahambo fehefembo moei mehu. Ŋga humbo süŋgunamboyu ai ahandi fimbo hoafiyuhiya, ‘Sapo ro moai Godimbo yihimboya asu nindoumbo hohoanimoya rihandi. ⁵Ŋga nimboe nimorehi kai ranai muñguambo si wambo tiŋjirifo sai arandimbo animbo ro ahambo fandihehe hehea

ahandi papi-hoafi ra himborinda. Asu ro refekoate-ayahi ana wambo sowana muṅguambo si didi ndandani wambo süṅgunambo garibindea-ndirimboe,' ” mehu.

⁶Asükaiyu Adükari ai hoafiyuhi yahuya, “Se nindou yibobore-randeimbi moaruwai ranahandi hoafi ra himboriyomo. ⁷Nimorehi nindowenihi God ai wandanei yahundüreimbi ranai nimbiniimbi si muṅguambo Godimbo arani aranaye ra aheimbo fehefendüri-koate-mandüyo? Asu awi fehefendüri-koate ahei hoafi ra hihimboripo-mandüyo? Wani. ⁸ገga ro sihamumbo rarihe hoafehapuri, ai ahei papi-hoafi ra nimehünou himborinduhü yibobondeambui. ገga Nindou Hondü ai kudümbö nimorehi nindowenihi hifi ndanihü animboei ahei anihondümböfe ra hoeimandeyo?’ ” mehu.

Farisi nindou asu takis kaki semündü-randeimbi-yafandi kafeefe hoafi

⁹Nindou bidifiri ai ahamundi fimboya aiana mbumundi hamind-anemo, ṅga ṅgorü nindou aiana mbumundi-yomopoani ehomo ranahambo Sisas ai kafeefe hoafi hoafimayu. ¹⁰“Mamimbo nindou yimbu ranai didibafifembohünda Godindi worina mahafani. Mami ai Farisihündüyu asu ṅgorü ai takis kaki semündü-randeimbiyu. ¹¹Farisihündi ranai ahandipoanimbo nüṅgumbo ṅgusüfoambe didibafifihiya, ‘God, ro sihambo hihifarihanini, roana moai nindou bidifiri rarihi arihündi süṅgurihe hehea dibokoriya, tikai hoafiya asu nimorehi sisihimoya rihandi. ገga roana nindou takis kaki semündü-randeimbi gogu ranı nahurai-yahipoani. ¹²Ro mami wik ranambe yimbumbo sesi wehiya asu muṅguambo moatükuni ro asahamindihi ra 10 yiboborihe hehea sihambo mami bidifiri sihehe arihandi,’ mehu.

¹³ገga takis kaki semündü-randeimbi-mayu ranai ahandipoanimbo akidou ṅguni safi manüṅgu. Ai sünambe himbo-koate mbiro türe nüṅgumbo ahandi ṅgusüpoahühi purükireandühi yahuya, ‘God, ro moaruwai hohoanimoya rihandeimb-anahi, ṅga se wambo hipoambo-rowandiri,’ mehu. ¹⁴Ro sihamumbo hoafehapuri, takis kaki semündü-randeimbi-mayu ranai worinambo ṅguwani ai animbo Godindi himboahü mbumundi nindou-ndümbui, ṅga Farisi nindou ana wani. Sapo mami yahuriane nindou didiyei ahei fimbo hifinambo-arihindi aheimbo God ai botindearümbui. ገga asu nindou didiyei ahei fimbo botarihindi aheimbo God ai hifinambo-ndearümbui,” mehu.

Sisas ai nimoakidiboumbo hiniṅgirihindüra wambo sowana mbüsühüsi, mehu

(Matyu 19:13-15; Mak 10:13-16)

¹⁵Raniyei nindou bidifiri ranai Sisasimboya ai wari nande haya didibafi-mbifindüra sei hehi nimoakidibou fufurihümündindüri

tükümehind. Ŋga asu ahambo sünggrurü-rundeimbi-memo ranai nindou ranaheimbo ŋginindi-marundüri. ¹⁶Ŋga asu Sisas ai hoafiyuhi yahuya, “Nimoakidibou ra aheimbo hiniŋgindihihindüra ndühi wambo sowana mbüsühüsi, ŋga ŋgiri bobohindundüra. Sapo God ŋginindi hifandarandi ra nimori akidibou ndahurai aheiane,” mehu. ¹⁷Sisas yahuya, “Se nda fifirindundi, nindou didiyei God ŋginindi hifandarandi ra nimoakidibou sahümündi arihündi nahurai semindikoate-aye ana, ŋgiri keboehindi, ŋga wani,” mehu.

Nindou napo afindeimbi ai Sisas-dibo wataporimayu
(*Matyu 19:16-30; Mak 10:17-31*)

¹⁸Suda-yafe bogori nindou ranai Sisasimbo düdurirühiya, “Nindou yamundo-randeimbi aboedi, ro yangiri koadürü koadürümbo niŋgombo ra nini-moatükuni nünüŋgondihendühi mandahamindiha?” mehindowamboyu. ¹⁹Asu Sisas ai ahambo simbori hoafiyundowohü yahuya, “Nimboe se wambo aboedi asafa? Moai nindou didi ai aboediye, ŋga God yangir-ani aboedayu. ²⁰Sapo se ahinümbi hohoanimo ra fifirowandi: Se yowani nimorehi sisihimoyo asu anamindihoandi birabiriyopoani, wosihaofoi hoafiyopoani, nindou hifokoefepoani, hühühüniyopoani, se yowani ŋgorümbo tikefe-hefe papi-hoafiyopoani, asu se sihafi me-apembo ahinindafühi ahafe hoafi himborindafi,” mehu. ²¹Nindou ranai simbori hoafiyundowohü yahuya, “Ro nimori akidouyahambe peya hehea hambo hapondani ro rani ahinümbi ra süngurihe arihandi,” mehu. ²²Sisas ai rani hoafi ra himboriyu haya, simbori hoafiyundowohü yahuya, “Awi mami moatükuni se randowandi. Sihafimayo napo ra nindou ŋgorümbo dabadürühi ranihihindi kaki asowandifi ra napo-koate-yeimbi ranaheimbo dabadüri. Rananimbo se sünambe napo afindeimbi-ndamboyafi. Rani boatei rani-süŋgundo mbundambo animbo asu wandi süngu didifi,” mehu.

²³Ŋga nindou ranai Sisas hoafimayu ra himboriyu haya ŋgusüfoambe nimbimayu, nimboe sapo ai napo afindeimbi wambo. ²⁴Sisas ai horirani mayoa hoafiyuhi yahuya, “Nindou napo afindeimbi ana God ŋginindi hifandarandi ranambe kefoefembo tiŋümbane. ²⁵Ninihondi mami ahandi ndüri kamer ranai ana hoeari kakimbo nir ambenafi kefoefembo tiŋümbiyopoani, ŋga nindou napo afindeimbi ai God ŋginindi hifandarandi ranambe kefoefembo ana, tiŋümbane,” mehu.

²⁶Nindou bidifiri ranai hoafi ra himboriyeihehi düdurihorühi seiya, “Asu refe ana, nindou didi ai yangiri koadürü koadürümbo manüŋgua?” ²⁷Sisas ai simbori hoafiyuhiya, “Nini-moatükuniyo nindoumbo tiŋümbayo ra Godimbo ana tiŋümbiyopoani,” mehu.

²⁸Asu Pita ai hoafiyuhi yahuya, “Awi! Ro yihoefi ŋgoafi hiniŋgirihi hohu sihafi süngu masinefi,” mehindowamboyu. ²⁹⁻³⁰Sisas ai

hoafiyupurühi yahuya, “Ro sihamumbo anihondümboanahi hoafehapuri, nindou düdi God nginindi hifandarandi ranahambohünda ahandi ngoafi, nimorehi, akohoandi, boagiri nimoakidibou hiningareandüri ana, hifi ndanihü God ai aheimbo afindi moatükuni dagadürümbui. Asu süngunambo aho ra yangiri koadürü koadürümbo niŋgo ra ndahümündimboyei,” mehu.

**Sisas ai yifiyo hefe yifihündi botifembo-mayu
ranahambo asükai hoafimayu
(Matyu 19:16-30; Mak 10:17-31)**

³¹ Sisas ai süngururü-rundeimbi 12 sepurimündü hiningireapuri haya hoafiyupurühi yahuya, “Himboriyomo! Haponda sihiri Serusareminambo anefi ahahifi. Ranihü animbo sapo Godindi hoafi hoafiyomo-rundeimbi nindou ai Nindou Hondü ranahambo nini-moatükuniyo tüküfembo horombo sürü papiru masihoemo ra anihondü tükündifemboe. ³² Ai ahambo ndifoyei warihündüwurimboemo. Rananimbo ahambo tikifinambondihori, türüfoefe hoafindei, asu nguri tifindahi raraondihümboyei. ³³ Rananimbo asu ahambo ndüfuri ndüfuriboadüwuri mbundümbo hifokoandüwuri-mboemo, nga ngimi sindo haya süngunambo asükai botindüfimbui,” mehu. ³⁴ Nga asu ahambo süngururü-rundeimbi ai moai hoafi ra türüfoaru fifirundi. Hoafi ranahandi nimindi ra moai ahamundi hohoanimoambe weindahifeyo. Asu ai moai Sisas nimboe hoafimayu ra akidou-amboani fifirundi.

**Sisas ai nindou himboatihari moako-moakoyu-randeimbi aboedimariri
(Matyu 20:29-34; Mak 10:46-52)**

³⁵ Sisas ai Seriko ngoafikimi huane nindou mami himboatihari nafikimi nimarümbo nindou heiyani kaki napombo moako-moakoyu marandi. ³⁶ Ai himboriyuwani awai nendi afindi ranai tümareandamboyu, asu nindou ranaheimbo düdureandürühi yahuya, “Nindou ra ninihünda?” mehündüramboyo. ³⁷ Asu nindou ranai seiya, “Sisas Nasaretihündi ranai ndanafi masinuamboaniyefi,” mehomondamboyu. ³⁸ Nindou himboatihari ranai puküna hoafi karihoeihü hoafiyuhi yahuya, “Sisas, Defitindi ahuri, se wambo hipoambo-rowandiri.”

³⁹ Asu nindou horomboyahi masinei ranai nginindi hoafiyahündowohü seiya, “Se hoafi kikirandifi,” maseiamboyu. Asu nindou ranai asükai hoafi puküna karihoeihüya, “Sisas Defitindi ahuri, se wambo hipoambo-rowandiri,” mehuamboyu. ⁴⁰ Raniyo Sisas ai hu nüngumbo nindou himboatihari ranahambo ahambo sowanambo semündühombo hoafimayu. Nindou ranai hu manünguwa Sisas ai düdurirühi yahuya, ⁴¹ “Ro sihambo nini-moatükuni nüüngufeninimboyo se hohoanimoayafa?” mehündowamboyu. Asu nindou ranai yahuya,

“Nindou Adükari, ro wandi himboari ra asukai aboedimbeyowa samboanahi.” ⁴² Sisas ai simbori hoafiyundowohü yahuya, “Sihafi himboari ra aboed-ane. Sihafi anihondümbofe rani süngumboyafi se aboedayafi,” mehu. ⁴³ Asu mamihari ahandi himboari ranai birimahoe yowamboyu Sisasindi süngu huhü Godimbo aboed-ani mehu. Nindou afindi ranai rani-moatükuni ra hoeirihinda mayoa ai-amboani Godimbo aboed-ani masei.

Sisas ai Sakiusindi worina mahu

19 ¹ Sisas ai Seriko ngoafi mbusümo nafi hu ngasünde haya mahu. ² Huane asu nindou mami rani ngoafihü mamaru ahandi ndüri Sakius ai napo afindeimbi, takis kaki sowandümo-rundeimbi-yomondi bogoriyu. ³ Ai Sisasimbo nüngunahurai nindouyu yahuhaya hoeifimbo mehu, nga nimorehi nindowenihi afindi buriyeimbo ahambo hoeifimbo fondi gümarihinda asu Sakius ai bodifo wambo ranimbo ngiri ahambo hoeindiri. ⁴ Raniyu asu ai horombofi pipiyu hu haya nimindi nimoamo mahafu Sisasimbo hoeindihini yahuhaya. Ai fifire haya Sisasimboya nafi mami raninafi animbo düdü haya ngumbui yahuhaya.

⁵ Raniyu Sisas ai ranihü tüküfi asu nimiwami nimoamo himboyuhü Sakiusimbo hoafiyundowohü yahuya, “Sakius, se kosifoao, hapoana ro sihafi worambe didi nimandimboyahi,” mehundo. ⁶ Raniyu ai nimehünou kusifoendühi ngusüfoambe hihifi-hihifiyuhü Sisasimbo ahandi worina serümündü mahu. ⁷ Nga muṅguambo nindou ai Sisas Sakius dibombo mahafandi ra hoeirihi mburihü asu momori hoafiyeihi seiya, “Ai ahu ranana moaruwai hohoanimoyu-randeimbindi worinamboani,” masei.

⁸ Raniyo Sakius ai nüngumbo Adükarimbo yare hoafiyunduwohü yahuya, “Adükari se himboriyafi, hapoana wandi-mayo muṅgu moatükuni ra yibobondihe mbundiha nindou napokoate-yeimbimbo ngorü bidifiri ndehamboyahi, asu nindou ngorüdi-mayo takis kaki wosihofafi hoafiya hehea sahamindiheimbi ana, asukai yimbuyimbumbo hihirindahe nga ndahandomboyahi,” mehu. ⁹ Ra-mehuamboyu Sisas ai hoafiyundowohü yahuya, “Hapoana God ai nimorehi nindowenihi wori ndambeahindi aboedambo-reandürühani. Nimboe, nindou ranambo ai Abrahamindi amoa-ani. ¹⁰ Nindou Hondü makusu ranana sapo nindou awarihehindeimbi kokoyondüri aboedambo-fendürimboyu makusu,” mehu.

Nindou 10 kaki masowandümo kafeefe hoafi

(Matyu 25:14-30)

¹¹ Rarihi nimorehi nindowenihi afindi ranai himboriyeiane, asukai Sisas ai aheimbo kafeefe hoafi mami hoafimayundüri. Nimboe sapo ai Serusarem fikimi akimimayuambo nindou ranai

rarihi hohoanimoyeihiya, God ŋginindi hifandarandi ra nimehünou animbo tükündifemboe, masei. ¹²Asu ai yare hoafiyuhi yahuya, “Mamimbo ana bogori nindou mami ŋguni hifina ahambo adükari bogorimbofi hiniŋgífimbohünda mahu. Bogorimbofe mbuiyombo asikai ŋgoafinambo hihirife hombo hohoanimomayu. ¹³Ŋga ai hombo yahuhaya ahandi ratüpuriyomo-rundeimbimbo mborai yahupura mahomondamboyo gorinambo nafümbi kaki hoari nindou mamamimbo yimbureapurühi yahuya, ‘Se kaki nda ndowandümo houmbo bidifiri kaki semindimbohündambo ratüpurindimondani ro asikai tükündaheamboane,’ mehupuri.

¹⁴Ŋga asu mami rani ŋgoafihündi ranai nindou ranahambo yiboarukomarihori. Raniyo ai huane nindou bidifiri koamarihehipura bogori nindou mahüfu ŋgoafina hoafi sowandümo hifomo hoafiyomondühi yahomoya, ‘Ro moei asefi nindou ranahambo bogorimbofembo ana,’ mehomo. ¹⁵Ŋga asu nindou ranai adükari bogorimbofi mbura ŋgoafina hihirifi mahu. Ai hihirifi hu nimarumbo ahandi ratüpuriyomo-rundeimbi ranahamumbo nimehünou hoafimayupuri ahambo sowana howani gorinambo nafümbi kaki hoari masagapuri ranifihini nünŋunümbi mbasowandümo yaho düdufepurimbohünda.

¹⁶Nindou ŋgorü ai boatei horombofi süni hoafiyuhi yahuya, ‘Adükari, ro sihafi-mayo gorinambo nafümbi kaki hoari mami raninambo bidifiri kaki semindimbo ratüpuriyambo kaki hoari 10 masahamindihi,’ mehu. ¹⁷Asu bogori ai yare hoafiyundowohü yahuya, ‘Se aboedi ratüpuriri ramarowandi ra aboedi hamindi hondü-ane, rani-moatükuni akidou ra se diboadoro hifandimarandi. Ranimboanahi asu ro sihambo ŋgoafi 10 se hifandimbohünda hiniŋgariheandi,’ mehu.

¹⁸Asukai ratüpuriyu-randeimbi ŋgorü ai süni hoafiyuhi yahuya, ‘Adükari, ro sihafi-mayo gorinambo nafümbi kaki hoari masawandi raninambo kaki semindimbo ratüpuriyambo hondahüfeimbi kaki hoari masahamindihi,’ mehu. ¹⁹Asu bogori ai yare hoafiyundowohü yahuya, ‘Ro sihambo hondahüfeimbi ŋgoafi hibadandi sa hehea hiniŋgariheandi,’ mehu.

²⁰Asukai ŋgorü ai süni hoafiyuhi yahuya, ‘Adükari, gorinambo nafümbi kaki hoari sihafi-mayo nda, ro hoearambe parihe himondihe siheheanda meŋgoro. ²¹Nimboe sapo ro hoeirihenina, se ŋginindiyafrandeimbi nindoumefambo. Sapo nini-moatükuni nindou bidifiri ai sihehinda se sowandifi asu sesi amboani bidifiri nindou ai hifirihinda se sowandifi arandi ranimboanahi ro sihambo yihimboayahi,’ mehu. ²²Raniyu bogori ai nindou ranahambo yare hoafiyundowohü yahuya, ‘Se nindou moaruwai ratüpuriyafi randeimb-anafi. Sihafi rani süngumbo animbo sihambo hihinde papi-hoafindaninimboe. Sapo se

fifirowamboanafi ro nginindiya rihandeimbi nindou-anahi, asu ro bidifiri nindou ai napo sihehinda sahamindi asukai sesi hifirihinda sahamindi rihandeimb-anahi. ²³Asu nimboe se kaki wandi beŋambe sihefekoate-mayafa? Sapo rananimbo ro hihirife kosihü wandi kaki ra bidifiri ranifihindi kameihi hihirihe sahamindi,' mehu.

²⁴Ŋga bogori nindou ranai nindou akimi burimemo ranahamumbo yare hoafiyupurühi yahuya, 'Se ahandi-mayo gorinambo nafümbi kaki hoari ra sowandümo mburumbo nindou kaki hoari 10 masemündu ahambo dabudo,' mehu. ²⁵Asu ai raru hoafiyimondowohü yahomoya, 'Adükari, nindou ranai ana ndeara 10 kaki hoareimb-ani,' mehomo. ²⁶Ŋga asu bogori nindou ranai hoafiyuhi yahuya, 'Ro sihamumbo hoafayahi, nindou bidifiri napo afindeimbi aiyomo aiana asukai bidifiri napo ndowandumboemo, ŋga nindou ai napo akidouyeimbi-maye ranahi warambeahindi ana ngorüfemboane. ²⁷Ŋga asu wandi hürütümbi-memo, sapo wambo adükari bogorimbofembo yowani mehomo ranahamumbo ndühi sowapurindümo sifomo wandi himboarühi hifokoarüpuri!" mehu. ²⁸Sisas ai kafoefe hoafi ra hoafiyu mbura asukaiyu Serusaremina mahüfu.

Sisas ai adükari bogori nahurai Serusarem ŋgoafambe mahu
(*Matyu 21:1-11; Mak 11:1-11; Son 12:12-19*)

²⁹Sisas ai Betani asu Betfage ŋgoafikimi tüküfi Orif Wafu sei-arihündi-kimi homondühiyo ahambo sünggrurü-rundeimbi yimbu horombo koamarihepiri. ³⁰Asu ai yare hoafiyupirühi yahuya, "Se ŋgoafi gebü anango raninambo ngafani. Ranühi se doŋgi mami hoarifi hoeindineanda wofina himondindümo hiningindumboemo ra moai nindou didi ai-amboani horombo raniwami nimaruwani serimindi ho-randi. Asu wofi fufurigene mbundina wambo sowana ndowandifani dügüfani. ³¹Asu nindou ngorü ai sihafanimbo düdündifihiya, 'Nimboe se doŋgi ra fufurariheneandi?' mbüsuwani asu se ahambo hoafindafinandowohüya, 'Adükari ai bidifiri moatükuni refembo doŋgi ranambo hoafimayuambo anihoandi,' mbisafani," mehu.

³²Sisas ai koamarihepiri hafani hoeirineanda doŋgi hoarifi ranai ahafanimbo hoafimayupiri süngu ramefeyo. ³³Rani yimbu ai doŋgi ranahambo hapoadumbo wofi fufurihoefineanda rani afindi ai ahafanimbo yahuya, "Nimboe se doŋgi ra wofi fufurariheneanda?" mehu. ³⁴Ŋga ai hoafiyafandühi safaniya, "Adükari ai bidifiri moatükuni refembo doŋgi ranambo hoafimayuambo anihoandi," masafani.

³⁵Raniyafani asu doŋgi ra Sisasimbo sowana sowandifani mahafani. Asu ai ahafandi-mayo wari hoandarümbi ngisihari hoeari doŋgiwami nandine mburina Sisasimbo raniwami hiningimarüwuri. ³⁶Ai doŋgiwami nimarü haya Serusarem ŋgoafikimi mahuwamboyei nindou bidifiri

ahai wari hoandarümbi ngisihari hoeari ra nafini ahambo hombohünda kurimarihinda raniwami mahu. ³⁷Sisas ai Serusarem ngoafinambo huhü Orif Hifi Wafu hani nafi tüküfeambefiyuane, nindou afindi ahambo süngurihori-rihündeimbi ranai hihifi-hihifimayei. Sapo ai muᅅgu heptünifeimbi moatükuni hoeimarihindi ranimbo-hünda ai puküna hoafi karihehindühi Godimbo adükar-ani masei. ³⁸Ai hoafiyeihi seiya,

“Adükari bogori ai Adükarindi süngu akusu
ranahambo God ai aboedi-aboedimbiriramboane.

Sünambe muᅅguambo ai aboedi amarei

asu God nimoamo hamindi hondü anüᅅgu ranahambo aboed-ani
mbisei-amboane,”

Buk Song 118:26

masei.

³⁹ᅅga Farisi bidifiri nindou ranahei mbusümo burimemo ranai Sisasimbo raru hoafiyomondühi yahomoya, “Yamundo-randeimbi, sihambo süngurihünini-rihündeimbi ranaheimbo hoafindafani animbo ai ahei hoafi kibokimbirihümüdi-amboane!” mehomo. ⁴⁰ᅅga asu Sisas ai simbori yare hoafiyupuruhi yahuya, “Ro sihamumbo hoafayahapuri, nindou rani hoafi ra hoafikoate-ayei ana, nimoei ai-amboani puküna hoafindeimboyei,” mehu.

Sisas ai Serusaremimbo araninambomarandi

⁴¹Sisas ai Serusarem ngoafikimi huhü ngoafi ra hoeireandühi ahambo araninambomarandi. ⁴²Ai yare hoafiyuhi yahuya, “Serusarem, haponda ndani sihi se aboedi nimarimbo hohoanimo nimindi ra fifirimbarowam-
mbonana, aboediyo. ᅅga hapondani ana awi rani-moatükuni ra moai se hoeirowandi. ⁴³Mami simboani süᅅgunambo ana nindou sihambo hürütürunineimbi ranai hifi sihafi ginirikimi wakindimondühi püpindu difomombo sihambo muᅅguambo güdüninimboemo. ⁴⁴Rananimbo sihambo moaruwaimbo-nduninimboemo asu se-babidi amarei ranaheimbo amboa. Asu ᅅgiri nimoei mami amboani nimoei ᅅgoründiwami hiniᅅᅅgindundi. Nimboe se moai fifirowandi sapo God ai sihambo aboedambo-feninimbohünda makusu ra,” mehu.

Sisas ai Godindi worambe kaki semindimbo ratüपुरi ratüपुरimemonda hemafoareapuri

(Matyu 21:12-17; Mak 11:15-19; Son 2:13-22)

⁴⁵Sisas ai Godindi worambe kefuai hüfu nindou kakihumbo napo sihoumarundi ra pütifoendühi hemafoareapuri. ⁴⁶Ai yare hoafiyipurihi yahuya, “Godindi Buk ai yare hoafiyohü yahoya, ‘Wandi wori ranana didibafifembo wori yanᅅgirane. ᅅga se hümbuhüni nindou ranahei dibofembo fondimboarihindi,’ meho.” ⁴⁷ᅅga muᅅguambo si Godindi wori ranambe nindou yamundireandüri marandi. Asu Godimbo sesi sihou-

rundeimbi bogori, ahinümbi hohoanimo fifirundeimbi, bogori nindou bidifiri ai Sisasimbo nini-süngufe hifokoefimbo nafi kokomarundi.
 48 Iŋga nindou afindi ranai ahandi hoafi himborimbo afindi hohoanimo mayeiambo wambo moai ahambo hifokoefimbo nafi ra fifirundi.

**Sudahündi ai Sisasimboya düdi sihambo ŋginindi
 masendi yahomo düdumefundi
 (Matyu 21:23-27; Mak 11:27-33)**

20 ¹Mami simboani Sisas ai Godindi worambe nimorehi nindowenihimbo yamundireandürühi aboedi hoafi ra bokarimarihendi. Raniyo Godimbo sihou-rundeimbi bogori, ahinümbi hohoanimo fifirundeimbi bogori, asu Suda-yafe bogori ai Sisas babidimbo wataporimbo mahafomo. ²Ai hoafiyomondühi yahomoya, “Se hoafiyafimuni nini ŋginindinamboyo rani-moatükuni raro aranda? Düdi sihambo rani ŋginindi ra masaganina?” mehomom. ³Sisas ai simbori hoafiyupurühi yahuya, “Ro-amboa sihamumbo mami moatükuni düdundaheanda asu se wambo hoafindimo. ⁴Sapo Son ai nindoumbo hundürumarandüri ŋginindi ra Godindi-mayoyo asu nindou-yafe-mayoyo?” mehu.

⁵Raniyomo ahamundihoari simbori hoafindüriyomondühi yahomoya, “Sapo sihiri hoafiyefühiya, Son hundürura marandi ranana Godindi-mayoane asefi ana, ai rande hoafindühiya, ‘Asu nimboe se ranahambo anihondümbofekoate-ayomoa,’ mbüsümbui. ⁶Iŋga asu sihiri hoafiyefühiya, ‘Ranana nindou-yafe-mayoane,’ asefi ana, nindou ranai sihefimbo nimoeinambo-ndihümunimboyei. Nimboe sapo ai fifirihori Son ai Godindi hoafi hoafiyu-randeimb-ani sei anihondümborihorühi wambo?” mehomom. ⁷Raniyomo Sisasimbo raru hoafiyomondühi yahomoya, “Ro moai fifirihundi Son ai rani ŋginindi ra nahünda semündü-hayambombai,” mehomom. ⁸Iŋga Sisas ai yare hoafiyupurühi yahuya, “Ro-amboa ŋgiri hoafindahapuri düdi wambo ŋginindi masendi ratüpurimbohünda,” mehu.

**Nindou moaruwai wain nümbüri hifandimarundi kafeefe hoafi
 (Matyu 21:33-46; Mak 12:1-12)**

⁹Sisas ai nindou ranaheimbo kafeefe hoafi mami hoafiyundürühi yahuya, “Nindou mami ai wain hififembo nümbürira mbura nümbüri ra nindou bodimondi-yomondi warambe hiniŋgimareandi ranifihiki kaki semindimbo ratüpurimbohünda. Asu ai hu anguni ŋgorü hifini gedühi manüŋgu. ¹⁰Asu wain ranai hisimayowamboyo nindou mami koamariheira nümbürambe ratüpurimemo ranahamumbo sowana bidifiri hisi nümbürambeahindi semindimbohünda mahüfu. Iŋga asu nindou nümbüri ranambe ratüpurimemo ranai bubururü mburumbo

nini akidou-amboani warambefekoate koamarihawura mahu.

¹¹Asükaiyu ŋgorü koamariheira ahamumbo sowana mahüfu. Raniyo ranahambo amboani ahinikoate bubururü mburumbo nini akidou-amboani warambefendokoate koamarihawura mahu. ¹²Asükaiyu ŋgorü koamariheira mahüfu. Ŋga asükaiyomo ahambo amboani nümbüri hifandi-rundeimbi ranai bubururü mburumbo moanambühi kiafu hüründümo pimarüwuri.

¹³Raniyu asu nümbüri afindi ranai hoafiyuhi yahuya, ‘Haponda ro nüngumandihea? Ro wandi nimori afindi hohoanimo-yahandoweimbi ra koandihihinimboyahi. Awi ahandi hoafi animbo himborindimboemo.’

¹⁴Ŋga asu nümbüri hifandi-rundeimbi ranai nindou ranahandi nimori masüfuwa hoeirüwuri houmbo simbori hoafiriyomondühi yahomoya, ‘Nindou ndanana nümbüri afindandi nimor-ani. Sihiri ahambo hifokoararihuri animbo asu muŋgu-moatükuni ra sihefindimboe,’ mehomo. ¹⁵Raniyo nümbüri hifandi-rundeimbi ranai nümbürambeahindi sowaründümo moanewani tüküyafu homo hifokoamarüwuri. Asu nümbüri rani afindi ranai nindou ranahamumbo nini-nününgumandepura? ¹⁶Ai düdi nümbüri ranambeahindi nindou ranahamumbo hifokoandepurühi wain nümbüri ra nindou bidiframbo dagapurimbui,” mehu. Nindou ranai hoafi ra himboriyei hehimbo hoafiyeihi seiya, “Awi rani-moatükuni ra tükündifemboe, ŋga ambembeyo-wamboane,” masei.

¹⁷Ŋga Sisas ai aheimbo himboari pareandürühi nüngumbo düdureandürühi yahuya, “Nimboe asu Godindi bukambe sürü ra paru masihoemoa?

‘Nimoei worimboru-rundeimbi ai moaruwai-ane yahomo houmbo ambe mehomo,

ŋga nimoei ra wori ranahambo ŋginemindimbo weaŋgurühididi bogori nimoeiyo.’

Buk Song 18:22

¹⁸Muŋguambo nindou nimoei raniwami piraye ana, ai mbusümo kikindahimboyei, asu nimoei ranai nindouwami pirayo ana, nindoumbo muŋguna mosihoasindiheirimboe,” mehu.

¹⁹Raniyo ahinümbi hohoanimo fifirundeimbiyomo asu Godimbo sesi sihou-rundeimbi bogoriyomo ai raru fifirimarundi Sisas ai kafoefe hoafi hoafimayu ra ahamumboyo. Ranimboemo mami rani-simboani ai botife Sisasimbo kikihimindimbo hohoanimomemo, ŋga nimorehi nindowenihü ranaheimboya yihoeimbo nününgumandihimuni yahomo houmbo yihimbomemo.

Ai Sisarimbo takis kaki mandahündoyo asu wanimandiyo
(*Matyu 22:15-22; Mak 12:13-17*)

²⁰Ahinümbi hohoanimo fifirundeimbi-yomo asu Godimbo sesi sihou-rundeimbi-yomo ai Sisasimbo hifandurühi nindou bidifiri

koamarihoupura tikarhoumbo ahandi hoafi himborimbo nouyafu mahifomo. Nindou ranai ana tikaru hou ŋgorü süŋgufihi ahandi hoafi himboriyowohü moaruwai hoafimayu yaho hefe gafman bogorindi warihü hiniŋgifiyuwanü papi-hoafi-mbürramboane, yahomomboemo. ²¹ Tirifoefe hoafombo mahifomo ranai düduyafundühi yahomoya, “Nindou yamundo-randeimbi, fifirihumboanefi hoafi se hoafayaf-ane asu yamundarowand-ane ranana anihond-ane. Seana nindou ranai adükari ndüreimbimbayeiyu asu ndürikoate-mbayeiyu ra moai hohoanimoyafi, ŋga seana anihondümbofe hohoanimo Godindi-mayo ranane yamundo arandi. ²² Se yihoefimbo hoafiyafi, ro Sisarimbo takis kaki ra mandahundoyo asu wanimandiyo?” mehomu.

²³⁻²⁴ Sisas ai fifireandi ranana ahambo tikarhoumbo wosihoforirurühiyomo asu simbori hoafiyuhi yahuya, “Wambo kaki mami nafuiyomo. Sisami asu ndüri kakifihü apeniŋgo ra dadea?” mehuamboemo. Yahomoya, “Sisarind-ane,” mehomondamboyu. ²⁵ Asu Sisas ai ahamumbo hoafiyupurühi yahuya, “Sisarindi moatükunayo ana, se Sisarimbo dabudo. Asu Godindi moatükunayo ana ra se Godimbo dabudo,” mehu. ²⁶ Raniyo Sisas ai nimorehi nindowenihi babidimbo nüŋgumbo wataporimbo-randambe moai wosihoforiyumbo hohoanimoyomo. Raniyomo ahamundi düdufe hoafi ranahambo simbori hoafiyu maranda hepünafundühi hoafi kikirindümo houmbo maningomo.

Sadyusi ai yifihündi botife ranahambo düdumefundi

(Matyu 22:23-33; Mak 12:18-27)

²⁷ Sadyusihündi bidifiri ai raru hohoanimoyomondühiya, nindou yifihündi ŋgiri asukai botindahindi yahomo-rundeimbi ai Sisas sowana mahifomo. ²⁸ Ai Sisasimbo düduyafundühi yahomoya, “Nindou yamundo-randeimbi, Moses ai sihefimbo hoafi mami sürü papira masihendi sapo nindou mami nimorehi semündü mbura asu nimori-koate yifayu ana, ahandi akidi ranai nimorehi ra asukai semündü haya nimori wakindamindoani nimori ranai amonjoandi nimori noumbiyuwamboane. ²⁹⁻³⁰ Mamimbo apodoho mami 7 maningomo. Amonjo hondü ai nimorehi semündü haya nimori-koate yifiyuane, asukai akidi mbusümonindi ai amonjoandi kai ra semündü haya yifiyuane. ³¹ Asukai akidi ŋgorü ai-amboani amonjoandi kai ra masemündu. Apodoho mami 7 ranai muŋguambo nimorehi ra semindeimbi yangirimemo, ŋga ai nimori-koate yifisafimemo. ³² Asu süŋguna nimorehi ranai-amboani yifimayo. ³³ Muŋguambo apodoho mami 7 ranai nimorehi ra masowandümo. Süŋgunambo nindou yifihündi botifeambe nimorehi ra dadi nimorehi-manda?” mehomu.

³⁴ Raniyo Sisas ai ahamumbo yare hoafiyipurühi yahuya, “Hifi ndanühane nindowenihi ai nimorehühiyafu asu nimorehi ai

anamindühiyahi arihündi. ³⁵Ŋga nimorehi nindowenihi yifihündi asükai yanggiri botayahindi ana, ŋgiri nimorehühindafu asu anamindühindahi rarandihündi. ³⁶Rani-simboani ana ai sünambeahindi nendi nahurai-wambo ŋgiri yifindei. Sapo God ai yifihündi botirearü hayambo wambo ai ahandi nimor-anei. ³⁷Sapo Moses amboani nindou yifiyeimbi botindahimboyei ranahambo ndore nafuimayu. Ai nimi akidou hai tikirimarandi ranahambo sürü papirandühiya, ‘Adükari God ranana Abraham, Aisak, Sekop ahamundani.’ ³⁸Ranimboane asu God ranana yifiyeimbiyei Godiyupoani, ŋga yanggiri aniboadeiyei God-ani. Nindou düdi ai Godayu ra koadürümbo yanggiri nüngumboani,” mehu.

³⁹Ahinümbi hohoanimo yamundu-rundeimbi bidifiri ai hoafiyomondühi yahomoya, “Nindou yamundo-randeimbi sihafi hoafi ra aboed-ane,” mehomo. ⁴⁰Raniyomo nindou ranai asükai ŋgorü moatükunimbo Sisasimbo düdufembo yihimbomemo.

Nindou ranaheimbo Sisas ai God koamafoariri ranahambo düdumefiyu
(*Matyu 22:41-46; Mak 12:35-37*)

⁴¹Raniyo Sisas ai nindou ranaheimbo düdureirühi yahuya, “Asu nimboe nindou ai hoafiyeihiya, ‘Krais nindou God ai nindoumbo aboedambo-fembo kamafoariri ra Defitindi ahuirani,’ aseia? ⁴²⁻⁴³Sapo Defit ahandihoari Herü Buk ranambe yare hoafiyuhiya,

‘Adükari ai wandi Adükarimbo hoafiyundowohü yahuya,
‘Se wandi warihondani bogorimbondafo nimandifi ŋgafimbo
ro sihambo hürütümbi ra sihafi hoarehi hiniŋgi-
ndiheapurimboane,’

Buk Song 10:1

mehu. ⁴⁴Defit ai nindou ranahambo Adükari yahu marandi, asu Krais ai nüngunde ahandi ahuirimanda?” mehu.

Sisas ai ahinümbi hohoanimo fifirundeimbimbo papi-hoafimarapuri
(*Matyu 23:1-36; Mak 12:38-40*)

⁴⁵⁻⁴⁶Nindou afindi ranai hihimboriyeiane, Sisas ai ahambo sünggurü-rundeimbimbo hoafiyuhi yahuya, “Se ahinümbi hohoanimo yamundu-rundeimbimbo hibadümbo. Ai hoandari hoeari güdife hefe hoahoango wakifeyoani nindou ai ahamumbo hihifiyopuri asu maketambe ahamumbo ahiniyopuri-ramboanemo hohoanimoemo. Aiana Suda-yafe rotu worambe fondi wagabe raniwami nimari asu sesi sesambe sia semindi nindife hefe wagabe nimarimboanemo hohoanimoemo.

⁴⁷Ŋga aiana nimorehi kaisahoabedi ranaheimbo wosihoafori-yondürühi ahei wori ahamumboru marundi. Asu ai aboedanemo mbiseiya yahomo houmbo Godimbo didibafiyomondühi ra hoandari hamindi didibafiyomo arundi. Ŋga sünggunambo nindou ranaheimbo yibobofendürimbo simboani ana tiŋjirifo afindi safi ndowandümboemo,” mehu.

Nimorehi kai napo-koate ai Godimbohünda kaki masihendi
(*Mak 12:41-44*)

21 ¹Sisas ai nimarü himboapoyuane, nindou napo afindeimbi ranai hei Godindi wori ranahandi hipirambe kaki mafoarihindi. ²Raniyo asu nimorehi kai napo-koate ranai hamburi kaki yimbu hipiri ranambe mafoareanda hoeimareandi. ³Sisas ai hoafiyupurühi yahuya, “Ro sihamumbo anihondümboanahi nda hoafayahapuri, nimorehi kai napo-koate masihendi ranai nindou napo afindeimbi masihehindi ranahambo ngasünde-amboane. ⁴Nindou napo afindeimbi masihehindi ranana akidouyo masihehindi, nga ahei adükari ana mbejgorindüri. Nga nimorehi kai ndanana akidou mejgoro ra masihendi,” mehu.

Sisas ai Godindi wori biriboemboe mehu
(*Matyu 24:1-2; Mak 13:1-2*)

⁵Sisasimbo süngrurü-rundeimbi bidifiri ranai Godindi wori ranahambo nimoei aboedinamboyo asu Godimbo saimbo moatüküninambo yihururu marundi ranahambo wataporimbomarundi. Nga asu Sisas ai hoafiyuhi yahuya, ⁶“Ro sihamumbo hoafayahapuri, ndani moatükuni hoeiarundi nda mami simboani ngiri nimoei mamamboani ngoründiwami nanjo, nga ai hifitireboai pütapindimboe,” mehu.

Sisas ai tijirifo afindi tükündifemboe, mehu
(*Matyu 24:3-14; Mak 13:3-13*)

⁷Asu ai düduyafundühi yahomoya, “Nindou yamundo-randeimbi, rani-moatükuni ra nungu-simboani tükümandifea? Nini boatei tükümandife rani-moatükuni tüküfemboayo ranahambo nafuimboa?” mehomo. ⁸Sisas ai hoafiyupurühi yahuya, “Se hibadumbo, nga nindou ai mami simboani sihamumbo tikai hoafindimboemo. Nindou afindi ai ngomo wandi ndüri dükandundühi animboya, ‘Ro rananahi nda,’ asu ‘Ndearambo rani-moatükuni ra tüküfemboane,’ mbisimboemo, nga se yowani ahamundi süngufepoani. ⁹Asu se ngorü hifihündi nindou yifiaremo hoafi, asu ngorü ngoafihündi yifiaremo hoafi ra himborindeihi yihimbondeimboyei. Nga sapo rani-moatükuni boatei tükündifemboe, nga bidifiranambo si ana ngiri nimai tükündifeyo,” mehu.

¹⁰Raniyo aheimbo hoafiyundürühi yahuya, “Ngorü hifihündi ai ngorü hifihündi babidimbo yifiarindimboemo asu ngorü adükari bogorindi nendi ai ngorü adükari bogorindi nendi babidimbo yifiarindimboe. ¹¹Hifihe afindi hamindi tükündifehü asu ngorügoanini sesikoate-ndeihi wembombondei asu angünihaindei raraondihümboyei. Asu sünambe rani-poanimbo yihimboeimbi moatükuni bidifiranambo si tüküfemboayo ra nafuimbohünda tükündifeyoani se yihimbondeimboyei. ¹²Nga rani-moatükuni ranai tüküfekoate-yoambe

animbo se wambo anihondumbo-arihindiri ranimbo-hünda nindou ai siheimbo kikihindümondüri houmbo moaruwaimbo-ndundürimboemo. Rananimbo rotu worambe papi-hoafindundüri mbundumbo karabusindundürimboemo. Asu ndowandümondüri ngomo adükari bogori asu gafmani-yomondi himboahü papi-hoafindundürimboemo. ¹³Refeambe animbo siheimbo aboedi hoafi ra wataporimbo-yombo nafi yagodimboe. ¹⁴Ranimboane se afindi hohoanimondeihya, ro nini hoafi hoafimandefi mbiseimboyei. ¹⁵Nimboe sapo ro wandihoari animbo sihei hohoanimoambe horindiheandühi ndorihoeimbi fifirife ndahandürani se hoafaye ra nindou ngorü ai-amboani ngiri gogonimbondihendühi moaruwaimbo-ndeandi. ¹⁶Siheimbo sihei boagiri, amongo-mami, akohoandi, rehimami, mamisiri, ngunindi rananimbo hürütümbi nindouyei warihündihindürimboyei. Rananimbo seambeahindi bidifiri ana hifokoandundürimboemo. ¹⁷Muṅguambo nindou ai sihamumbo moaruwaimbo-ndihindürimboyei, sapo se wambo anihondumbo-arihindiri ranimbo-hünda. ¹⁸⁻¹⁹Ṃga sihei mbirinani mami ra ngiri findihoaiyo. Se nginindi aniboadei animbo se yangiri niṅgombo hondü ndahümündimboyei. Rananimbo sihamundi fimbo fandihepurimboe sihamundi yangiri niṅgo ranahambo,” mehu.

Sisas ai Serusaremimbo moaruwaimbo-ndifemboe mehu

(Matyu 24:15-21; Mak 13:14-19)

²⁰Sisas yahuya, “Se hoeirihindani ami ai sinimo Serusarem ngoafi ra worari wakarundi ana, se fifirindihindi Serusarem ai ndeara moaruwaimbo akimane. ²¹Ranimbo nindou didiyei Sudia ngoafihü amarei se feboehi hehi hifi wafuana gagüsü asu Serusarem ngoafihü amarei se ngoafi ra hiniṅgindihi hehi ngorüni ngei, asu ngorü hifihü animboei se yowani Serusarem ngoafinambo hopoani. ²²Rani-simboani animbo God ai tinjirifo masahündüri ranaheimbo simbori moaruwaimbo-ndearümbui, rananimbo muṅgu-moatükuni Bukambe hoafimayo ra anihondü tükündifemboe. ²³Rani-simboani ana nimorehi warandühumbi asu nimori kehureimbi ana hipoanihimboeimbou-anei. Sapo rani-simboani animbo hifi ndanihü nimbore afindi tükündifehü asu Godindi moaruwaimbofe ra nimorehi nindowenihi ranaheiwami pindimboe. ²⁴Ranimbo hari nendi ai didimo nindou bidifirambo hifokoakondundürühi asu bidifirambo karabus nindoumbo-ndundüri muṅguambo hifina ndowandümondüri ngomboemo. Rananimbo ahei ndifo ranai Serusarem ngoafi ra pühindei nimandi ngeimbo God ai aheimbo hifandimbo hoafimayu süngu tükündifemboe,” mehu.

Nindou Hondü ai kudümbui

(Matyu 24:29-31; Mak 13:24-27)

²⁵Sisas ai hoafiyuhi yahuya, “Rani-simboani ana rani-poanimbo wosihoafari moatükuni hüfihamindi, amoamo asu mupui ranifihi

tükündifemboe. Asu hifini siriwara ranai afindi-afindindowohü mbundo pindo ndandani nindou ai afindi hohoanimondeihi yihimbondeimboyei. ²⁶Nindou afindi ranai hifi ndanihü nini-moatükuniyo tüküfemboayo ranahambo himbondeihi yihimbombo himboari wuwurindearümboe. Nimboe sapo muṅguambo ṅginindi moatükuni sünambe ranai-amboani fifimindimboembohünda. ²⁷Rananimbo nindou ai hoeindihorani Nindou Hondü ranai mburingai wami nimandü haya ahandi himboamupuimborandeimbi ṅginindi rani kapeihü kudümbui. ²⁸Rani-moatükuni ranai hapoadümbo tüküfembo mbisi haya tükündifeyoani botindahi nimboeimbo mbiro botindihindi sapo God ai siheimbo aboedambo-fembo ra ndeara tüküfembo yangirane,” mehu.

Süfuri nimindi ranahambo se türiboadihindi

(Matyu 24:32-35; Mak 13:28-31)

²⁹Sisas ai kafeofe hoafi mami hoafiyupurühi yahuya, “Se süfuri nimind-ane asu amuri nimi ranamboani hoeindundi. ³⁰Sapo se hoeirundani nimi ranai hoaihoai simbori bokari arandi ana, se fifirindundi ai ndeara hoembo yahomboane. ³¹Mami yahuraiane sapo se hoeindundani rani-moatükuni tükefeyo ra se fifirndundi God ṅginindi hifandarandi ra ndeara tüküfembo yangir-ane. ³²Ro sihamumbo anihondümboanahi hoafayahapuri, ṅga se fifirindundi nindou hapondani animboei ranai yifikoate-yeiambe animbo rani-moatükuni ra tükündifemboe. ³³Hifi sünü ana awarindihoemboe, ṅga wandi hoafi ana ṅgiri awarindihoeyo,” mehu.

Sisasimbo süṅgrurü-rundeimbi ai hibadümbo

³⁴⁻³⁵Sisas ai hoafiyupurühi yahuya, “Se hibadümbo! Se muṅguambo sesesindimo asu bia ndimindimo houmbo mamikari hohoanimondimo asu findi moatükuni ranimbo afindi hohoanimondimo ndümboemo. Rani-moatükuni ranai sihamumbo andürambe ninihondi pirayo nou yahurai animbo randeapuriimboe. ³⁶Se muṅguambo si hibadü niṅgomombo Godimbo didibafindafu ndundi. Tiṅjirifo tükefeyo ra ṅginindi niṅgo hombohünda asu Nindou Hondüdi himboarühi tüküfembohünda ranimbo didibafindafundi,” mehu. ³⁷Sisas ai muṅguambo si Godindi wori ranambe nindou yamundeandüri hu asu nimbokoani hafu Orif Hifi Wafuambe apu marandi. ³⁸Asu nindou ranai siambe hondü Sisasindi hoafi himborimbohünda Godindi worina hei marihüdi.

Suda-yafe bogori nindou ai Sisasimbo hifokoeffimbo hoafi fifirimarundi

(Matyu 26:1-5, 14-16; Mak 14:1-2, 10-11; Son 11:45-53)

22 ¹Bret yisikoate seseimbo si Pasofa sei-arihüdi ranai tüküfembo yangirimayo. ²Raniyo Godimbo sesi sihou-

rundeimbi bogoriyomo asu ahinümbi hohoanimi fifirundeimbiyomo ai nimorehi nindowenihibo yihimboyomondühi Sisasimbo hifokoefimbo nafi kokomarundi. ³Raniyo Sudas Iskariot Sisasimbo süngrurü-rundeimbendambo mami ahandi fiambe Satan ai mafarifiyu. ⁴Raniyo Sudas ai Godimbo sesi sihou-rundeimbi asu prisman bidifiri Godindi wori hifandimarundi ahamumbo sowanambo ai nününgundiri Sisasimbo ahamundi warihümandiri ranimbo fifirifembohünda mahu. ⁵Raniyomo asu nindou ranai hihifi-hihifiyomondühi Sudasimbo kaki masabudo. ⁶Ai hohoanimi mami-sünguru mburumbo hifanda humbo nindou afindi ranai Sisas-dibo nimarikoate-yei-ambe ahamundi warihüfimbo yahu hayamboyu.

**Sisas ai ahambo süngrurü-rundeimbi babidi sesesi si
ra nimarimombo masiwasümo**

(Matyu 26:17-25; Mak 14:12-21; Son 13:21-30)

⁷Bret yisi-koate sesimbo si God ai Israerimbo aboedambo-mareandüri ra tüküfeyoambe animbo sipsip nimori ra hifokoefemboane. ⁸Sisas ai Pita weimbo Sonimbo hoafiyupirühi yahuya, “Ŋgafani sesi sihefimbo sindindineamuni adükari si ranihü sesesimbohünda,” mehupiri. ⁹Asu simbori düdurinerühi safaniya, “Nahanihümboyafi yihoehimbo sesi ra sindifembo hoafayafimuni rana?” masafani. ¹⁰Asu simbori hoafiyupirühi yahuya, “Ŋgoafi adükari ranihü ŋgafandühi nindou mami ai hoe hipirambe fuindamündü haya ŋguani hoeindinerimboyafani. Ŋga ahambo animbo süngundiniri nini worambeahiyo karefuendi ra. ¹¹Ranimbo wori aharambüri ranahambo hoafindafinandowohüya, ‘Yamunde-randeimbi ai sihambo hoafiyuhi yahuya, ‘Ro wambo süngurundiri-rundeimbi babidi wori nahanambe sesesimandefi God ai Israerimbo aboedambo-mareandüri si ra?’ mehuamboane,’ mbisafani. ¹²Asu ai sihafanimbo sesi napo kurife nimari sesimbo fondi afindi buriyoweimbi nimoamonindi wori nafuindüpürimbui. Se ranihü sesi napo sindindineandi,” mehu. ¹³Rani-yafani Pita weimbo Son ai hafani hoeiri-neandane asu muŋguambo moatükuni ra Sisas hoafimayu süngu tüküme feyo. Rani-yafani asu ranihü sesi ra sindimarineandi.

**Adükarindi sesi Sisas ahandihoari
süngrurü-rundeimbimbo masagapuri**

(Matyu 26:26-30; Mak 14:22-26; 1 Korin 11:23-25)

¹⁴Sesi sesimbo yahomo houmbo Sisas ai ahambo süngrurü-rundeimbi babidimbo sesi fondühi mamarimo. ¹⁵Ai ahamumbo hoafiyupurühi yahuya, “Ro afindi hamindi yifirayahi se-babidi sesesimbo God ai Israerimbo aboedambo-mareandüri si, ŋga asu süngunambo ana ro asübusi afindi ndahamindimboyahi. ¹⁶Ro asükai ŋgiri sesi ndahurahi

dagadihi, nga ngombo rani-moatükuni ra God hifandarandi ranambe tükündifemboe,” mehu.

¹⁷Raniyu Sisas ai kap hoe semündü Godimbo hihifirüri mbura yahuya, “Kap hoe nda sowandümo houmbo sihamundihoari simindimo. ¹⁸Asu ro wain boboe ra asüakai simindikoate ngambo God nginindi hifandarandi ra tükündifemboe,” mehu. ¹⁹Asu asükaiyu bret semündü Godimbo hihifirüri mbura hifitire ahambo süngrurü-rundeimbo yimbureapurühi yahuya, “Nda wandi saf-ane asahapuri. Ijga se wambo hohoanimomböhünda randu ndundi,” mehu.

²⁰Mare yahurai sesi sowasümo mburu Sisas ai kap semündü hayambo hoafiyühi yahuya, “Kap nda wandi hori sihamumbohündambo karefoendi rananimbo simbori hoafi femindi asihefeyo ra nginindamindimboe.

²¹Sihamundi mbusümo nindou mami ai wambo hürütümbi nindou-yafe warihündeandirimbui. Ijga ahandi watijari ra wandi dibore sesi nandife fondiwami anango. ²²Nine-moatükuni God ai Nindou Hondü ahambo refimbo hohoanimomayu ra yahurai tükündifemboe. Ijga Nindou Hondümbi hürütümbi nindou-yomondi warühariri ranai hipoanimbembou-ani,” mehu.

²³Raniyomo asu süngrurü-rundeimbi ai ahamundihoari rani-moatükuni ra didi ramande yahomo houmbo simborindüwurimemo.

**Süngrurü-rundeimbi ai düdi adükarayu yahomo
houmbo hoafinambo simbori simborimemo**

²⁴Sisasimbo süngrurü-rundeimbi ai düdi adükarayu yahomo houmbo simbori hoafiyomondühi mamarimo. ²⁵Sisas ai hoafiyupurühi yahuya, “Ndifoyei adükari bogori ai ana ndüreimbiyomo houmboanemo asu nimorehi nindowenihi ra hifandiründüri arundi. Ijga nindou ranaheimbo hifandiründüri arundi ranahamumbo aboedi farihou-rundeimb-anemo sei arihündi. ²⁶Se yahurai randafumboemo, nga adükari hamindayu sihamundi mbusümo ra ai hoarifi nindou nahurai-mbiyuwamboane. Asu horombofi hu ratüpuriyu-randeimbi ai fehefembo ratüpuriyu-randeimbi nahurai-mbiyuwamboane. ²⁷Düdi adükari hamindayua? Sesesi fondühi amaruyu asu sesi yimbuareandiyu? Se raru hohoanimoyomondühiya sesesi fondühi amaruyu ai adükari hamindayu. Ijga roana sihamundi mbusümo fehefembo ratüpuri ratüpuriya rihandeimbi nahurai-anahi. ²⁸Se wambo tijirifo tükümehefeyo ra moai hiningiründiri. ²⁹Ro sihamumbo hifandimbo nginindi asahapuri wandi Ape wambo hifandimbo nginindi masendiri nou. ³⁰Se ro nginindi hifandarihandi ranambe wandi sesi fondiwami sesi dowadümo hoe ndimindimondumboemo. Asu se bogorindi nimari fondiwami nimandüombo Isiraeri-yafe siri 12 ra hibadüboemo,” mehu.

**Sisas ai Pitamboya, ai wambo daboadi hihirindeandirimbui mehu
(Matyu 26:31-35; Mak 14:27-31; Son 13:36-38)**

³¹“Saimon, Saimon, Satan ai sihafi anihondümbofe ra refe hoiefembo hoafiyumboani sapo nimorehi mbani hiriyeihi

badini pirihindühi safi hiningarihindi nou. ³²Ŋga ro Godimbo didibafimeheandi sihafi anihondümbofe ra hiningindowamboyafi sahehea. Ranimbo se asukai hihirindafo wambo sowanambo didifihumbo apodoho-apodohoyomondeimbi ranahamumbo fandihawapura ŋginindimbeyomo-ndamboane,” mehu. ³³Ŋga Pita ai Sisasimbo hoafiyunduwohü yahuya, “Adükari, ro ndearambo nafirihamindimboanahi se-dibo karabusambe hombo asu yifimbo amboani,” mehu. ³⁴Sisas ai hoafiyuhi yahuya, “Pita, hapo nimbikoani kakaro ai hoafikoate-yuambe animbo se wamboya ŋgimimbo moai fifirihini mbisafindirimboyafi,” mehundo.

Sisas ai ahambo süngrurü-rundeimbimbo kaki sandife arü pisao yihimindi asu napo arü ra mbisiwandümu-ndamboane mehu

³⁵Sisas ai ahambo süngrurü-rundeimbi ranahamumbo hoafiyupurühi yahuya, “Horombo ro sihamumbo koariheheapurühi sahiya, ‘Se kaki sandiferambo arüyo asu napo sandiferambo arüyo, asu su yirambe kikifoefemboane semindipoani’ masahi rani-simboani se bidifiri moatükuni mbonimborundümondai?” Ai hoafiyomondühi yahomoya, “Wani,” mehomu. ³⁶Ahamumbo hoafiyupurühi yahuya, “Haponda nindou düdi se kaki sandiferambo arü, düdi se pisao yihimindi hamindi ra semindikoate-ayu ana, ahandi ŋgisihari hoeari ra nindou ŋgorumbo sagadowohumbo asu rani fihindi kaki ndemündü haya pemimbiyu-wamboane. ³⁷Godindi bukambe hoafiyowohü yahoya, ‘Ahambo moaruwai hohoanimoyu-randeimbi nindou nahurai randihorimboyei,’ meho ranana wamboyo, ŋga ranane hapondanambe tükefeyo,” mehu. ³⁸Ahandi süngrurü-rundeimbi ai hoafiyomondühi yahomoya, “Adükari! Hoeiro, pisao yihimindi hamindi yimbu nda,” mehomu. Ai hoafiyupurühi yahupuriya, “Ra ndearane,” mehupuri.

Sisas ai Orif Wafuambe Godimbo didibafimayu
(*Matyu 26:36-46; Mak 14:32-42*)

³⁹Sisas ai adükari ŋgoafi ra hiningire hayambo Orif Wafuana mahafu sapo muŋguambo si refi marandi nou. Raniyomo asu ahambo süngrurü-rundeimbi ai ahandi süngu mahafomo. ⁴⁰Ai hafomo nimarimboyohü tüküfihü hoafiyupurühi yahupuriya, “Nini-moatükuni sihamumbo rande hoeindeapurimboe ranimbo-hünda se Godimbo didibafindafundani sihamumbo ŋginindi mbisagapur-amboane,” mehupuri. ⁴¹Sapo nimoei pifeyoani ho pirayo rani simogodühi safi Sisas ai hu yiri yimbu pusire nimarumbo Godimbo didibafimefiyu. ⁴²“Ape, se yifirayafi ana, wambo asübusümbi moatükuni tüküfemboayo ra raguanambo-ndowandi. Ŋga se nine yifirayafi rani süngundowandi, ŋga ro yifirayahi rani süngufepoani,” mehu. ⁴³Raniyo asu sünambeahindi nendi ai ahambo

nginemündümbohünda tüküme fiyu. ⁴⁴Sisas ai asübusi afindi hamindi semindimboayu ranahambo hamindi tütüngirihoei hayambo Godimbo didibafimayu hoango. Raniyo asu ahandi yikunimihoe ranai hori nahurai pimendo hoango.

⁴⁵Sisas ai Godimbo didibafiyu moendire hayambo ahambo süngururü-rundeimbimbo sowana huane asu mapomo sapo afindi hohoanimoyomondühi wambo. ⁴⁶Sisas ai hoafiyupurühi yahuya, “Nimboe se hapoana apusayomoa? Ijga botiyafu Godimbo didibafindafundi nini-moatükuni rande hoeindeapurani nginepurimindimbohünda,” mehu.

Sisasimbo mbumaründümo

(Matyu 26:47-56; Mak 14:43-50; Son 18:3-11)

⁴⁷Sisas ai wataporiyuhü nünguambe awai nendi afindi ranai masifo. Sapo Sudas Sisasimbo süngururü-rundeimbi ambeahindi-mayu ranai sepurimündü haya mahafomo. Raniyu asu Sudas ai Sisasimbo wakikihimbohünda ahandi fikimi mahu. ⁴⁸Asu Sisas ai hoafiyundühi yahuya, “Sudas, se wakikihimbo asafi ra Nindou Hondumbo hürütümbi nindou-yafe warihüfimbo safomboyafi?” mehu. ⁴⁹Sisasimbo süngururü-rundeimbi ai hoeirundane ahambo kikihimindimbo yanggirimemondamboemo hoafiyomondühi yahomoya, “Adükari, ro yihoefi pisao yihimindi safi ranambo hitihupirimbo?” mehomo. ⁵⁰Raniyo asu aihündi mami ai pisao ndarihendühindamboyu Godimbo sesi sihou-rundeimbi bogori hondüdi ratüpuriyu-randeimbimbo warihondü himbohoeari mafoafoareando. ⁵¹Sisas ai hoafiyuhi yahuya, “Yowan! Ndahurai refepoani!” mehu. Raniyo ahandi himbohoeari ra wari pamareanda asüakai koadürü koadürümefeyo.

⁵²Nindou sapo Sisasimbo kikihimindimbo masifomo ra Godimbo sesi sihou-rundeimbi bogoriyomo, Godindi wori hifandiru-rundeimbi prisman bogoriyomo asu Suda-yafe boboagori raniyomo. Sisas ai hoafiyupurühi yahuya, “Se pisao yihimindi asu nimihari fufuründümo masifomo ra hümbohüni nindoumbo kikihemündimbo nahurayomo. ⁵³Ro sebaðimbo münguambo si Godindi worambe nimari marihandi ra moai ranihü kikihiründümondiri. Ijga haponda sihamundi siane nimboe nimbi ai adükari tüküfilhi simbo ngasündeamboane,” mehu.

Pita ai Sisasimboya, Ro moai fifirihini mehu

(Matyu 26:57-58, 69-75; Mak 14:53-54, 66-72; Son 18:12-18, 25-27)

⁵⁴Sisasimbo kikihiründümo houmbo Godimbo sesi sihai-randeimbi bogori hondü ahandi worinambo sowaründümo mahifomo. Raniyo asu Pita ai süngumarapuri hüfu. ⁵⁵Asu ai hai wori gabusümo püpuru houmbo mamarimondamboyu ranihü ai-babidimbo mamarimo.

⁵⁶Nimorehi mami ratüpuriyo-randeimbi ai hai sihi himboyowane Pita ai mamaruwamboyo ndoreri türüfoareri mbura hoafiyowohü yahoya, “Nindou ndanana sapo Sisas-dibo hu marandani,” meho. ⁵⁷Pita ai hoafiyuhi yahuya, “Nimorehi se hoafayafi ranana moai akidou-amboani ro fifirihini,” mehu.

⁵⁸Asu rani wangabeahi safi nindou ngorü ai hoeiriri hayambo hoafiyundühi yahuya, “Igorü ana sapo seanafisi.” Ijga Pita ai hoafiyuhi yahuya, “Wandafi, roana wananahi ana,” mehu. ⁵⁹Ran-ahandambohündi gedühi safi homboyoane asüakai nindou ngorü ai hütü hoafimarüri, “Sapo nindou ndanana Sisas-diborihindani nimboe ai-amboani Garirihündani.” ⁶⁰Asu Pita ai hoafiyuhiya, “Wandafi, roana moai fifiriheandi se wataporimbo-arandi ranahambo!” mehu. Raniyo asu hoafiyuambe kakaro ai hoafimayu. ⁶¹Raniyo asu Adükari ai hihirifi Pitambo türümafoariri. Asu Pita ai hohoanimomayu Adükari ai hoafimeindo ranahambo. Hapo nimbokoani kakaro ai hoafikoate-yuambe animbo se ngimimbo wambo moai fifirihini mbisafindirimboayafi. ⁶²Raniyu asu Pita ai weindani tüküfi hu afindi hamindi aranimayu.

Nindou ai Sisasimbo tirifoefe hoafiyomondühi harimemondo
(*Matyu 26:67-68; Mak 14:65*)

⁶³Nindou Sisasimbo hifandimaruri ranai tirifoefe hoafiyomondühi bubumaruri. ⁶⁴Ai ahandi himboari hoarinambo gabudifoarüwuri houmbo hoafiyomondowohü yahomoya, “Se Godindi hoafi hoafiyafi-randeimbayafi ana, hoafiyafimuni düdi sihambo harimayunini rana!” mehomo. ⁶⁵Ai Sisasimbo moaruwai hoafiyomondo marundi.

Sisas ai kansri-yomondi himboarühi tüküfi hoafi didiboadomareandi
(*Matyu 26:59-66; Mak 14:55-64; Son 18:19-24*)

⁶⁶Simayowamboyo hifandi-rundeimbi ai mafandundi. Asu Godimbo sesi sihou-rundeimbi bogoriyomo asu ahinümbi hohoanimo yamundurundeimbiyomo ai-amboa ai-babidi fandu mburumbo Sisasimbo sowarindümo ahamundi bogori hondü kot raninambo mahifomo. ⁶⁷Ai hoafiyomondühi yahomoya, “Se Krais-ayafi ana, hoafindafimuni,” mehomo. Sisas ai hoafiyupurühi yahuya, “Ro hoafehapuri amboani ngiri se wambo anihondumbo-ndundiri. ⁶⁸Asu simbori sihamumbo ro düdueheapuri amboani ngiri hoafindimondiri. ⁶⁹Haponda ndanihü piyo hayambo süngunambo aho ranana, Nindou Hondü ai God Ijginindeimbi ahandi warihondü warihü nimandümbui,” mehu.

⁷⁰Ai munguambo hoafiyomondühi yahomoya, “Ranayo ana, se Godindi nimoriyafi?” Sisas ai hoafiyupurühi yahuya, “Se sihamundihoari hoafayomo rasi, nga rananahi,” mehu. ⁷¹Ai hoafiyomondühi yahomoya, “Refe ana, nimboe nindou ngorumbo ahambo hoefimbo hoafayefa?”

Ŋga ndearambo sihefi himboambenambo hoafimayuambo himboriyefi-mboanefisi,” mehomo.

Pairatimbo sowana Sisas sowaründümo mahifomo
(*Matyu 27:1-2, 11-14; Mak 15:1-5; Son 18:28-38*)

23 ¹Munġuambo rani bobogori-memo ranai Sisasimbo sowaründümo Pairat sowanambo mahifomo. ²Ai ahambo papi-hoafirirurühi yahomoya, “Nindou nda sihefi nendambo hohoanimo mamikarimarandüra kikihimarihurimindefi. Ai hoafiyuhi yahuya, ‘Yowani Sisarimbo kaki saimbopoani,’ yahu asu ahandi fimboya, ‘Krais, adükari bogor-anahi,’ mehu,” mehomo.

³Pairat ai Sisasimbo düdurirühi yahuya, “Se ra Suda-yafe adükari bogoriyafi?” mehuamboyu. Sisas ai simbori hoafiyuhi yahuya, “Sihafihoari hoafayafisi,” mehu. ⁴Pairat ai Godimbo sesi sihou-rundeimbi bogoriyomo asu awai nendi afindi mengoro ranaheimbo hoafiyuhi yahundüriya, “Ro nindou nda moai nini-moatükuni moaruwai rareanda hoafi himboriyahi,” mehu. ⁵Ai asükaiyei puküna hoafiyehi seiya, “Sisas ai hoahoangu wakireandühi nindou yamundireandühi hohoanimo botimareandüri. Ai Gariri hifihü piyu haya sünumbo Sudia hifihü tükümefiyu,” masei.

Pairat ai Sisasimbo Herot sowana koamariheirü

⁶Pairat ai hoafi ra himboriyu haya düdüfihü yahuya, “Garirihündiyu nindou nda?” mehu. ⁷Herot ai mami profens hifi ra hifandimarandi rani hoarehiyu Sisas ai manüngu. Ranimboyu asu Pairat ai Sisasimbo Herot sowana koamariheirambo mahu sapo Herot ai rani-simboani Serusaremhü mamaru wambo.

⁸Herot ai Sisas hoeirirani mayowambo hihifi-hihifimayu, nimboe sapo ai moani hoafi yangiri himboriyu hayambo asu hoeindihini mehu. Ai sapo yare hohoanimoyuhü Sisas ai hepünifeimbi moatükuni randeanda hoeindihea yahuhayambo. ⁹Herot ai Sisasimbo düdu-düdumarüri, ŋga asu moai akidou-amboani nini hoafi hoafiyu, ŋga wani. ¹⁰Godimbo sesi sihou-rundeimbi bogori asu ahinümbi hohoanimo yamundu-rundeimbi akimi maningomo ranai tikaruhoumbo Sisasimbo papi-hoafimaruri. ¹¹Herot ai ahandi ami babidi Sisasimbo tirifoefe hoafiyomo mburumbo asu bogori-yomondi hoeari aboedi safi yihuruwuri mburumbo asükai Pairat sowana koamarihawuri. ¹²Horombo ana, Pairat ai Heroti-dibo simbori ŋginindürimefaniyosi, ŋga rasimboani ai aboedi-aboedimefineandi.

Pairat ai Sisasimboya yifimbiyuwamboane mehu
(*Matyu 27:15-26; Mak 15:6-15; Son 18:39; 19:16*)

¹³Pairat ai Godimbo sesi sihou-rundeimbi bogori asu Sudayei bogori munġuambo nindou amuri raniyei aheimbo gugurimareandüri. ¹⁴Ai

hoafiyundürühi yahuya, “Nindou wambo sowana sahorimindei masinei ndanahambo hoafiyeihi seiya, ‘Moaruwai hohoanimoyu randeimbani’ masei. Ro ahambo sihei himboarühi düdumarihini, nga ro moai se ahambo papi-hoafimarihori ra nini-moatükuni moaruwai rareanda hoafi himboriyahi. ¹⁵Asu Herot ai hoeirirani nini-moatükuni moai rareandi, nga ranimboyu hihiriri sihefimbo sowana koamaritheirambo masunu. Nga asu ai nini-moatükuni moaruwai rareandai animbo ranimbo yifimanda? ¹⁶⁻¹⁷Ro ahambo tiñirifo ndahando mbundihambo animbo asu moani aboedi koandihahina ngumbui,” mehu

¹⁸Munquambo nindou ranai fandihi puküna hoafiyeihi seiya, “Nindou nda ndahorimindei ngei hifokoandihori. Nga rananimbo Barabasimbo aboedambo-fimboani!” masei. ¹⁹Barabas ra ai adükari ngoafihü gafman babidi yifiariyu nindou hifokoare hayambo karabusimefiyu-ani.

²⁰Pairat ai Sisasimbo hiniñgifiyuwani aboedambo homboani mehu raniyu asu awai nendi afindi ranaheimbo asukai hoafimeyundüri. ²¹Ai asukai puküna hoafi karihehindühi seiya, “Nimi keimbi karihendeimbifihi pandiwuri! Nimi keimbi karihendeimbifihi pandiwuri,” ranimaye.

²²Ai asukaiyu ngimimbo düdureandürühi yahuya, “Nine-moatükuni ramareandi? Ahambo hifokoefimbo ase ra ro hoeirihina moai nini moatükuni akidou-amboani rareandani hoafi himboriyahi. Nga moani akidou yangiri tiñirifo ndahando mbundiha aboedambo koandihahina mbihu,” mehu. ²³Nga ai moani hoafi puküna karihehindühi hütihofafiyeihi seiya, “Sisas ai yifimbiyu-wamboane, yifimbiyu-wamboane,” mayei. Ai hoafimaye habodei ra moani Pairatindi hoafi ngasunde hayambo ahei nimoamo hamindimayondüri. ²⁴Raniyu asu Pairat ai Sisasimbo ahei hohoanimoyu süngumareandi. ²⁵Raniyu nindou mam Barabas gafman babidimbo yifiariyu nindou hifokoare hayambo karabusambe mamaru ahambo aboedambo koamarisherü. Raniyu asu ai Suda nine refembo yifirimaye süngu Sisasimbo ami-yomondi warihumariri.

Sisasimbo nimi keimbi karihendeimbifihi tikoründümo pamarüwuri
(*Matyu 27:32-44; Mak 15:21-32; Son 19:17-27*)

²⁶Sisasimbo sowaründümo homondane Saimon Sairinihündi ai nafini masüfu ngoafinambo hifombo yahuhayambo. Raniyomo asu Sisasindi nimi keimbi karihendeimbi ra sowandifi hawa Sisasindi süngu hüfi yahomo houmbo hütihütimaruri. ²⁷Asu awai nendi afindi ranai Sisasindi süngu hüsihi, nimorehi bidifiri ranambeahi mahüsi ranai Sisasimbo hohoanimoyeihi araninambo sahorimindei mahüsi. ²⁸Nga asu Sisas ai hihirifi hoafiyundürühi yahuya, “Serusaremhündi nimorehi se yowani wambo araninambo-yondiripoani. Nga sihei fimbo asu sihei

nimoakidiboumbo animbo araninambo-ndihündüri. ²⁹ Awi mami si tükündifemboe rani-simboani nindou ranai hoafindeihiya, ‘Nimorehi nimori wakemindikoate-ayei asu nimori titihükoate-ayei se hihifi-hihifindei. Sapo aheimbo tinjirifo ra ngiri tükündifeyo,’ mbiseimboyei

³⁰ Rani-simboani animbo

nindou ai nimoei wafumbo hoafindeihiya,

‘Wamini piyafimuni,’ mbisei.

Asu asukai hifi wafumboya,

‘Gabudifoariwamuni,’ mbiseimboyei!

Hosea 10:8

³¹ Hapondani ro nimi yanggiri nahurai-anahi, nga wambo rawarhindiri. Nga süngunambo moaruwai tükündefeyoani se nimi yapari nahurai-ayei siheimbo nüngumandifendüra?” mehu.

³² Nindou yimbu moaruwai hohoanimoyafandeimbi amboani Sisas dibombo sowapündümo mahifomo ahafanimbo hifokoeffirimbohünda.

³³ Ai hei nimoei wafu mbirihapiri sisami sei arihündi ranihü Sisas asu hühühüniyafani-rinandeimbi nindou yimbu ahamumbo tikorüpundimo pamarupuri ra Sisas ai mbusümoyuwane asu ngorü ai warihondüniyu asu ngorü ai kadüdaniyu yafine pamarupiri. ³⁴ Sisas ai hoafiyuhiya, “Ape, amboawi mbisafi nimboe ai moai fifirundi nine-moatükuni rawarundi ranahambo,” mehu. Asu ami ai satu piraimemo didai Sisasindi-mayo hoeari ra mandemündü yahomo houmbo.

³⁵ Nindou afindi ranai niboadei himboanambo hifandihündi, nga boboagori nindou ai Sisasimbo tirifoariwuri hoafiyomondühi yahomoya, “Nindou bidifirambo aboedambo-reandüri marandi. Se Godindi nimori Krais-ayafi ana, yaro sihafihoari aboedamboyafo,” mehomo. ³⁶ Asu ami amboani tirifoariwurühi homo hühütimbü moatükuni wain hoe finiga masabudo. ³⁷ Ai hoafiyomondowohü yahomondoya, “Se Suda-yafe bogorayafi ana, yaro sihafihoari aboedamboyafo!” mehomo. ³⁸ Nimi keimbi karihendeimbi nimoamo ndaru sürü pamarundi: NDA SUDAYAFE ADÜKARI BOGORANI.

³⁹ Nindou hühühüniyafani-rinandeimbi nimi keimbi karihendeimbi fihimbo mapenimbafani ngorü ranai Sisasimbo tirifoariwuri puküna hoafiyuhi yahuya “Se ra Kraisiyafi? Ranayafi ana, yaro sihafihoari aboedamboyafoasi asu yihohimbo amboani aboedambo-rowamuni,” mehu. ⁴⁰ Nga asu ngorü hühühüniyu-randeimbi gorügoanini mapenüngu ranai afoai yahu hoafiyundowohü yahundoya, “Se Godimbo yihimboyafo? Nga se tinjirifo asowandifi nahuraiane ai-amboani asemüdu. ⁴¹ Sihiri tinjirifo asahoamindehi ranana sapo nini-moatükuni sihiri ramarihoandi rani-süngumboane. Nga nindou ndanana moai nini-moatükuni moaruwai rareandi.” ⁴² Asu ai hoafiyuhi yahuya, “Sisas, se sihafi nginindi hifandarandambe tüküyafo amarifi ana, se wambo hohoanimondafindiri,” mehu. ⁴³ Sisas ai hoafiyundowohü yahuya, “Ro

anihondümboanahi haponda hoafehanini se ro-dibo ngoafi aboedi ranihü nimandimboyafi,” mehu.

Sisas ai yifimayu

(*Matyu 27:45-56; Mak 15:33-41; Son 19:28-30*)

⁴⁴Sapo hüfihamindikoate-yowohü wambo nimbi ranai hüfünimbo peyo haya gabudifoare hombo nimbambe tüküme Feyo. ⁴⁵Refeyoambe asu hoeari Godindi worambe kümarundi ranai mbusümondühi yimbu bumareandi. ⁴⁶Sisas ai pukünambo hamindi hoafi karihoeihü “Ape, wandi yifiafi sihafi warihariheandi,” yahu mburambo asu yifimayu.

⁴⁷Asu ami-yomondi bogori manüngu ranai nine-moatükuni tüküme Feyo ra hoeireanda mayoa asu Godimbo aboed-ani yahu hoafiyuhiya, “Anihondü-ane, nindou ndanana moai nini-moatükuni moaruwai yare randi,” mehu. ⁴⁸Nindou afindi wakire mengoro ranai hoeirihinda mayowamboyei afindi hohoanimoyeihi ahei ngusüfohü purüki-purüki kameihi ngoafina mahei. ⁴⁹Ŋga Sisasindi fikiminidiyei asu nimorehi Garirihündi ahambo süngumarihori ranai foarihehi niboadeimbo himboanambo wamarihori.

Sisasimbo honguambe masihehori

(*Matyu 27:57-61; Mak 15:42-47; Son 19:38-42*)

⁵⁰⁻⁵¹Nindou mami anihondümbo-reandeimbi aboedi hamindi manüngu ahandi ndüri Sosep, aiana Suda-yafe kansir ambeahindiyu. Ŋga asu ai moai yifiriyu bidifiri boboagori-yomondi hohoanimo Sisasimbo ramarundi ranahambo. Aiana Suda-yafe ngoafi Arimateahündiyu hayamboyu asu God nginindi hifandarandi ra tüküfemboayo ranahambo hifanda marandi. ⁵²Sosep ai Sisasindi yifinimoko ra dibonapifembohünda Pairatimbo düdufimbo mahafu. ⁵³Asu Sosep ai Sisasindi fi-nimoko ra nimi keimbi karihendeimbi fihindi foarimündi siherü henüngu kifohi hoearinambo pariri ngamondifoariri mbura sowarüdümo homo nimoei adükari nimaroweimbi hongu nahurai wowondimaru hifomo ranambe masihawuri. Asu hongu ranambe ra moai horombo yifi sihoemo rundi. ⁵⁴Ai ndeara sümbo Godimbo hohoanimoyowohü moani ngoafimbo nimarimboane sei hehimbo munguambo moatükuni napirihindane rani-moatükuni ra tüküme Feyo.

⁵⁵Nimorehi Garirihündi Sisas babidimbo mahüsi-maye ranai Sosep babidimbo Sisasindi yifinimoko sihefimbo honguanambo mahei sapo nüngurüwuriamboemo asihawuri ra hoeifimbo. ⁵⁶Raniyei asu nimorehi ranai worina hei aboedi fisiñarümbü moatükuni mbimbirai asu marasen ndondomarihindi. Asu Mosesindi ahinümbi hohoanimo hoafimayo süngu moani nimarimbo si ra mamarei.

Sisas botimefiyu hoafi

(*Matyu 28:1-10; Mak 16:1-8; Son 20:1-10*)

24 ¹Mami wik ranahandambo weangurühündi sihi siambe hondü nimoreh ranai Sisas samboarüwuranambo aboedi fisiñarümbi

ngusümboarambe sisai fiyafandühi manimbafani. ¹⁸Asu ngörü, ahandi ndüri Kriopas, ai simbori hoafiyuhi yahuya, “Awi Serusaremihü ndüfosimbo tükümehindi ra se yangiranafi nine moatükuni ranihü tüküme feyo ra fifirife koate-ayafi?” mehu.

¹⁹Asukai Sisas ai düdureapirühi yahuya, “Nimboe wataporimbo-arinanda?” mehuamboyafani. Asu simbori hoafiyafandühi safaniya, “Sisas Nasaretihüdi ranahamboane wataporimbo-arihori. Aiana Godindi hoafi hoafiyu-randeimbiyu haya God asu muṅguambo nindouyei himboahü ahandi hoafi, ratüpuri ra ṅginindi hamindiyo. ²⁰Yihoe fi bogori nindou asu Godimbo sesi sihou-rundeimbi ai gafmani-yomondi warihü hiniṅgimarüwuri. Raniyo gafman ai hifokoefimboani yahomo houmbo nimi keimbi karihendeimbifihü tikoründümo pamarüwuri. ²¹Ṃga horombo ro hohoanimoyefühiya, ‘Sisas ranana God ai Israerihüdi ranaheimbo aboedambo-fendürimbo kafoariri hiniṅgirimbombai,’ masefi. Asu hifokoamarüwuri ra yimbu si ho hayamboyoani hapo ṅgimi noufimbü siane. ²²⁻²³Hapo siambe hondü nimorehi bidifiri roambeahindi ai hei hoṅguambe himboyeia moai ahandi yifinimoko ra ranihü hoeirihindi. Raniyo ro hepünimehundi. Ai sinei yihoe fimbo hoafiyehi seiya, ‘Sünambeahindi nendi yimbu hoeirihupira ai safaniya, ‘Sisas ana yangiri mbanüṅgu,’ masafani,’ masei. ²⁴Asu nindou bidifiri roambeahindi amboani hifomo hoṅguambe muṅguambo moatükuni ra hoeirunda nimorehi hoafimayei süṅgure meṅgoro. Ṃga asu moai Sisasimbo ana hoeirüwuri,” masafani.

²⁵Asu Sisas ai ahafanimbo hoafiyupirühi yahuya, “Se ana ṅgusüfokoate-anemo, se moai Godindi hoafi hoafiyomo-rundeimbi hoafimemo ranahambo nimehünou hohoanimoyomo. ²⁶Godindi hoafi hoafiyomo-rundeimbi ai hoafiyomondühi yahomoya, ‘Nindou God ai ahandi nendambo aboedambo-fendürimbo kamafoariri ra asübusi ndemündi mbundambo animbo asu süṅgunambo Godindi himboahü ndüri adükarümbindümbui,’ mehomo,” mehu. ²⁷Raniyo Sisas ai ahafanimbo ahandi fimbo Bukambe hoafi mapeniṅgo ra Mosesindimayo bukifihü piyu haya Godindi hoafi hoafiyomo-rundeimbi sürü papiru masihoemo ranahambo yamundimareapiri hu.

²⁸Ai homo Emaus ṅgoafikimi tüküme fundi. Raniyo Sisas ai ṅgasünde haya hombonoumefiyu. ²⁹Ṃga yimbu ai hüti hoafiyafandühi safaniya, “Mborai ro-babidi apoefo, ṅga ndeara hüfihamindi hanühi nimbifembo akimane,” masafandamboyu. Raniyo hafu ahafandi worambe aibabidi mamaru. ³⁰Ai sesimbo yahomo houmbo nimarimombo bret semündü Godimbo hihifirüri mbura hifitire haya masagapiri. ³¹Rasüṅgu-mareandamboyo ai hepünafineandühi Sisas ani safani fifirimarineri. Ṃga asu nimehünou asukai awarimarihoayuwa moai hoeirineri. ³²Ai ahafandihoari simbori hoafüriyafandühi safaniya, “Anihondü-ane, nafini

sinefūhi sihehimbo wataporimbo-maramuna asu sihiri ŋgusūfoambe hepūnimehoandi,” masafani.

³³Refe hayamboyoane, sünggurineri-rinandeimbi ranai botiyafine hena Serusareminambo mahafani. Raniyo hafani hoerineapurani ahandambo sünggurü-rundeimbi 11-memo ranai ahamundi ŋgunindi babidi gugureafu mamarimonda hoeimarineapuri. ³⁴Ai hoafiyomondūhi yahomoya, “Anihondū-ane, Adükari ai yifihündi botimefiyu! Ai Saimon-so tükumefiyuwa hoeimariri,” mehomō. ³⁵Raniyo asu sünggurü-rundeimbi yimbu ranai ahafanimbo-so nafini tükumefiyu asu bret hifitireanda türüfoarineri fifirimarineri ranahambo wataporimbo-marinandi.

Sisasimbo sünggurü-rundeimbi ai hoeimarüwurü

(*Matyu 28:16-20; Mak 16:14-18; Son 20:19-23; Ratiipuri 1:6-8*)

³⁶Ahambo sünggurü-rundeimbi ranai bidifirambo rani-moatükuni ra wataporimbo-rundane, Sisas ahandihoari ahamundi mbusūmo tüküfi nüngumbo hoafiyupurūhi yahuya, “Sihamundi ŋgusūfoambe afure kümbearoamboane,” mehu. ³⁷Raniyomo yifafimbai hoeiarihuri yahomo houmbo yihimbo muᅅguna moaruwaimemo. ³⁸Ŋga asu Sisas ai hoafiyupurūhi yahuya, “Nimboe se ranahambo hepūnefunda? Asu nimboe se nini-moatükuniyo hoeimarundi ranahambo awi fifirifekoate-ayomoa? ³⁹Se wandi yitiᅅari watiᅅari hoeiru. Ro wandihoar-anahi nda! Se sündu hoeirundiri. Sapo yifiafi ana ŋgiri wandi fi nahuraindo.”

⁴⁰Sisas ai hoafiyu mbura asu ahamumbo ahandi fi hoeari ra nafuimepuri. ⁴¹Ai afindi hihifi-hihifimemosi, ŋga ai awi ranahambo anihondümbofe-koate-afindi hohoanimomemo. Asu Sisas ai hoafiyupurūhi yahuya, “Se sesi bidifiri sihoundai?” mehu. ⁴²⁻⁴³Asu ai kini mamandundi ra ŋgorü bidifiri masabudowa semündü haya ahamundi himboahü masesuwa hoeimarüwurü.

⁴⁴Ai ahamumbo hoafiyupurūhi yahuya, “Se fifirundai ro horombo se-babidimbo nimboahambe hoafimayahi ra? Ro hoafiyahapurūhi sahiya, Mosesindi ahinümbi hohoanimo ranambe, Godindi hoafi hoafiyomo-rundeimbi-yomondi bukambe asu Herü Buk ranambe muᅅgu moatükuni wambo tükündifemboe masahi.” ⁴⁵Sisas ai ramehuamboemo ŋgusūfoambe fufurifoareapurūhi Bukambe hoafimayo ra türüfoaru fifirimarundi. ⁴⁶Asu Sisas ai simbori hoafiyupurūhi yahuya, “Sapo Bukambe sürü papimarundi ra yare hoafiyowohü yahoya, ‘God ai ahandi nendambo aboedambo-fendürimbo koamafoariri ra asübusi ndemündü mbunda yifindu haya ŋgimi noufimbü ranambo yifihündi botindifimbui. ⁴⁷Rananimbo Serusaremiᅅü pindimo houmbo muᅅguambo hifi ahandi ndürinambo hoafi bokarindihoemboemo. Rananimbo asu moaruwai hohoanimo ra hiniᅅgiriᅅindühi aboedi hohoanimo süngguriᅅindani God ai

ahei moaruwai hohoanimo ra amboawi mbeyahuamboane,' meho. ⁴⁸Asu se ndani moatükuni tüküme Feyo ndanahambo wataporimbondu ndüdi. ⁴⁹Wandi Ape ai Yifiafi Aboedi koarih efembo hoafiyu masihendi ra koandiheheamboyah. Ijga awi se hokoate Serusaremihi nimandimombo Godindi-mayo nginindi ra ndowandümo houmbo animbo ngomo," mehu.

Sisasimbo God ai sünambe serümündü mahafu

(Mak 16:19-20; Ratiipuri 1:9-12)

⁵⁰Sisas ai ahambo süngrurü-rundeimbimbo se purümündi hu Betani ngoafihü kaimayu. Raniyo God ai ahamumbo aboedi-aboedimbireapura yahu haya didibafimefiyu. ⁵¹Ai ahamumbo aboedi-aboedireapurühi nünguane God ai ahamundi mbusümonindi serümündü sünambe mahafu. ⁵²Ai yiri yimbu pusiru nimarimombo ahambo ngusifo parüwuri mburumbo Serusareminambo hihifi-hihifi kameihi hihiriyafu mahomo. ⁵³Asu ai muṅguambo si Godimbo aboed-ani yaho hohoanimombohünda ahandi worina homo marundi.